


民國叢書

第五編

• 95 •



民國叢書

第五編

· 95

綜合類

茹經堂文集 (三一六)

唐文治著

上海書店

唐文治著

茹經堂文集
第六編

茹經堂文集六編目錄

卷一 雜著類

先考 忘日哀詩當哭丁亥

昨夜思親翌日聞周太孺人節孝坊被燬憤懷感賦壬川古

再記劉河石牌坊被燬文丁亥

無錫族伯子良公隱行善事三則丁亥

記太倉楊君俊丞自戕殉職事丁亥

論世界之和與戰乙酉

論定國要策乙酉

政治道德論戊子

仁壽鑑乙酉

窮民歎丙戌

勸施衣施米並設施粥廠文丙戌

續勸施衣施粥文丁亥

勸居家勿鞭撻小兒說丙戌

南洋大學演說稿丁亥

無錫國專校友會春季大會訓辭丁亥

崇明沈同一先生同韻書屋祝辭 戊子

太倉張咄湖先生畫像題辭 丙戌

江甯陳亮伯先生墨蹟題辭 乙酉

無錫張嫻女士風雨勒斯圖題辭 乙酉

茹經堂文集六編卷一

雜著類

太倉唐文治蔚芝著

先考忌日哀詩當哭丁亥

人生盡孝為至樂痛我養親非且薄膝下依依有幾時時光駒隙悲莫續父兮生我母兮鞠長我育我又願復終歲劬勞知為誰為撫兒孫債稟築歲敝凶寒風雪惡奔走稱貸猶不足瓶罄舉恥窮途哭兒身莫代罪莫贖追思往事淚盈掬嗚呼人生盡孝須及時母如我生罔知覺哀哀蓼莪空廢讀

附記

先考忌辰係十二月二十四日先妣忌辰係十二月二十一日此數日中正文治椎心泣血之時也又按向例結賬必於歲杪文治家本貧寒六十年前此數日中正先考奔走借貸之時先妣患肝病亦正臥床憂慮而文治不能代親之勞言念及此愴焉欲絕憶文治二十年前作蔚蒿哭百首於從前况味亦詳敘其中人生盡孝須及時母若文治之追悔無及也

春夜思親翌日忽聞周太孺人節孝坊被毀愴懷感賦壬午古韻

蓼莪三復涕縱橫罔極難忘願復恩寸草有心千尺恨劬勞祇向夢中尋近廬三夢先考婦居大

清心映月鬼神知節孝坊前拜祖慈昨夜三更淚如綆白雲飛越到瀏湘河土大嶺有廟房六間一廬係

世祖斗光公所建遺刻聯云聖德齊天葉片石清心同月映孤松綠族弟子誦報告近為人拆毀值賦滿泣不知所云

再記劉河石牌坊被燬文丁亥

家譜載遷妻始祖梁鼎公明末由金陵遷妻當在天啓崇禎間故老相傳梁鼎公墓舊在梅花坡原有六十畝迺遷向東南至土山石牌坊爲止牌坊爲欽旌節孝周太孺人遺蹟丁丑日寇內犯至劉河依山爲險大礮於上以抗國軍洎日寇降牌坊已倒毀文治於甲申年曾爲文以紀之近年來文治因衰老目瞶又患膀胱炎不克赴劉屢囑其弟文鎔字子澹檢藏殘石又不知其檢得若干石刻尙有存否也嗚乎當戰事之興文治既無法護持迨事平後又不克至劉躬自省視罪奚可辭擬懇族弟文壽字靜之專誠到劉察勘再切商修建之法而是坊之規模舊制常繫於夢寐間爰再紀之並哭之以辭曰

陟彼高岡追感蒼茫徵特家業實惟國光巍峨片石矗立人間發帑旌淑聖德齊天日寇內熨乾坤爲愁石激天驚乃汝世讎白雲流涕鬱伊靡旣建復舊觀寤寐心鑄昭茲貞珉於千萬年

無錫族伯子良公隱行善事三則丁亥

一 對於育嬰事業愷惻慈祥以爲呱呱者得長成與否權實操於乳母特懸規章以緣督之設獎金以誘掖之親驗嬰孩肥瘠以勸懲之

一 於邑東北鄉嚴家橋創設施棺會又於邑東郊購基地創立義塚

一 每值歲寒凶荒有飢餓不能出戶者叩其門予以錢若干糶或訝其無因而至則曰吾昔日貸君錢君豈忘之乎或乘其不覺置錢於室隅卽匆匆去或探知貧戶他出叩門訪之其家爲烹茶款待時卽以錢置於茶几內卽揚聲曰請不必烹茶吾別有事去矣有錢在茶几內爲小實實買糕之資遂卽匆匆出門去然終不言眞姓名故其後嗣如星海君等均發達無限天心佑善洵不誣也

記太倉楊君俊丞自戕殉職事丁亥

君姓楊氏諱璋字俊丞吾婁庠生幼廉潔自持志趣邁流俗當前清之季各省設立巡警學堂以謀自衛吾

蘇亦興辦警校當道檄各縣保送傑出人才入校肄業君應選卒業後邑令委辦本邑警務君之任蓋訂章則綏靖閭閻踴厲風發洵時勢常周歷各鄉稽覈戶口緝捕奸宄曰保境安良吾之責也於是輿情愛戴當道嘉許之迭次獎勵由警務課長洊升警察所長彼一等警佐迨民國十三年遂有自戕殉職之事初民國二年夏南北戰爭事起滬軍自粵城退守太倉北兵窮追將入邑境訛言朋興情勢岌岌君偕邑令洪伯賢先生（名錫範）及當地紳商奔走獨贊說南軍繳械泊北兵至優加犒勞得免戰禍邑中慶安堵其苦心調處厥功至大十三年江浙齊盧之戰吾邑地當衝要夏歷八月四日大軍齊集駐太蘇軍某旅長資令君限一日內拉民夫三百名用以輸送彈藥軍法森嚴急於星火君默然不應退則泫然自度吾何忍騷擾同鄉良民俾父老兄弟離散哭別耶吾死不過一家哭若拉夫則千家百家一路哭矣遂於是夜二時在任所寢室以自備手槍置胸前發彈自戕卒嗚呼方是時也草木淒悲鬼神飲泣悲哉壯哉翌晨邑中闕傳曰義士某旅長亦感動遂罷拉夫之役嗚呼晚近以來士夫見利則趨見害則避求一爲民禦災捍患者曾不數觀而君毅然舍生取義方諸古志士仁人何以過茲卒年四十母某氏至今健在年八十七當時鄉人有慰藉之者則曰吾子爲保衛地方人而死吾何憾乎遺孤三日鼎華曰某曰某善人有後可以前知君卒後二十三年鼎華持狀來乞爲記余以君矯矯亮節不獨宜載邑志省志當達史館立傳亦吾邑之榮邦國之光也

論曰悲哉拉夫之慘也前齊燮元柄省政時飭役曰拉夫吾蘇有某姓四人祖母一子婦各一孫一年弱冠被強拉去其祖母思孫哭泣兼旬竟死其子亦恐被拉既痛其母又藏匿驚悸越數日亦死其婦無以爲活投水死噩耗傳知其子痛極亦投環死一家四人先後畢命余嘗作拉夫行以哀之載諸軍箴悲哉拉夫之慘也唐李遐叔曰蒼蒼蒸民誰無父母誰無兄弟誰無夫婦生也何恩殺之何咎讀其文思其慘狀有不漉

然出涕者乎今觀楊君殉一人之命保全數百家之性命仁說慈說義烈說竊謂吾鄉之人宜尸祝而祠祀之也後之主持軍政者其亦以君爲矜式而造福於子孫黎民乎

論世界之和與戰乙酉

易乾卦言各正性命保合太和乃利貞余爲進一解曰惟乾坤和氣洋溢宇宙間而後人民各正其性命繫辭傳陳憂患九卦其一曰履德之基繼之曰履和而至又曰履以和行和之時義大矣哉蓋天敘天秩正德則爲乖戾戾氣所積遂謂人生非爭不可由一家至一鄉由一鄉至一國相爭相奪相殺而靡所底止於是不顧民命乃查出於戰孟子曰爭地以戰殺人盈野爭城以戰殺人盈城此所謂率土地而食人肉罪不容於死善戰者服上刑徵諸天道人事毫髮不爽梁惠王以土地之故糜爛其民而戰之又驅其所愛子弟以殉之是自殺其子也項籍百戰百勝至於受垓下之圍虞兮一歌悲愴欲絕是不啻自殺其婦也梁朱溫殺人無算至投清流士人於河海及其子漢（又名）爲唐莊宗所慘敗謂其近臣皇甫麟曰吾不能自裁卿可斷吾首麟遂殺漢亦自殺自古樂殺人而好戰者未有不轉而自殺其身及其子孫者也孟子又嘗曰殺人之父人亦殺其父殺人之兄人亦殺其兄然則非自殺之也一聞耳豈不信哉以歐洲言之遠代如拿破崙幽囚荒島近世如希特勒國破身亡皆可爲好戰嗜殺者之殷鑒無如乖戾之氣多祥和之氣少是以戰局日開吾民之受其劫運者屢懸於樹腸挂於壁其他折臂雄雌流離轉徙之狀目不忍觀耳不忍聞而筆亦不忍述痛乎悲夫吾是以論和之利戰之害和之福戰之禍大聲疾呼以曉百世

余悲近時戰事無所底止爰作此文追脫稿敵降中日和平已實現遂錄之以爲後世殷鑒

茹經自記

論定國要策乙酉

乙酉秋孟或有問於余曰茲者世界太平矣敢問今日定中國要策宜何如應之曰余所持者卑之無甚高論惟有興廉務實二事而已自聖門發明利物和義以義爲利之旨孟子生戰國時復大聲疾呼七篇之書首辨義利而後世風俗日偷無有能信守之者大學明言仁者以財發身不仁者以身發財而吾國人專以發財二字爲口頭禪受其害者或隱喜而陽諱之心術卑鄙品行醜率由於此孔子曰慢藏誨盜老子曰多藏厚亡孟子曰去義懷利未有不亡世人視爲迂遠貪官汙吏盈天下而人類之相爭相奪相殺遂無已時故吾常謂吾國人好利之心一日不去中國恐無太平之望哀哉周官六事以廉爲本禮記曰臨財毋苟得臨難毋苟免蓋苟得之人未有不苟免者彼擁資鉅萬或數十萬或數百數千萬宮室之美妻妾之奉所讒窮乏者得我豈有肯舍生取義之理故孟子曰此之謂失其本心苟清廉之風一振貪墨之吏嚴懲不貸譬諸霹靂當空妖魅自然遠遁此宋陸象山先生白鹿洞喻義喻利章講義及明王陽明先生拔本塞源論答毛副憲書學者不可不熟讀也余向倡讀經救國之論曾撰孝經孟子救世書儒林道學當一以貫之矣試讀近代曾文正公文集日記家書其腳踏實地兢兢業業爲何如風聞丁丑歲戰事初起時錫紳有向當道請軍械守城者則笑曰敵人豈有至無錫之理現在崑山兵力可支持七個月屆時大兵雲集彼小醜詎足道耶厥後崑山不特未持至七月卽七日并不能守此事雖未必確實然亦足徵放空氣之爲害孔子曰其言之不作則爲之也難大言炎炎毫無實際以嚇吾民猶不可況以嚇外人乎哀哉或曰宜傳豈無功耶曰此尤貴有實際孰者宜宣傳孰者宜輟晦更宜謹慎斟酌易傳曰亂之所生也言語以爲階幾事不密則害成是以君子慎密而不出也風聞丁丑年常州鄉間某地卽因宣傳軍械充足致受轟炸哀哉宋邵子曰天下將治則尙行也天下將亂則尙言也夫言有枝葉已非治世所宜况虛聲洞喝乎况軍事要政乎故竭

力務實猶宜慎密不出況並無實際乎爰見臆見或者有當萬一知我罪我在所不計或曰子常言爲學行政均當有標準吾人爲斯世宜讀何書曰當讀陽明集要與余所撰陽明學術發微及近今坊間所印三名臣書牘誦其書尤當師其人

政治道德論戊子

或問政治與道德宜分乎宜合乎曰合則治分則亂治則盛亂則衰治則存亂則亡論語中有分言之者道之以政民免無恥道之以德有恥且格是也有合言之者所謂爲政以德譬如北辰居其所而衆星共之蓋言躬行道德心理統一而後土地始能統一否則民心渙而不聚土地亦豆剖而瓜分矣聖人答季康子曰政者正也子帥以正孰敢不正蓋言政治萌軔在正人心而欲正人心必先自正其心也或又問曰政之爲正既得聞之矣敢問人心曷由正乎曰明君子小人之辨而已矣君子喻於義小人喻於利義者道德之根源行而宜之謂發之於政治大順乎人心所欲與聚所惡勿施也利者字義爲刈禾公其利則天下之美利也若私其利於一己則貪庸卑鄙心術欺詐刃立於旁其弊也因行政而殺人且轉而自殺并殺其子孫矣哀哉或有問曰義利之辨既得聞之矣敢問何由徙義而遠利曰祛人心中心人之見而已矣聖人言吾道一貫曾子釋之曰忠恕蓋言合人已爲一貫卽政治之原理也是故聖人先人而後己賢者推己以及人愚不肖有己而無人先人後己處舜之舍己從人取人爲善與人爲善道德之極則也賢者推己以及人欲立而立人已欲達而達人是也愚不肖有己而無人我處於富貴利達之場而置四海困窮於不聞不問耽一己之安逸而罔知人之困苦求一己之尊榮而罔知人之詛咒詭譎之聲普顏色拒人於千里之外孟子引詩曰其何能淑載胥及溺此之謂也或又問人之辨既得聞之矣敢問居今世而言行政宜何如曰興廢務實而已自聖門發明利物和義以爲利之旨孟子生戰國時七篇之書首辨義利大學明言仁者以

財發身不仁者以身發財而吾國人專以發財二字爲口頭禪或陽喜而陰用之此等醜態之弊不除政治豈復有清明之望國家焉得有振作之時故今日惟有興廉而嚴懲貪墨警諸霹靂震空妖魅自然遠遁若喜其爲我牟利逢迎諂媚而用之則民生日益憔悴國家日益危險矣此余所撰紫陽學術發微陽明學術發微二書又茹經堂五訓及勸善編學者不可不熟讀也虛矜之氣最足以害國縱覽中外歷史虛矯者未有不敗實事求是者未有不興孔子告季康子曰政者正也子帥以正孰敢不正又曰子欲善而民善矣行政者其鑒諸故居今日而言道德言政治必當以明王陽明先生近代曾文正爲師吾中國庶幾有挽回之望陽明功業在明代震耀一時其全書未易卒讀而明施邦曜先生所編陽明集要及王文成全書宜三復精思也至曾文正與李申夫書教以取人爲善與人爲善二事每日載諸日記以自觀省余於三十年前以爲致太平者必求興廉務實體用兼備之士而國人曾莫之悟孟子言禍福無不自己求之者又曰七年之病求三年之艾其道維何亦曰仁義而已矣

仁壽鑑一壽己壽人壽世之方一乙酉

論語孔子言仁者壽而中庸贊舜之大孝則言必得其壽大德卽大孝也後漢延叔堅曰仁人之於孝猶之手足之有腹心枝葉之有根本也腹心定靜手足自然健強根本堅固枝葉自然峻茂孝經言事父孝故事天明事母孝故事地祭天地明祭神明彰矣又曰孝弟之至通於神明光於四海蓋孝子視於無形聽於無聲心思精細縝密從容純固通神明之德焉得而不壽繼之者其周文王乎自朝至於日中昃誠和萬民然必朝於王季日三視膳寒暄示萬世人子之法則舜生三十徵庸三十在位五十載著於尙書文王百齡著於禮記繼之者其周之召康公乎卷阿之詩召公所作也曰有馮有翼有孝有德而其致壽之方更有可考見者書召誥篇曰節性惟日其邁節性者節耳目口鼻嗜欲之性孟子所謂君子不謂性也而卷阿篇言傳

爾彌爾性似先公會矣。會者精神之凝聚也。彌性者充滿仁義禮智之性。孟子所謂君子不謂命也。古來養生立命之學以召公爲極。至故輔佐周初文武成康四代其壽達二百齡而實本乎孝德。吾特補之曰。孝則壽。易乾卦彖傳言各正性命保合太和。吾謂惟太和之氣洋溢乎宇宙而後人民得各正其性命。易繫辭傳陳九卦曰履和而至。又曰履以和行。和氣充積於家庭社會達之天下而後一國及世界造於和平大同之域。和氣積則能作善。易傳言積善之家必之餘慶。善氣充滿於一身一家漸積於一鄉一邑推之於一國則如孝經所謂天下和平災害不生禍亂不作。反是則爲戾氣。戾氣積則必作孽。書曰自作孽不可活。自來未有作善而不長久者。亦未有作孽而不消滅者。故曰和則壽。善則壽。若夫養氣之法。儒家與道家息息相通者也。論語言養氣曰人之生也直。即孟子所謂以直養而無害也。孟子又言持其志無暴其氣。蓋心與氣相依。心放則氣散。氣散而魂魄漸離矣。老子曰載魂魄抱一能無離乎。專氣致柔。能嬰兒乎。此養氣至精之法。所謂嬰兒者言養氣專一。懸懸若存。如嬰兒在胎中隨慈母之氣以爲呼吸也。或以爲嬰兒出現者妄也。孟子曰平旦之氣好惡與人相近。苟得其養。無物不長。又曰我善養吾浩然之氣。可見養氣先養平旦之氣。俾志定神清。葆而非失。進而上之則養浩然之氣。明顧亭林先生言作文之氣當與天地清明之氣相接。吾謂非特作文脩養道德必當如此。活氣配義與道非道非義一介不取。予至於直己以正天下。則心氣旁薄於乾坤矣。老子言虛其心實其腹。弱其志強其骨。此養氣至善之法。虛其心者息念法也。實其腹者息念而神不外馳。則氣亦反於心自然。下沉於丹田也。一或解實其腹爲飽食者誤。一老子所謂天法道。道法自然。純任自然。則壽矣。弱其志者思念寡而不用力也。強其骨者挺直節骨行必危。行坐必危。坐不使佝僂跛倚也。莊子在宥篇言無視無聽抱神以靜。形將自正。必靜必清。毋勞女形。毋搖女精。乃可以長生。目無所見耳無所聞。心無所知。女神將守形。形乃長生。又曰吾守其一以處其和。故吾守身千二百年。吾形未常衰。云云。始

也形抱神繼也神守形泊於神明不衰則可以長生矣又人間世篇論心齊法曰無聽之以耳而聽之以心無聽之以心而聽之以氣聽止於耳心止於符氣也者虛而待物者也唯道集虛虛者心齊也又云瞻彼闕者虛室生白吉祥止止夫且不止是之謂坐馳虛室者鼻也白者氣也吉祥止止者氣由粗而至於細由細而至於無形也宋朱子作調息箴發明之曰鼻端有白吾其觀之隨時隨處容與猗移靜極而虛如春沼魚動極而歇如百蟲蟄細繼開闢其妙無窮誰其尸之不幸之功雲臥天行非余敢讓守一處和千二百歲是朱子亦深道家學矣至於養氣首戒忿怒曾文正云養身以不惱怒爲本中庸言喜怒哀樂之未發謂之中又言致中和宋李延平先生教人觀未發之中即致和養氣法也（先大父常引此語戒文治之多怒）故曰善養氣者壽

余每歎世人紛紛擾擾奔逐於利心志不定而自促其壽也夫國民心志不定則身家危富道者心志能定毋沉溺奔馳於利欲吾國庶有秀乎爰作此文希冀壽已壽人壽國而即以壽世也

茹經自記

窮民歎丙戌

窮民苦 窮民苦 宛轉哀呼向誰訴 更有隱貧高尙人 飢餓不能出門戶 寒風凍雨相逼來 四壁穿漏倒牆堵 惟望仁人大君子 慨解仁囊力補助 多施幾襲衣 卽救幾人凍僵臥 多施幾甌粥 卽救幾家不舉火 此時爲善好機會 萬勿遲延空錯過 善氣充周消劫數 降福子孫無量度 勸施衣施米並設施粥廠文丙戌

深秋已至寒冬卽在目前鄉間之隱貧戶及啼飢號寒不能舉火者恐不免有飢餓凍餒之慘况物價日益騰貴生活程度不知高翔至何地步思之愈覺惻然鄙人常有言天下凡事皆須爲他人着想設身處地自

無人我之隔膜譬如我御重裘享肉食而一念及他人之凍餓以死於本心何忍乎際茲時局生民幾困於水火之中自當亟起以救之唐虞之世一民飢曰吾飢一民寒曰吾寒之一民有罪曰吾害之禹思天下有溺者由已溺之稷思天下有飢者由已飢之皆自任救民之責吾輩雖無權位亦當時時以救人命爲職志務望大仁人君子發願捐貲或獨立規舉或聯合同志相帥爲施衣施米施粥之會古人云九月授衣目前趕做尙來得及至於設立施粥廠尤爲最大功德其施米者亦須酌給柴火資總之吾多施一衣即少一凍死之人吾多施一米一粥即少一餓死之人此時乃爲善大好良機萬不可當面錯過致貽後悔鄙人前作勸善編業已詳言今再簡單言之萬懇大仁人君子迅速進行書云吉人爲善惟日不足論語云見善如不及隨時隨處皆有善因善果切盼切盼至叩至禱

續勸施衣施粥文丁亥

時屆隆冬天氣驟寒茅簷草屋僻巷街頭凍餓倒斃者不可勝數余爲慘然曰吾輩中人之家際茲嚴寒猶飲醴醪服重裘圍火爐居溫室而目擊同胞飢餓以死者比比皆是能無惻然動心乎孟子有言今人乍見孺子將入於井皆有怵惕惻隱之心今茲窮民垂死者載道豈但孺子入井而已況人生以施濟爲最樂應請好善之士多設粥廠若干所並施棉衣若干套或獨力經營或合力調濟倘在飢荒被難之區尤宜分投前往賑濟至於鰥寡孤獨廢疾無告不能舉火者均宜切實援救能救一命即造一大德於子孫若慮鋪張致受包圍即隱行其善亦無不可中庸曰天地之大人猶有憾要知人生當彌天地之缺憾際茲時間實係爲善大好機會萬不可當面錯過培植善行必收善果天心佑善不爽毫髮余昔年曾作勸善編已揭斯義茲復簡約言之詩曰俾昌而熒俾壽而臧竊爲諸大善士馨香以祝之

勸居家勿鞭撻小兒說丙戌

余居澠錫兩處鄰家多有鞭撻小兒者甚至拴結桌棧之上任意毒打兒童呼救絕不之顧若有讎敵者然其小者釀肝鬱之疾其大者罹戕命之凶余不知其何以忍心害理一至於此按字義口含禾爲和凡食五穀者皆當有和氣憶余前年六月居寶界橋茹經堂避暑時一夕傍晚有鄰人父痛撻其子者其子奔逃父追撻之余急高聲呼曰勿撻小兒呼未竟忽聞擗通一聲兒已投水矣鄉人卽赴水救之撈起則氣已絕其父哭之慟旋其母偕親戚等羣至圍哭尤慘余又高聲呼曰此時徒哭無益奉勸同鄉人此後勿鞭撻小兒呼至三遍是夜哭聲遂且余不能成寐嗚呼天下皆人子也爲人子者無論如何惡劣爲父母者皆當正言以勸導之甚者不過怒叱之須知親生之子卽祖宗遺體何爲毒打如此乎抑何忍心之至乎大學引康誥如保赤子申之曰未有學養子而後嫁者也解者或疑此語爲拙不知非拙也孝順出於天性慈愛亦出於天性先儒謂長官撫痛苦垂絕之民如慈母伏其將死之子痛哉斯言乎仁哉斯言乎其何以設法拯救之乎昔清初湯文正公一諱斌字潛庵河南睢州人一撫吾蘇當時稱爲天下第一清官至其學說則曰學者祇須將孟子今人乍見孺子將入於井皆有怵惕惻隱之心二語常存心中卽可上達天德夫天德豈易達而湯公云然者豈不以天生地生生理不泯於人心從而存之則一點良知千古不昧矣易乾卦象傳曰各正性命保合太和能保一心一身一家之和氣推爲一鄉之和氣一國之和氣焉有不能正其性命而馴致於太平者乎孝經孝治章曰天下和平災害不生禍亂不作此之謂也夫天地間和氣與戾氣迭爲消長入其家入其國多和平之氣則家國之興盛可知也入其家入其國多乖戾之氣則國家之消滅可知也吾因人家鞭撻小兒之苦縱論及此以告當世之道德與政治家

演說稿

丁亥九月二十七日南洋大學講義

今日承諸君惠臨商賈舊學至爲忻慰鄙人以爲方今最要者氣節二字近撰聯語云人生惟有廉節重世

界須憑氣骨撐若氣骨不立如洪爐之鎔化非我徒也然氣節要有本源在拔本塞源非讀經不足以救國要知經典所載不外興養與教兩大端興養者何救民命是也興教者何正人心是也鄙人常兢兢以此六字爲教育宗旨孟子七篇爲旨今善國良藥一言以蔽之曰好善而已矣虞舜聞一善言見一善行若決江河沛然莫禦何等勇往樂正子將爲政孟子贊之曰其爲人也好善又曰好善優於天下善者何養民而已矣教民而已矣余前撰孝經及孟子救世兩編常嘆口瘖音不憚反復告誡幸勿視老生常談環顧歷屆畢業同學諸君不少奇才異能之士皆屬吾道干城切望以讀經救國一言廣播而推衍之則拯民命正人心之道在是矣或有笑我爲迂者可置之不理也有不爲也而後可以有爲禮記中儒行一篇實與斯旨隱相符合務宜熟讀蓋人必矢志廉潔俾良知不昧而後能有所展布故居今之世提倡明代王陽明先生之學尤爲當務之急諸君有志研究則處爲名儒出膺政治恢乎有餘裕矣鄙人所撰陽明學術發微以爲致良知之學可以救世知行合一之宗旨可以救國豪傑之士其亦有志於此乎夫藪粟布帛古代發明何嘗不陳舊而數千年來民生賴以飽煖者樂利而無窮蓋其用雖殊而其體不變可以三隅反矣吾輩都是國學中人須從根本着想方論到建設不然方寸之間見利忘義本心已昏昧豈能辦天下之大事乎宋蘇子有言辦天下之大事者立天下之大節者也願與諸君共勉之

氣節之說已如上所述請再暢發爲善之宗旨顏淵曰舜何人也予何人也有爲者亦若是所爲何事爲善而已矣然則人生當世爲善而已矣孟子言大舜有大焉善與人同此即周易大有同人二卦義也然則何以例言之按序卦傳與人同者物必歸焉故受之以大有有大者不可以盈故受之以謙有大而能謙必豫故受之以豫（豫樂也）孟子下文即言舍己從人樂取於人以爲善舍己必先克己無人已之隔閡則惟善是從矣近世人士不能適道者患在有己而無人耳下文又曰取諸人以爲善是與人爲善者也故君子莫

茹經堂文集六編目錄

卷二 經說類

周易天命學乙酉

周易保民學一乙酉

周易保民學二乙酉

周易積善學戊子

茹經堂文集六編
卷二目錄

茹經堂文集六編卷二

太倉唐文治蔚芝著

經說類

周易天命學乙四

居今世而論天命概斥之爲迷信矣庸人惑於其說於是一心不得其所而一身一家一國日卽於阽危悲夫吾請與之讀易孔子言五十以學易又言五十而知天命蓋易知天命之書也而實則心學也敬心卽以敬天也曷言乎爾先徵諸乾坤二卦大哉乾元至哉坤元衆善之長各正性命皆本心之德也乾元亨利貞天道流行不已君子法天以自強不息故文言傳曰先天而天弗違後天而奉天時聖人造命先天者也賢人立命後天者也先天者先知而先覺敬天之出於自然者也後天者雖知覺稍後能進於先天者也敬天之出於勉勵者也皆心學也坤之道敬以直內直者何直其內心也正位居體非靜以驗天心乎其他諸卦多有言天命者更推論之

泰否二卦爲世運之樞紐泰九三言无平不陂无往不復象曰天地際也謂天人相與之際深可畏也否九四有命无咎疇離祉朱子解命爲天命項氏安世周易玩辭謂泰九三於无咎之下言有禍否九四於无咎之下言疇離祉者二爻當天命之變正君子補過之時其說極精繫辭下傳曰君子安而不忘危存而不忘亡治而不忘亂是以身安而國家可保也引本卦五爻其亡其亡繫於苞桑惟常以亡爲慮故能兢兢業業傾否而不亡也是皆敬天命之效也

又微之大有卦大象傳曰君子以退惡揚善順天休命楊氏萬里誠齋易傳謂天討有罪吾過之以天天命

有德吾揚之以天所謂天工人代也敬天命之至也故上文曰自天佑之吉无不利萬事芸芸雜出而不窮智者辨所爲之善惡而已虞舜大智在隱惡揚善孟子贊之曰大舜有大焉善與人同舍己從人樂取於人以爲善是卽有同人二卦之義近曾文正誥誠門人以取人爲善與人爲善作爲程課每日紀之於冊隨時自省所謂順天休命者也

又微之无妄卦彖傳曰大亨以正天之命也其匪正有眚往天命不祐行矣哉蓋无妄與妄在一念轉移之間人性本善其初念多出於正一轉念而妄生矣如二爻之不耕而欲獲不菑而欲畀貪念也貪者天之所大惡天命不祐無往而可矣故凡人求往吉必先嚴納其貪念

又微之革鼎二卦彖傳曰革而當其悔乃亡天地革而四時成湯武革命順乎天而應乎人革之時大矣說程傳謂天下之事革之不得其道則反致弊害故革有悔之道惟革之至當則新舊之悔皆亡故惟湯武而後可以言革命詩長發篇曰帝命不違聖敬日躋武王之受丹書曰敬勝怠者吉皆敬天之學也鼎之大象傳曰君子以正位凝命定天命也詩所謂天保定爾亦孔之固韓詩外傳謂定仁義禮智信之德蓋卽敬天命之性也

又微之姤卦姤五爻曰以杞包瓜含章有隕自天象曰有隕自天志不舍命也其當文王與紂之事邪蓋杞木高而能庇蔭瓜田謂文王之德有隕自天謂文王囚羑里事也志不舍命當與臨卦二爻象傳未順命參看未順命者謂周已受天命而不違順之也不舍命者謂殷天命已絕而猶不舍之也聖人常欲以義理勝氣數無非救民於水火之中而已矣

以上易之言天命學皆以敬天爲宗旨試推證諸羣經堯舜之世後世稱爲大同堯則欽若昊天舜則勅天之命欽與勅皆敬也禹曰安汝止以昭受上帝天其申命用休安汝止卽敬也申命用休卽易之順天休命

也傳之於湯詩長發篇曰湯降不遲聖敬日躋又曰上帝是祇帝命式於九國敬天而上躋天德乃受帝命式於九國也敬之爲功大矣哉傳之文王詩大明篇曰有命自天命此文王維此文王小心翼翼昭事上帝聿懷多福美哉八百載之基業皆緝熙敬止純一不已之精神所貫澈也又傳之周公召公書召誥篇曰若生子罔不在厥初生自貽哲命哲命必謹之於生初者本經蒙卦所謂蒙以養正也有夏有殷服天命惟有歷年惟不敬厥德乃早墜厥命敬德者敬天命也故終之曰祈天永命此其垂戒不獨在成王且在萬世也周公昊天成命之詩曰成王不敢康夙夜基命宥密於緝熙單厥心單者殫之省文言敬其心也故曰肆其靖之敬之詩曰天惟顯思命不易哉陟降厥士日鑒在茲士者事也敬其心以敬其事敬天命之學也又傳之孔子曰君子畏天命小人不知天命而不畏也孟子傳其學達諸國曰畏天者保其國引詩畏天之威於時保之綜覽史書未有不畏天命而能保其國者也蕩之詩曰匪上帝不時殷不用舊雖無老成人尙有典刑曾是莫聽大命以傾又曰殷鑒不遠在夏后之世嗚呼侮老成廢典刑而傾大命豈特殷鑒而已哉蓋萬世之鑒云

周易保民學一乙四

禮記曰教也者民之寒暑也教不時則傷世故凡講經者必按時以立論非揣摹時尚也羣經之義靡所不包歷千古而常新講經之士應審察時事之最要者於經書中切實發揮之扶其心而執其權補其偏而救其弊今日民生困苦極矣講經者當以救民命爲宗旨而保民之義實始於周易吾特發明其義世之讀易者其亦有視民如傷之感乎

易義乾陽爲君坤陰爲民非特天尊地卑之義也蓋有統屬之道秩紘於是乎定繫辭傳曰陽卦多陰陰卦多陽其故何也陽卦奇陰卦耦

謂如震坎艮陽卦也而其卦體陽又僅一陽爻則有二其德行何也陽一君而

二民君子之道也陰二君而一民小人之道也陽謂文君 會又爲民說者謂一奇爲陽卦者是君之權出於一君爲主也一耦爲陰卦者是君之權出於二反若民爲主也疏釋極爲分明愚嘗謂後世人士多慕高尙厚祿皆有欲求爲君之心卽不得爲君亦各懷專制之意是故小人之道日長君子之道日消世焉得而不亂哉爰引諸卦剴切陳之

屯初爻象傳曰以貴下賤大得民也按此平等之說也繫辭傳曰卑高以陳貴賤位而後秩序正然貴之於賤者當常存平等之心而後可以得民若傲慢自恃動輒予智自雄以爲人莫己若馳詭之聲音顏色距人於千里之外則讒諂面諛之人日至國不可得而治矣況本卦當濟屯之時尤宜以謙恭待下爲主觀經文不僅曰得民而曰大得民蓋君與民爲一體衆志成城矣謙卦曰勞謙君子萬民服也又曰君子以稱物平施平施者平等也惟賤者對於貴者則不宜責以平等致啓陵上之漸耳

師大象傳曰地中有水師君子以容民畜衆按此江海之量也局量褊淺者不可以治民易大衆傳例皆以內外卦對勘爲義容民地象也畜衆水象也天下之相附相親者莫如地之與水水地爲比地水爲師故在上者之與民衆最爲切近先儒謂田以民分兵以賦出故當無事之時必制田里教樹畜使比閭族黨州鄉之民無不各得其養民既有養則所謂伍兩卒旅軍師之衆以爲他日折衝禦侮之用者皆畜於此可見寓兵於農之法千古不易教練要在平時也蠱大象傳曰山下有風蠱君子以振民育德按振有二義一爲振濟一爲振作二者相爲表裏蠱當窳敗之時風爲山阻民志迷惑必先有以振濟之次有以振作之而後民可離去蠱疾善治民者宜察其消息也故必自育其德而後能育民之德蒙卦傳曰君子以果行育德臨大象曰澤上有地臨君子以教思元窮容保民无疆按教必曰思非思無以爲教也保必曰容非容無以爲保也无窮者兌澤之深无疆者坤德之廣惟教思无窮而後能容保民无疆說者謂教思指學校而言容保民

指閭閻而言似過泥濶無逸篇曰古之人胥保惠胥教誨是容保之中亦寓教誨之道是故君子之所以教民者要在開民之智序卦傳曰臨者大也若自怙其智卽不得謂大矣孟子之論伊尹曰先知覺後知先覺覺後覺有志之士當先知先覺先天下而任教養之責

觀大象傳曰風行地上觀先王以省方觀民設教 按文王之教江漢汝濱皆被其化故稱先王周禮大師陳詩以觀民風蓋國風之詩所自始也抑又考殷人稱民爲生書盤庚篇所謂往哉生民生生自庸是也孟子曰得天下有道得其民斯得天下矣得其民有道得其心斯得民矣觀民者察民之心也五爻觀我生象曰觀我生觀民也謂觀周之民也爻觀其生象曰觀其生志未平也謂觀殷之頑民其志猶蠢然欲動也皆言殷之末世周之盛德也

周易保民學二乙四

剝上爻君子得輿小人剝廬象曰君子得輿民所載也小人剝廬終不可用也按輿者自下載上民載君也夏之少康漢之光武皆以得民心而興若處剝極之時又復做很明德以亂天常則民心離叛將無容身之地矣大象傳曰上以厚下安宅上不安其下則下必剝其上所謂水能載舟亦能覆舟也

頤象傳曰頤貞吉養正則吉也天地養萬物聖人養賢以及萬民頤之時大矣哉按天地之道在養育萬物養育萬物之道正而已矣聖人作養人才與之共天位食天祿俾施澤於天下養賢以及萬民養賢卽所以養萬民也夫天地之中品物之繁非養則不生孟子曰以善養人然後能服天下文王制田里樹樹畜使民各得所養豈不大哉孟子曰堯舜之仁不徧愛人急親賢也堯舜豈不愛人哉親賢正所以徧愛人也

益上爻莫益之或擊之立心勿恆凶繫辭下傳曰君子安其身而後動異其心而後語定其交而後求君子脩此三者故全也危以動則民不與也懼以語則民不應也無交而求則民不與也莫之與則傷之者至矣

易曰莫益之或擊之立心勿恆凶按安其身易其心乃修身正心之事定其交乃與國人交之事危以動者若齊宜三佞人滿前而猶欲辟土地朝秦楚也懼以語者非己心有所戒懼乃威懼其民而壓迫之也无交而求謂求益不已惟搜括民財也莫益之而或擊之則身家性命與之俱糜矣立心勿恆者朝令夕更機械變詐欺罔其民則凶于而國矣是故欲全其身必愛民之生惜民之命民之性命即己之性命也

姤四爻包无魚起凶象曰无魚之凶遠民也按魚民衆也包无魚者欲牢籠民而民遠去也孟子齊宣王論燕國之事曰燕虐其民王往而征之民以爲將拯己於水火之中也如水益深如火益熱亦運而已矣運者轉而之他國也是爲包无魚之象大學之道首在親民於傳有之民可近不可下越句踐之報吳亦常親近其民蓋惟近民而後能知民之疾苦察民之情僞而默喻民心之向背也後世堂高康遠與民隔膜臨急難之時欲民之盡心力難矣哉

井大象傳曰木上有水井君子以勞民勸相按舊時解勞民者如巽風之布號令勸相者如火水之相灌輸似相字當作平聲讀本卦彖辭曰往來井井彖傳曰井養而不窮也繫辭傳曰井居其所而遷蓋井以養人而民用之多少各得其分量而止故傳又曰井以辨義義者各適其宜也放勳曰勞之來之使自得之又從而振德之正合本卦之象振德者卽疊卦傳所謂振民育德也是故君子之爲治也提倡之使勤勞其事而不加以干涉因民之所利利之而不庸

繫辭下傳黃帝堯舜氏作通其變使民不倦神而化之使民宜之易窮則變變則通通則久是以自天祐之吉無不利按窮變通久乃周易消息之大義古今中外政治之綱維也禮記王制篇曰中國戎夷五方之民皆有性也不可推移脩其教不易其俗齊其政不易其宜實與此經相表裏化而裁之存乎變往來不窮謂之通至誠無息則久矣民生異俗衣冠異制言語異音文字異形器用異宜各有攸殊必審察其所宜而變

通之專守舊者非也專喜新者亦非也因乎時而已矣堯舜而後厥惟孔子之立道綏勸孟子所謂過化存神爲得乾坤易簡之道本經言政治之卦上經爲否泰下經爲損益損益得其宜則治不得其宜則亂益之家傳曰損上益下民說无疆後世之行政者欲知窮變通久之義毋損下以益上斯可矣

至推論保民之道以孟子爲尤詳攷梁惠王篇自論與民偕樂民欲偕亡始以下論施仁政於民民字幾於更俟難數而其尤精要者在言保民而王莫之能禦推及於不忍之心蓋惟不忍於其民而後能保民以保國卽易所謂身安而國家可保也其下言與民同樂推及於樂以天下憂以天下易所謂吉凶與民同患也離婁篇多言政治其首章曰聖人既竭心思焉繼之以不忍人之政而仁覆天下嗚呼何其愛民之深也愛民乃可以救國後世求治者吾請與之研保民學

周易積善學戊子

古今中外國家爲治之道善氣興惡氣消長而已善氣盛則存且興惡氣盛則廢且亡理有必然不待智者而決孟子當戰國之世目擊生民之顛沛流離慨然嘆曰孳孳爲善者舜之徒又曰仁義忠信樂善不倦此天爵也夫善不善之念非由外鑠我也其幾藏於一心而根於所積君子之道慎於所積而已願積善之說權輿於周易餘慶餘殃垂訓萬世嗚呼可懼哉近世民生憔悴已極有志者扼腕興嘆不知此正爲善救民不可失之機會急起直追猶可以爲善國失此不圖抑將不可收拾矣爰發明周易積善之義著之於篇以說學者

乾卦文言傳元者善之長也又曰君子體仁足以長人

按在天曰元亨利貞在人曰仁義禮智元者善之長凡人平且意念之始無有不善所謂良知之發性善之明徵也故前明王陽明先生之教曰致良知曰體仁足以長人可見體之於心善念有所虧缺者

即不足以爲君德不足以長人

坤卦文言傳曰積善之家必餘慶積不善之家必餘殃

按易爲教人積善之書天道無私善慶惡殃以所感之氣而致曰必有者言確定不易之理也而世人以爲迷信氣數誤矣數必由理而推先大夫常訓文治曰三十年爲一世惟積善可以長久

大有卦彖傳曰君子以遏惡揚善順天休命

按虞舜之大智不過隱惡而揚善善者天之所命也顏子曰舜何人也予何人也有爲者亦若是言爲善也文治學易最喜讀大有卦其二爻曰大車以載象傳曰積中不敗喻積善之多也其上爻曰自天祐之吉无不利繫辭傳三引此爻可見積善者天祐之矣

繫辭傳曰一陰一陽之謂道繼之者善也成之者性也

按宋儒解此節謂繼善在成性之先後人斥其空虛不知陰陽善氣也天地間綿延不絕者無非善氣人體而成之則爲性說卦傳曰和順於道德而理於義窮理盡性乃所以爲道德而道德必基於和順繫辭傳曰善不積不足以成名惡不積不足以滅身小人以小善爲无益而弗爲也以小惡爲无傷而弗去也故惡積而不可掩罪大而不可解易曰何校滅耳凶

按聖人言君子居其室出其言善則千里之外應之出其言不善則千里之外違之言行君子之樞機樞機之發榮辱之主也言行君子之所以動天地也可不慎乎聖人勸善如此而善幾稍縱即逝故論語曰見善如不及先儒嘗集聯語云言行動天地孝弟通神明後學可不勉哉

茹經堂文集六編目錄

卷三 贈序壽序類 書類

送周予同先生赴台灣序乙酉

贈蔡君伯崙序丙戌

贈吳生常燕序丁亥

豫縣杭銘渠先生七十壽序乙酉

無錫楊味寰先生八十壽序

武進謝桂堂先生八十壽序丁亥

寶山王鯉庭先生八十壽序乙酉

慈谿秦潤卿先生七十壽序丙戌

定海劉鴻生先生六十壽序丁亥

無錫宗弟婦華太夫人八十壽序丁亥

茹經室文集六編

卷三 目錄

二 茹經室叢書

茹經堂文集六編卷三

贈序書序類 書類

太倉唐文治蔚芝著

送周予同先生赴台灣序乙酉

台灣地處閩省之東相隔一水有唇齒相依之勢爲軍事政治陝區從前士大夫議改設行省而行政卒未收指臂之效清光緒中葉我師敗於日本合肥李相國主持和議訂約馬關遂與朝鮮先後割讓維時清議咸非之余亦爲悲憤不怡者累數月蓋相國雖有不得已之苦衷然一敗再敗中原震撼固不得辭其咎也自是厥後台地淪陷者垂六十年乙酉歲我國師戰勝河山復舊朝頒新政士溫故業執友浙江瑞安周予同先生奉政府命派赴台灣任文史專科學校校長余追思往事忻喜特甚於予同先生之行也序以送之曰閩省學派倡自紫陽訖於前清之初李文貞公光地闡明性理大扇宗風康熙時欽定諸經傳說彙纂與折中義疏等皆出其手擬臺進獻之於是文學遞傳一時春誦夏弦達於閭巷儒林碩彥雍容揄揚揆芬擣藻方領矩步罔有踰越範圍者可謂盛矣洎乎近世士或溺於卑淺之說俚俗庸庸不克深造四書羣經遂束之高閣而不讀世道淪胥率由於此又何衰也非有人焉盡力以振興之斯文掃地無餘不知伊於胡底矣予同先生博學多聞敦善不怠恂恂乎君子人也曩歲在國學專修學校教授諸生宗旨壹出於純正與余心心相印而其說見之卓越羣倫廣博無津涯遠出余上宋張橫渠先生有言爲天地立心爲生民立命爲往聖繼絕學爲萬世開太平蓋吾人講學固以後世爲性以百姓爲命非拘墟於一時也予同先生此行任講學之職實負傳道之功古語曰莫爲之前雖美弗彰莫爲之後雖美弗傳閩學淵源失傳久矣吾常謂

欲淑人心必明心理而欲明性理非昌明國學不爲功理學明則人心善而國運以盛理學晦則人心昧而國運亦衰徵諸史書毫髮不爽非虛言也先生行矣異時聲教宏敷藝林與誦台地文化行將與吾蘇諸省相頡頏口碑所載咸曰此周先生開山之力也其盛矣夫其吾校之榮也夫其邦國之光也夫是行也何生以聽相隨往何生品詣誠樸爲吾門高弟得從此名師昕夕受教必有精進而無疆者更富拭目以俟之

贈蔡君伯崙序丙戌

蔡君伯崙台灣人也僑居海上有年有志國學時詢余讀書門徑丙戌孟夏來告曰吾離台若干載矣親戚朋友音問遼隔今將歸探詢請先生一言以爲別余維台灣本隸中國版圖甲午之役唐維卿先生景崧將以台灣獨立爲日本兵所敗迫和議告成當事者遂以其地割讓於日誠大可痛心事也邇者國軍告捷還我河山而蔡君當滬地陷落時絕不與日人相往還其氣節屹然可貴矣而於斯時反台重觀太平之象其忻喜愉快爲何如也惟余更有進者欲與中國非正人心不爲功而欲正人心非讀經籍不爲功台地風氣初開驟語以筆經要點恐程度或有未逮則惟有以孝經論孟啓發其良知孝經者六藝之綱領也論語者修己治人之根柢也孟子當戰國擾攘之時盱衡世變提倡仁義七篇之書非但可以正邦家抑且可以救世界台民歸將中土之心久而彌篤能以此三經爲先路之導而進求之則通經救國之效胥寓於是矣蔡君勉乎哉豪傑之士當開通風氣不當隨風氣爲轉移然則啓台地之民智養台地之民德其責任當有攸屬矣蔡君勉乎哉

贈吳生常燕序丁亥

當有明正德嘉靖之時政治萎靡不振王文成公陽明起而振之而明祚於以綿延當時清咸豐同治之交政治窳敗成風曾文正公濂生出而挽之而清社於以重光此非古所謂三不朽者耶惟文正有言不朽之

業立功者乘時會而興惟立德立言則修之在己不隨世運爲轉移也方今之世世界晦蒙亦已極矣民生憔悴亦已甚矣豈無人起而振之哉余嘗撰聯勉後學云人生惟有廉節重世界須憑氣骨撐有氣骨而文章隨之文成文正兩公豈非其選哉文正論文推崇桐城派特至觀其所爲歐陽生文集序可見宗旨所在其述桐城姚先生之言曰必義理爲質而後文有所附考據有所歸至哉言乎蓋洞明乎性理之奧則文章鍊意鍊局鍊氣鍊詞之法不煩言而解矣及門合肥吳生常蕙姚氏之姻親篤守桐城派精進不已自吳擘甫先生而後傳人其在茲乎抑余所嘉獎吳生者尤在於家庭之孝行孝經云夫孝德之本也教之所由生也近陳蘭浦先生謂學字从孝教字亦从孝吾人生天地間所以爲學爲教者孝而已矣吳生天性純孝當合肥干戈擾攘之秋問關跋涉迎其母太夫人出險來滬精誠之至可謂孝也已孟子論良知之學曰親親仁也敬長義也無他達之天下也吳生能本斯旨秉推恩以保四海之訓與同志同學研究孝經因實愛其身推及於不傷民生身體髮膚良知充浹於宇宙則吾中國庶有豸乎殷元聖自任天下之重言非異人也余近又撰聯云老吾老及人老幼吾幼及人幼天下漏由己漏天下飢由己飢文成文正前型不遠吳生其勉之哉

歙縣杭銘渠先生七十壽序乙酉

小戴禮記大學篇曰君子不出家而成教於國又曰一家仁一國興仁一家讓一國興讓古之教育家所以大過人者誇推其所爲而已余常懸斯詣求之於同志之士蓋憂憂乎不易觀柔兆奄茂之歲且月四日折逢歙縣銘渠杭先生七十攬揆良辰哲嗣立武立慈兩君承歡預祝將具醴醪酌酒以甘之鏗笙簧絲竹以樂之而立慈畢業於國學專修學校爲余及門弟子慇懃來徵壽言余雖身陋誼不獲辭且立武君現任教育部長尤望其推家教以爲國教也謹按先生字銘渠安徽歙縣籍天性誠篤幼時里中豪猾頗橫恣一蹶

考某某公命——先生習舉子業期於奮志天衢振作風尚先生奉命惟謹晝夜攻讀不遑旋丁內艱——先生奉養兩代孀慈溫靖定省必誠必敬力排諸梗阻三試三冠軍遂補博士弟子踰年食鳳饋未幾科舉廢——先生益貧乏以硯田所入供白華潔養之資辛亥政變後教育事業淒廢——先生迺鳩合同志創設學校惟以親老恐遠先聖遠遊之戒爰上侍護堂下培蘭玉奈屢空極窘嘗以一豈腐乾判四分以佐饌其堅苦卓絕有如此者豈意教育孳孽不倦嘗編史地等歌訣挈子女入校時緣道歌吟或笑其迂弗顧也嘗謂立武曰昔曾文正善果種於前清末造諸賢今余之善果當種於汝身矣又設通俗夜校約各教員輪值督課或遇夜黑風狂時方食遙聞鐘聲即吐舖起曰吾恐教員不能到校致失社會信仰且言且急趨以是得胃病餘介江淮之間用武地也民國十六年前先生方辦教育兼長紅十字會分會洎國軍北伐因清黨退金陵直魯軍將先生家肆以洗劫以其屋爲馬廐時先生方聯合蘇皖士紳辦皖北難民收容所不暇爲身家計也迨魯軍敗竄伏莽滋興閭閻不得安堵先生奔走乞師不遑休憩復以立武等君留學英倫轉而留美資斧行將不繼乃摒擋稱貸挾貲間道走南京匯以濟用歸而胃疾增劇時局元黃日寇內憂驚霆不測鐵鳥盤空先生慨然曰吾不可先去以爲民望時金陵已陷不克西行伏戎林莽時遭洗劫寇復焚其寓廬金君延生先生之令坦也時長安徽省立中學亦以徙校較遲轉輾流離率眷顛沛避難出入蹙蹙之境撥茹菽藜藿之食其辛苦有難以言罄者天佑善人民國廿七年始脫險至滬雖世離幸免而窳瓠屢空淪淪接濟皆以道遠中斷先生曰吾處境雖困而志不可屈勞筋骨餓體膚此其時矣爰偕女某某往返二十里之周家橋負米以爲炊某某嘗爭取老父所負米獨肩之先生不欲分其半力負以行途中口占詩句云自幸年來腰脚健猶能負米養兒孫遇相識則欣然告之以爲笑樂又曰素貧賤行乎貧賤吾際此環境富且貴焉恥也疏食負米樂道安命是吾之天職也平居恆太息自恨不能效健兒報國輒曰此生誤我我誤此生可見

先生抱負之不凡矣。偶聞人間爭名奪利事，愀然曰：身且非吾有，何有於名利乎？其淡泊明志，又有如此者。性好讀書，不釋卷口，不絕吟所著詩文，不自料簡隨手輒散去。每日出門散步，一小時呼吸空氣，歷寒暑以爲常。淮南子曰：食氣者神明而壽，豈不信與？近年子立武貴榮膺教育部長，先生勉以謙挹，勸昌明文化，用是立武立慈，兩君均能先意承志。玉昆金友，郁郁彬彬，極家庭之樂事矣。而余則更有進焉者。回憶三十年前，余遊歷歐美各邦，雖行政設施不同，靡不兢兢焉自保其國粹，以爲立國之本。又嘗聞先哲嚴防幼穉，先生與英使朱爾典晤，譚以吾國險象環生，秋歎太息。朱謂中國有寶書發而讀之，躬行而實踐之，何憂邦之杌隕。惟歐洲倘有戰事，恐一發難收，耳嚴詢以何謂寶書。朱云：孔孟諸經是矣。旣而歐戰果興，其言良驗。然則振興國粹，非以讀經爲先務之急乎？孝經爲羣經鈐轄論語，載修己治人之方。孟子生戰國時，提倡仁義以救人心，曰：未有仁而遺其親孝也，未有義而後其君忠也。先生膠庠著舊，碩學通儒，而立武部長體用兼資，往者柱願，寓廬以病體有失，倒屣未獲，面陳然審時度勢，非讀經不能救國。立武部長提倡經術發一綫之曙光，收宏通之效果，儒林之彥僉鼓舞奮興，頌曰：此太翁本家教，以爲國教也。用敢道其所期，且詠葩經以爲頌，曰：眉壽保魯，復周公之宇，俾昌而熾，俾壽而臧。躋彼公堂，稱彼兕觥，萬壽无疆。方今復宇之時，正當先生稱慶之日，普天同樂，令聞令望，南山臺萊中邦，砥柱豈弟君子，引翼維持，先生聞之，其亦適然晉一觴乎？爰序而紀之，以爲百歲期頤之預祝焉。

無錫楊味雲先生八十壽序

歲在強圉大淵獻，陞月吉日，忻逢吾執友味雲楊先生八秩，攬揆良辰，廣勸廣豐，廣利公司介同鄉友人，願君康伯來徵文於時，春酒初熟，祥風斯扇，戚戚僚友，踰踰濟濟，羣萃華堂，吉語駢蕃，同介壽祉，爰有執爵而進者，曰：先生自幼天賦英邁，萬卷胸羅，發爲瑰琦，炳蔚操不律，灑灑洋洋，數千百言，倚馬立就，擷羣經之奧

奕雄司馬之高文於學既無不關於文則諸體咸備歷金山登玉田諸賢頰首莫敢與抗讀雲在山房類稿諸鉅著豈非文章家之淵藪乎願獻一觴以爲祝又有執爵而進者曰先生提倡棉業學畫經營衣被羣黎罔有涯涘其言曰欲北方之民無飢莫如興農田欲北方之民無寒莫如興紡織於是偕周緝之總長創設華新紗廠於津市繼復高掌遠躡推賢退方獨力推設唐山衛輝等處數稔之間風起雲湧天津紡織廠成立者六家而晉豫遼魯風聲所播並時奮興於是日光一色雲錦七襄惠逮乎窮簷恩周乎挾纊僉爾而稱曰此皆無錫楊公之賜也而先生退然謙抑絕不居功此非盛德之至者乎願再獻一觴以爲祝於是又有執爵而進者曰人皆知先生爲經濟家實業家而不知其政績之卓著也先生殫精經世之學舉凡田賦鹽漕幣制農田水利諸大政靡不鉤稽攷覈握其綱維胥手錄數十萬言哀然成帙出而施諸實政初由內閣中書攷取商部敕育周尙書倚畀特隆凡部中宏文典冊悉出先生手定旋隨使節赴泰東西各國暨南洋羣島參贊機宜象寄譯鞫人懷其德比歸擢度史部參議方是時當軸者銳意變法廓清積弊遂任先生爲清理財政總辦政體改變後任長蘆鹽運使山東財政應旋內調爲財政部次長行政登秉大公不涉苛細裁減各行省外銷款凡法所不當取者一切禁斷之而於疆吏鹽事歲入養廉豐其祿或疑其歧視先生曰既謂之養廉矣必使所入足以養而後可責以廉議遽定河工經費歲出其鉅有議盡罷之者先生持不可曰國家奈何吝此數十萬金不爲末弁微員留生計耶議者以爲名論此非政治之要乎願再獻一觴以爲祝於是余迺翕然執爵而晉頌曰義經大義消息因時中庸準易亦以溥博時出爲旨先生數歷中外所以因應咸宜者善觀乎盈虛消長之樞機也至於經綸萬彙綱紀四方惟在時措得宜而已余與同官農工商部時察其安止從容德性堅定不競不綌不震不動知其深造自得涵養有素後聞其服官運使財部時進退取與事上洩下舉以曾文正爲法膏考文公與李申甫先生書謂修己治人之道當以取人爲善與

人爲善兩事每日書之於冊自省所行善果若何其赴善言善行宜沛然莫之能禦邇者鴻嗷於野魚潛於淵屋烏無止舍之瞻銀鹿有走險之象萬姓睽睽望治奚翅飢渴先生悲憫素蘊體用兼賅雖宵修葺管社山莊有歸隱率先之志而余深望其濟世救民出膺霖雨蒼生之寄凡在同志翕然雲從閣澤偏乎寰區黎庶登於衽席而其子姓振振俾昌而熾式穀受祿罄無不宜豈不懿歟衆皆曰懋哉懋哉退而敘紀其說以爲爾日舉觴之侑焉

武進謝桂堂先生八十壽序丁亥

自六朝譜牒之學盛宋元以來競尙家世舉凡一姓之勳勞閱道學文章靡不詳焉詩崧高篇曰子邑子謝南國是式是爲謝氏錫土姓之權輿迨至南宋時有大儒出諱良佐字顯道後世稱程門四先生之一余讀宋史道學傳輒嚮往不置其所學先在一矜字伊川先生亟獎許之以爲能切問近思召對時因微宗意志不誠出爲監西京竹木場事蓋其學問深遠氣節高尚若此歲躋丁亥某月之吉忻逢武進桂堂謝先生暨德配黃夫人八秩雙壽良辰其哲嗣彬仁命其子紹芳紹佐來請曰吾祖暨祖母眉壽燕喜吾父將奉觴稱慶而吾祖戒以勿效世俗所爲未敢鋪張欲求先生爲文以彰榮寵紹芳紹佐余及門弟子也余因其爲顯道先生後裔爰詢喬遷武進家世益歎謝氏之源遠流長先生伉儷之康彊大叢爲有餘也按宋南渡後謝氏始遷祖彥成公來尉武進卜居邑西謝家莊十四傳至振瀆公移居邑東橫林鎮遂爲橫林人六世祖智昆公五世祖母金太夫人皆享上壽抱曾孫祖盈瀆公享壽八十有五考榮卓公享壽七十有七均保篤厚長者有四世同堂之盛今先生亦復孫曾繞膝奕世相承故昆陵錢名山先生嘗爲稱頌曰七代以來曾祖曾孫同堂者五世人間壽考之祥子孫之樂未有如謝氏者先生篤親誼敦故舊持己節儉待人和煦未嘗有疾言遽色介弟錫堂先生年近古稀相對怡怡友于彌擊茲當杖朝之年而步履與強艾時無異夫

人秉性恬澹不尙聲華侍上以謹御下以寬處鄉鄰妯娌姑嫂間雍雍和睦蓮豆靜嘉與先生尤相敬如賓焉竊嘗以先生之德行與顯道先生相衡先生之涵養中和卽顯道先生不矜不伐之純詣也然諾不欺卽顯道先生出居竹木場之節槩也其善承先澤篤守彝訓洵無愧矣且夫家庭之瑞和氣而已先生伉儷白首齊眉冲和洋溢非周易所謂保合太和者歟宜聖云積善之家必有所餘慶又云善不積不足以成名先生暨夫人閨門積善充己飢已溺之懷宏立人達人之願其遐齡綬福庸有艾敷矧居今之世實爲善大好時機余於是敘先生之世澤與其好德之善以爲百歲期頤之預祝且爲彬仁賀爲紹芳紹佐等昆季勉焉爰集葩經以爲頌曰南山有萊北山有萊復我邦族予還歸哉迺慶載歌曰魯侯燕喜令妻壽母純嘏而常蒲祿而康俾爾熾而昌俾爾壽而臧子孫繩繩萬壽无疆

寶山王鯉庭先生八十壽序乙酉

歲躔乙酉五月二十七日忻逢王鯉庭先生暨德配唐夫人八秩雙壽良辰其哲嗣德昌德盛德慶將匄合親朋僚友陳設酒醴笙簧以極一日之樂先生曰止茲者蚩霧橫空戈鋌滿地鴻噉於野魚潛在淵仁人君子蒿目時艱方奔走救濟之不暇其何敢稱慶乎德昌不獲已謀諸乃壻孫君壽熙徵序於余以資光寵余維寶山羅陽邨爲余太屬同鄉而壽熙又余及門高弟也誼不獲辭爰詳詢先生之事賞壽熙之言曰熙自館甥王氏以來略稔其世系太岳炳揚先生設藥肆爲業宅心仁厚好善不倦慎交遊喜施與鄉人之貧困者不取值輒給以良藥當庚申之變有匪徒煽亂稱小刀會披猖日甚先生爲出謀發慮密定民匪標記隨邑父老殲厥渠魁城賴以全遂以軍功得褒獎五品銜事邑志篤生外舅鯉庭先生常以家庭積善爲訓外舅自幼事親孝敬唯諾無違維數奇五應院試不獲選僅得補廕生人咸惜之而外舅纖毫介於懷爲童子師兼岐黃術習女科兢兢業業從事所入豐嗇弗較也嘗偕季弟合資設肆鬻藥顏曰生生堂取利濟同胞

之意越五載不幸抱季弟令原之痛藥肆遂輟業而外舅泊如也居恆嗜飲舉數觥不醉願愛惜物力自奉
彌儉雅好吟詠晚歲結詩酒會名曰小羅浮社羅陽有古剎植老梅數十本外舅與諸吟侶嘯詠其間可謂
雅人勝致矣壽熙所述如此余維老氏道德經有言天道法自然君循性而行無入而不自得非所謂
任天而動者耶非所謂動合自然者耶願先生雖率真而行不問生產而實勤於職分中年嘗襄辦象山崑
山兩縣清丈田地事宜孜孜罔懈克著勞勳俾此疆爾界無侵蝕之虞頗見稱於時嘗任高郵厘局事目睹
浮收不願同流合污未一月亟解職可謂自潔其身矣德配唐夫人家世業商年某某歲來歸鯉庭先生夫
人謹敬和藹待人以厚御下以誠某某歲室家不造忽罹火災然而鯉庭先生秉心高尚平居不屑屑理瑣
事以夫人鍼黹所入藉佐饔飧穿針洞窠十指爲流血教育子女費時伙益其乏至向平願遂慈愛諸婦無
異所生詩曰何有何無無勉求之禮曰子婦有勤勞之事甯數休之夫人其嫻詩禮之教矣宜其家庭昌熾
未有艾也夫琴瑟偕老至八十而齊眉協慶豈非人間世所難能者乎由是八十以至九十七躋期頤之壽
可預祝也先生誕育滋蕃長子德昌績學懋行畢業於龍門師範學校旋任縣視學教育局長令聞令望洵
無愧色其餘諸子亦克世其家余因乃壻壽熙之請爰敘述以貽之以爲稱觴之侑焉

慈谿秦潤卿先生七十壽序丙戌

粵維丙戌之歲八月吉日忻逢慈谿潤卿秦先生德配周夫人雙慶良辰時則秋月團圓祥風初扇錢業公
會諸同人僉謀具酒醴笙簧祝先生開八大慶且屬余及門宗姪堯夫來徵壽言余與先生素有知交之雅
而其哲嗣履直又曾畢業於余創辦國學專修學校誼莫容辭蓋余之欽仰先生者在商而有士行歷考其
士行之實在不驕不吝樂善不倦而又不忘寒素家風先生幼年喜讀書十五歲由表叔林韶齋先生介紹
入協源錢莊習業奉沈荔泉先生爲師先生登意習書算不染紛華月俸僅三百緡年終僅得津貼八圓悉

數奉母十七歲丁父憂擗踊盡禮二十二歲周夫人來歸三十二歲協源改名豫源經理羅樾卿先生改任督理舉先生任經理經營十載信用懋著迨至民國八年豫源又易名福源蓋肇基於蘇州程臥雲先生先生服務是莊歷五十餘年與程氏子孫曾元四世爲賓主恆以商業道德相勗勉實非尋常貿易家所能幾及也余更有佩仰先生者先生自幼貧苦深知社會清寒子弟求學萬艱爰與同志謀金創普迪學會設普通義務小學於梓鄉恢張二校就學者千餘人亂後仍復舊觀非異人任也先生本任國專校董回憶事變以前仍至錫山飯開議論兢兢以讀經救國爲言余甚聽之至於歷任上海總商會會長銀行董事會會長中央銀行監事會監事勸募救國公債委員義聲丕著無遠弗屆徐幹中論曰有聲聞之壽有行仁之壽其在斯乎敢晉一觴以爲壽

定海劉鴻生先生六十壽序丁亥

當前清光緒末葉余暫攝農工商部總長頗思擴長駕遠馭之規收惠工通商之效延攬實業人才藉資臂助其時尚未識鴻生先生之名也近數年來避地海墘則令聞令望洋洋盈耳丁亥季春吉日忻逢鴻生先生六十攬揆之辰感鄙僚友僉謀爲先生壽及門白君心齋將諸同人意來徵壽文用以換張實業界榮光或曰先生事業首在水泥廠按光緒八年英商在開平礦務局創辦水泥廠維時風氣胚胎營業未擬泊十六年收歸中國三十一年全歸商股易名啓新公司先生於民國十三年在龍華開始籌辦製造水泥廠採石聚土搏填磨礱施諸土木工程則防禦鞏固用以橋梁道路則取材殷繁做陶復陶穴之功成可大可久之業此非宏遠之學畫歟或曰先生事業又在毛紡織廠在昔左文襄公總制陝甘見微知著特在蘭州創設機器毛織工廠後代羣推爲鼻祖先生遠宗其法於是有章華毛織廠之偉舉與北方清河製泥廠聯新黨和尤可佩者抗戰期中在重慶則建中國毛紡織廠政府以其締造艱辛特予褒獎以示優崇在蘭州

則與政府合辦西北巨資織廠洗毛機構工作殷繁而交通行首先基本投資此非衣被之新猷歟或曰先生事業又在火柴廠考火柴之製瑞典稱雄而中國悠久火柴公司曰上海榮昌曰重慶森昌泰曰華北丹鳳集大成者惟先生在蘇創立之鴻生廠傳所謂名從主人誌慶也尤可佩者抗戰期間政府洞悉企業鴻圖非先生莫屬於是合組後方火柴專賣公司聘先生爲總經理具宏毅之魄力培元氣於閭閻宏濟艱難獨一無二貴陽昆明擴充無限取正位乎離明協司恒之陽燧備哉燦爛此非盛世之庶明歟或曰先生事業又在招商局務前清同治十一年李文忠公撥國幣二十萬緡商股十萬兩成立招商局意至善也然利之所在人爭趨之於是弊竇萌生負債滋重先生摧陷而廓清之爬梳櫛垢增造海元海亨海利海貞四巨輪又增造快輪用資運送攬江海之商樞挽利權於東亞天產軋茁環貨雲屯此非勞來輔翼之宏模歟或曰先生事業又在煤礦開採煤礦公司歷史頗久先生嫻熟英語締交外賓極夥比時英商稔其才具優長爰介爲經紀先生慨然曰吾常聞國中無煤鐵礦決不能造於富強綜覽吾國惟開採差堪發展今日銷路之所以不廣者在運輸之阻滯迺殫精竭慮闢通六十餘大埠五十餘堆棧高掌遠躋自推銷蘇錫常鎮等處暨及於溇陽先生旣雄於貲財復得介弟吉生君毅力以左右之先後創辦柳江與華東煤礦公司暨中華煤球廠與特製機器煤球鼓萬物之聚鑰范五金於鑪錘此非利用厚生之標幟歟余迺進而昌言曰是數說者洵實業界之初基抑未足盡先生之妙用也夫登泰岱者非立竿而測景莫知其峯之崔巍也泛江海者非據棧以準平不知其波之浩淼也論語贊端木子貨殖億則屢中蓋熟稔商情而善審幾也夫審幾非投機之謂易傳有言利物足以和義先生惟志在濟人利物不自私其利故能擴天下之美利是以攸往咸宜試徵諸事實以教育言之先生習齡肄業約翰大學備嘗甘苦爰出貲創立定海中學及女子中學教崇誠樸以樹風聲迄今父老稱道弗衰餘如培植梓鄉清寒子弟賴以有成者不可殫紀約翰特贈名譽

法律博士學位以彰其聲聞又創設定海醫院及時濟醫院秉性仁慈自遐達遐尤可敬者政府嘉先生痼疾在抱飢渴情殷三十四年勝利以來卽任命先生爲行政院善後救濟總署上海分署署長三十五年至本年先生又兼任總署執行長蘇鴻喙於中澤止屋烏於平林大澤之溥未有涯涘仁者必壽斯之謂歟衆咸曰懋哉於是相與詠歌葩經以爲頌曰俾昌而熾俾壽而臧又曰朋酒斯饗躋彼公堂稱彼兕觥萬壽无疆

無錫宗弟婦華太夫人八十壽序丁亥

粵維歲躋丁亥季夏之月朔日忻逢宗弟婦華太夫人八秩設晚良辰姪春介涖源愍愍然來請序於余曰世俗鋪張緣飾之習非高堂所願敢請燕許文章以彰靈史余維乾坤之所以不息世道之所以常存者善氣綿延而已矣善氣之在天下正目而視之不可得而見也傾耳而聽之不可得而聞也其善機蘊於一心扶輿旁薄蒸爲德澤其善因善果則收效於子孫壽考富貴永永而無涯涘吾族先伯子良公隲行善事孜孜不倦邑父老至今稱之弗衰文治於庚午歲曾撰記文以表章之太夫人熟聞彝訓保合太和而近歲以來值東夷內燬滿目瘡痍鴻嗷而鮮戢居烏啼而瞻靡屋太夫人怒焉傷之曰此正爲善時機其可失乎於是無食者食之無衣者衣之無居者居之患澤逮於鄉閭恩施遠乎遐邇如文治故鄉太倉素稱瘠苦亦荷累加踴恤其他各省靡論水旱凶荒兵燹疾疫罔不悉力援救虛屢不辭中庸云天地之大人猶有憾惟在吾人有以弭之爲人生之天職太夫人其知此義矣抑聞太夫人淑德懿行其本源蓋自有在太夫人系出錫邑東亭華氏厥考象賢公次女妣楊太夫人閨閱名門世有積德太夫人天性溫厚而處事果毅及笄來歸宗弟鏡遠君上事椿蔭下和妯娌一門之內雍雍和也洎乎暮年姑余太夫人年高多病太夫人因避難居鄉必隨時挈舟歸省依依色養十餘稔如一日而母氏楊太夫人年事亦高太夫人孺慕尤殷迺養

居處昏定晨省侍奉歷二十載此其孝行根莖天性有如此者鏡遠君語練金融盱衡時局以爲懸運貨殖當以滙上爲中樞維時同鄉周舜卿創設信成銀行請君主任會計君更兼掌路局財務昕夕不遑太夫人恪代子職夙夜罔懈俾君無內顧憂戚鄙戚服其才無何遺不造喬木遽摧厲飛戩翠瑤環珥蘭折其芽鏡遠君任事繁劇加以積憂成疾不幸遽歸道山太夫人憐踊欲絕顧念遺孤岷春甫在襁褓泣然曰吾上有衰姑下遺稚子不得不勉忍須臾矣於是飲冰茹蘗垂三十年其松柏貞操有如此者易節卦稱苦節又稱甘節吉天道人事由苦而甘乃必然之理宜乎岷春姪驕驕發軔騰達天衢紹封詐之家風潔白華之羞志尤爲近世所難能也溯自鏡遠君逝世後其清風高節無一瓦之覆一壠之殖孤苦伶仃無殊宋之歐母太夫人感來日大難深維村居較爲簡約敦請於姑余太夫人遷居於東鄉嚴鎮別業料量米鹽計入爲出竹頭木屑靡不珍儲衣不重裘食無彘味其勤勞儉德更有如此者岷春幼頗好弄太夫人緣料裝嚴宵訓之曰汝父所遺惟汝所望於汝者其大惟望汝仰體親心勉爲賢人君子否則其母我及岷春登仕版又無忝所生岷春窮窮受訓於是出佐政權退營商業一介無妄取遐邇咸欽家法蓋可以風世矣綜太夫人之德行曰孝曰節曰儉曰勤而其訓子之真切則尤出於慈又秉聖經之教見善如不及源源施濟如川之流魯頌之詩曰復周公之宇壽母燕喜際茲復字之時正值壽母稱觴之日行見祥和之氣由一家而達於一鄉而推於一國豈不懿歟岷春規撫慈範本屬好善之士其益勉之哉

答曹君叔彥書戊子

自春徂夏冒念君子我心如痲昨奉四月十日手書藉稔邇來道體安康而心緒悶損至爲敬念譜妹劬秋女士天性孝友兼擅才華天不永年吾弟失左右手同深惋惜來書異常沈痛讀之憮然大著傳文及哀輓

詩定多傷心悅目之語譜妹自此可不朽矣竊意至性中人固難太上忘情但氣數適然雖聖賢亦不能免老養之年精氣神三者尤宜葆攝尊體素有肝陽慎防觸引務祈達觀自玉切禱切禱兄僑寓滬濱仍前講學讀經救國四字永矢弗諼平居惟以易憂患九卦心語心維藉以自遣而於履之初二兩爻及復之初爻尤往復不置先儒謂論語我欲仁斯仁至矣二語卽本心之一陽來復此境最爲有味又并以辨義一語深造之使物各得其所卽精義入神之域故曰過此以往未之或知卽孟子所謂聖而不可知之謂神故下文云窮神知化德之盛也若大有之自天祐之二句其根柢全在積善大象傳曰君子以遏惡揚善順天休命善者天之所命二爻曰大車以載積中不敗卽積善也孟子大舜有大焉善與人同卽大有同人二卦曾文正欲以取人爲善與人爲善八字每日作爲常課載諸日記實爲學聖基礎絮言之非敢云自道心得冀稍解吾弟之憂悶耳道衡姪孫在兄校中肄業禮貌恂恂不愧大家矩範可造之才亦可喜之事也臨池倦倦並以告慰

答馮君振心書丁亥

接十九日來函并大著客齋說茲敬評閱寄回天下盡客也惟在我本心有以自主古人所稱立德立言立功及兄平日立志所謂正人心救民命者一卽口頭講貫亦極有益一當可反客而爲主矣陸子靜先生云收拾本心自立主宰王陽明先生主良知之學胥是道也兄近作楹聯云立德立功立言導生民立本命有歎有爲有守冀中國有聖人又撰一聯云人生惟有廉節重世界須憑氣骨撐開交大吳校長擬懸諸文治堂矣國文經緯貫通大義已四版望與素堂弟商洽倘需採作課本卽可應用然亦不拘也近又纂孟子教世編做朱子分類法略加擴充爲十類聽講圍孫繆二君爲用宣紙精印約閱月餘出版容再寄奉嘗謂養浩然之氣須先存平旦之氣朱子所謂神清氣定此心常存庶幾近道老子所謂湛兮似或存亦卽此義此

爲存心養性入門法願與諸賢共勉之

答黃生光藻書 戊子

正深馳系適得十五日來書忻懋奚似足下師武侯溫公十六字爲從政南鍼光藻來書以語爲公開誠者公樂起廣益爲師焉公開誠者力實地是體行爲法法洵足以去私戒浮挽近代頹靡之習邇來民生憔悴極矣飭頹潛淵鴻噉徧野言念及此至爲痛心湘省爲產米之區能稍免物價波動否尙希本學道愛人之旨一面去莠衛良一面拯救民命庶幾保合太和消除劫運孟子云今人乍見孺子將入於井皆有怵惕惻隱之心小民皆吾孺子也沈溺於水深火熱之中惟在仁人君子有以急救之故今日爲吏不在精明強幹而在葆我良知兄近撰聯語云老吾老及人老幼吾幼及人幼天下溺由已溺天下飢由已飢幸賢者採納之

茹經堂文集六編

卷三

贈序壽序類

書類

十六

茹經堂叢書

茹經堂文集六編目錄

卷四 序跋類

同族保謙公孝善遺型圖總序甲申

無錫周氏世譜序丙戌

武進張氏族譜序丁亥

武進章氏宗譜序戊子

毘陵劉氏宗譜序戊子

武進袁氏續修宗譜序丁亥

青陽黃氏續修宗譜序丁亥

古隍朱氏續修宗譜序丁亥

無錫顧氏續修支譜序丁亥

江陰唐氏續修支譜序丙戌

崇明樞氏詩禮永懷圖序乙酉

太倉修理文廟暨四先生徵信錄序丙戌

吳縣沈信卿先生詩文集序丁亥

無錫奚文憲先生詩文集序乙酉

無錫華藝三先生八十有五壽詩序乙酉

嘉定陳仲達先生行政練習序乙酉

嘉定陳仲達先生民國政治文選序丁亥

嘉興錢君海一辭辨序乙酉

嘉興王君瑗仲文集序乙酉

太倉季君調卿詩文集序丙戌

上虞沈君思敏顏子傳略序丁亥

泰興丁君素堂曾子學序丙戌

崇明沈君汝梅適庵叢稿序戊子

孟子救世編自序丁亥

三民圖書公司二十年紀念刊序乙酉

醉獅月刊序丁亥

伉儷月刊小序丁亥

伉儷月刊小序二丁亥

高君踐四傳跋丁亥

茹經堂文集六編卷四

太倉唐文治蔚芝著

序跋類

保諒公孝善遺型圖總序甲申

甲申之歲族姪涖源請題唐氏孝友樂善圖余既爲之序闡揚明德今歲孟冬族姪擘如以乃考保諒公孝善遺型圖屬爲總序保諒公與余爲昆季行平生天性孝友樂善不倦茲者擘如涖族兄企林君繪其善行爲圖十幀曰家訓垂後蓋保諒公平生私淑湘鄉曾文正以尙禮義蓄道德爲立身處世之本其所以昭示擘如昆季者也曰內助輔仁弟婦陳夫人慈仁勤儉與保諒公颺勉同心孳孳爲善隆冬必手製棉衣百數十襲分送慈善機關闔之仁由家庭而推諸社會者吾於弟夫人見之曰建倉瞻族保諒秉子良公遺澤瑩盡營建邑東北嚴家橋倉儲歲值凶荒必櫛風沐雨策騎下鄉蓋所以繼志述事听夕不遑者也曰廣廈儲材保諒公本宜聖益者三友之義肯斥鉅貲建築益友學社與申伯弟協力主其事二十年中作育人材於斯爲盛至今擘如昆季追念先德年費鉅貲在大學設有保諒公獎學金額以惠寒賤益見保諒公馨髦斯十德澤孔長也曰闢宇宏善保諒申伯紀雲昆弟樂善好施斥貲恢擴普仁慈善會屋宇廣結善緣至今口碑載道曰規復名蹟黃埠墩爲錫邑名勝原名小金山民十二燬於火至今湖光山色煥然一新蓋擘如昆季將保諒公六十壽貲移以重建者也曰助修專祠曰誼篤友于曰力興實業曰苦塊誦經皆保諒公至情之所推也余一一恭閱之歎曰盛哉保諒公積善無涯涘矣夫天地之間善氣而已矣善氣充積則子弟飲之無不聰明而端恪者若飲不善之氣則乖戾隨之矣一家如是一鄉如是一國亦如是聖賢之世親

親仁民仁民愛物俾各得其所其善氣之彌綸豈不大哉吾族自子良公孳孳爲善其善氣之旁薄周浹於家庭之間飲其澤者靡不乘其彝訓遠邇汲汲以行善爲當務之急茲者曄如姪秉承先志屬企林宗兄繪爲斯圖並各附以小記觀乎此者孝弟爲善之心有不油然而生者哉方今民生憔悴屋烏靡止凡屬無告窮民無異倒懸不啻環侍於吾前呼號求救故士君子生今世實爲善大好良機惟善緣善因稍縱即逝孔子曰見善如不及此之謂也曄如姪續修前緒聆善言發善行夙興夜寐忝僕罔懈夫虞舜之大德不過取人爲善與人爲善兩端孟子之贊舜曰聞一善言見一善行若決江河沛然莫之能禦舜人也我亦人也有爲者亦若是爲善而已中庸曰天之生人因材而篤深望曄如姪益栽培善果孳孳無倦錫類推恩吾族咸守保謙公之遺訓飲保謙公之善氣他日者位祿名壽隨之詩曰宜爾子孫振振兮又曰復周公之宇俾熾而昌今當太平復字之時正太和保合之會余故樂爲之序忻喜之意爲何如耶

無錫周氏世譜序丙戌

論語首篇第二章言孝弟爲仁之本而下九章卽載曾子曰慎終追遠民德歸厚明顧亭林先生贊之曰孝弟人倫之本也追遠孝弟之本也甚哉有子曾子之言似夫子也禮曰萬物本乎天人本乎祖木著於地謂之本故生民必追溯其先人人豈可忘本乎哉然則人生何以能不忘其本宗譜而已矣丙戌仲冬周氏輩胄松泉宗實守義守信學德諸君介及門許君倚雲郵踪續修宗譜述略徵序於余披覽之下歎曰敬宗收族之道在是矣按吾錫乙虞橋周氏系出泰伯虞仲歷傳五世孫諱章其少時子諱贊封安陽侯維時在吳越未分以前變野蠻俗成禮義邦春秋時大賢延陵季子實紹其傳遞嬗三十二世有禪承公諱虞者避秦亂徙閩南而乃弟敬承公諱虔者又徙洛邑閩南爲周氏嫡派洛邑其分支也五代時七十一世有甯遠從遠二公昆季毓爽從遠公官道州因家於任所宋濂溪先生卽其後裔又爲道州分支而甯遠公仍家閩南

同安周氏嫡系洎七十三世有瞻崖公諱瀛者舉紹聖進士暨厥子濱海公由閩南赴潤州節推任父子緬懷梅里休風義重首邱將卜居於太湖惠麓間中值靖康之難金人鷓鴣祠宅洛社之東偏旋徙乙虞橋之南遂占錫籍千百年來子姓繁衍喬木森森縣延世澤其盛矣夫攷是譜自清光緒丙申續輯距今五十餘年矣民國戊辰之春議修未果邇者國土重光同族重申議采訪纂輯載更寒暑甫蒞其事將壽諸黎藁嗚呼孝弟之至通於神明其繼志述事之意可謂至矣司馬遷作史記纂世家以秦伯居首崇列傳以伯夷居首崇讓德也大學云一家讓一國興讓讓之時義大矣哉余嘗謂三吳文化開山者爲秦伯虞仲其主旨在讓天下祖而禰之者爲季札志在讓國蕩溪先生出自道州分支而著太極圖說通書探性命之奧窔後學奉爲儒宗周氏子孫皆當服膺弗替者也宋蘇老泉先生文學家也其作蘇氏族譜引謂以一人之身分而爲兄弟遞推遞遠甚至不相識視若途人幸其未至於途人也而有以收而萃之不至忽忘則宗譜豈非敦本之要圖乎是故凡考宗譜者孝弟之心可油然而生此則道德家之名言矣今周氏子姓兢兢於宗譜之修輯惟望其後起者益勉其孝弟之美德而紹述仁讓之遺型詩曰威儀孔時君子有孝子則其錫類之祚胤當永保於無疆也

武進張氏族譜序丁亥

萬物本乎天人本乎祖凡人不可以忘本故敬宗收族之義仁人孝子成於是兢兢焉漢班孟堅有言工用高曾之矩矱農服先疇之畝畝吾嘗謂孝弟力田服疇稼穡而因之起家者其歷世必能長久何者以其辛苦勤劬而得之也丁亥季秋武進張氏續修宗譜屬其宗人泉生君紹介來問序於余余考其例凡爲傳三十有五序二十有一世系考世表世系圖元元本本於先世之善言善行靡不畢載余維古之聖人聞一善言見一善行若決江河沛然莫禦善言善行自古爲重今按譜載瑞實公之垂訓曰天生人而假手足是明

昇以謀生之具人惟甘於怠惰斯自入於飢寒之路否則衣食故在也取之手足間裕如矣此善言也天生人而昇以手足卽宇宙間自然之機械手足一日不惰卽機具一日不息大學所謂爲之者疾用之者舒爲之者手足之運行也用之者衣食之瞻足也其義與聖傳相發明矣又按譜載惠斌惠恩昆季二公對於鄉間諸善舉均無所吝惜其犖犖大者如近村往來大道每屆霖雨民皆病涉有深風淺揭之歎二公倡義合資改築石路鄉民便之傳作口碑又載玉崧公克勤克儉雖處境稍豐而衣食不異寒素有以輕裘進者則厲聲曰汝曹惟奢華是尙吾敢忘祖訓耶却之不御夫儉德之恭也此善行也余更有進焉者居今之世惟以勸善爲當務之急孔子歎善人不可得而見孟子以孳孳爲善稱舜徒樂善不倦爲天爵夫行善之方有善因有善果善因者在無形之中宜隨時體察之所謂見善如不及是也善果者積德既厚或本身或子孫享其報所謂積善餘慶俾壽而富俾熾而昌是也而善氣善機必自一鄉始孟子所謂一鄉之善士斯友一鄉之善士一國之善士斯友一國之善士今張氏後嗣誠能積善流光由一家而推至一鄉他日者擴而充之更廣之於一國磅礴輪各正性命孝經孝治章言天下和平災害不生禍亂不作豈非善氣之所鍾成太平之盛軌哉夫爲善時夫爲善時機稍縱卽逝萬不可交臂失之者也爰序之以爲張氏宗族勗若夫子姓之繁盛世次之傳禮具詳於前人所述及世系各表中不復贅云

武進章氏宗譜序 戊子

凡生於天地之間者皆曰命天道好生惡殺民命之重於天下久矣易傳言保合太和各正性命惟養太和之元氣者乃能保當世之民命戊子仲夏武進章君子安介及門蔣生石渠徵譜序於余余受而讀之於練夫人保全民命一事不禁爲之歎息起敬往復流連而不能已已也練夫人者章氏太傅公諱仔鈞字仲德之德配也維時值五代爭雄干戈椒擾公方任西北行軍招討制置使軍事悉歸統制有二校曰邊鎮曰王

建封衛公命求援於建安以兩潑後期至法當斬練夫人爲一言以救之繼令急走並助以資斧二校感泣而去且誓曰有恩不報非人也卽投江南事李氏無何太傅公薨建封奉命平建州亂稔知練夫人家城中兼程急趨建安謁練夫人於編戶家方是時前鋒將士將屠城練夫人曰妾身已老願先冒白刃死建封驚曰妾爲出此言練夫人曰今城中居民烟火萬家皆善良無辜妾不忍見屠城之慘酷聞萬衆之哀號決願先死建封大感動迺如練夫人言祇誅倡亂者數十人餘皆赦歡聲雷動數十里嗚呼練夫人一婦人而能至誠惻怛救民若是古語有云仁人君子於垂絕之民不啻慈母伏其將死之子吾於練夫人徵之矣天道無親常於善人宜乎有子十五人有孫六十八人簪纓相望昌熾無疆也他如良能公力尊國體用康公殉難延平皆卓賤可傳者抑余常謂譜牒者人道之根源而仁義之奧府也易傳言立人之道曰仁與義仁字从人从二上一爲我下一爲人則千百人之所推而羣生之所由萌祇也故曰仁義字以羊以我羊雖小物而跪乳有孝之道善系亦以羊故萬物善必自孝始下以我者言裁制萬物得其宜咸出於大公而不自私故善舉又稱義舉而民族中公田公產稱義田義莊胥此意也昔時有合族同居一處者卽稱某家村某家莊迨其後也散處四方有同族不相識者宋蘇明允族譜引言一人之身分而至於途人此勢之無可如何者也幸其未至於途人也使其無至忽忘焉可也旨哉言乎夫欲使分者而知其合疎者而知其親則非修明譜牒不爲功矣若夫章氏三大宗支曰塘橋曰厚餘曰丁堰其世系源流已詳毗陵錢名山先生譜序中不復贅而余作是序不惟兢兢於章氏審諦昭穆敬宗收族之道而於教孝勸善大原竊三致意焉故於練夫人保全民命一事大書特書見人命之重於天下爲後世嗜殺人者告商頌長發之詩曰有崧方將帝立子生商大雅生民之詩曰厥初生民時維維嫵詩人尊嬖續妣祖若此妣先於祖卽既右烈考亦右文母之義也嗚呼太傅公刑於之明德益遠矣章氏子孫恭讀斯譜其對越祖考丕顯丕承爲何如哉

毘陵劉氏宗譜序戊子

人生天地間歷劫而不磨者惟忠孝氣節而已忠者未有不本原於孝而孝者未有不推擴於忠孝經曰資於事母以事父而愛同資於事父以事君而敬同愛敬之原根莖於至性至情非可矯飾而致而所以感發天性勿替而引之者則歸攝於宗譜戊子季秋及門巢生箴蔣生庭榮以毘陵劉氏宗譜寄跡屬爲序言余維劉氏世系源遠流長而不顯於宋代屏山先生開性理學之心傳爲朱子師余弱冠時研究理學深服膺焉至性至情發爲忠孝余於是譜三忠蓋尤加敬焉三忠者一諱韜屏山先生之考也宋靖康時死於金兀朮之難一諱子羽屏山先生之長兄也常慷慨自許有捐軀殉國之志一諱琪屏山先生之姪也宜樞院犯顏力排嬖佞小人皆側目嗚呼忠節萃於一門史冊爲之增色余嘗謂理學氣節盛則正道興理學氣節墮則正道晦豈不信哉世之衰也士夫脂韋澳忍卑鄙貪汙而國事淪胥以敗孟子引詩至於其何能淑載胥及溺未嘗不廢書而太息也余故序劉氏宗譜特揭斯旨俾天下後世知忠孝爲人生之大本氣節爲治世之綱維宋文信國正氣歌云是氣所磅礴凜冽萬古存地維賴以立天柱賴以尊奮乎百世之上百世之下焉有不鼓舞而興起者哉吾願劉氏子孫咸守忠孝傳家之旨而讀是譜者亦相勉於忠孝氣節皆葆其良知講求道德而毋墮人道之大原哉

武進袁氏續修宗譜序丁亥

論語言君子務本本立道生孝弟爲仁之本小戴禮記言三王祭川先河後海或源也或委也此之謂務本字義本著於地謂之本木離地卽枯槁猶孺子離父母必飢渴顛踣以死故孝爲德本凡人之生不可忘本也自後世釐別宗派別子爲祖繼別爲宗繼禰者爲小宗宗法秩然而尊卑之分明隆殺之義定遠近親疏之等釐然各當於人人之心於是天下皆知人本乎祖之誼而宗譜興焉故曰本者譜也惟敦本於是乎修

譜歲丁亥春仲武進袁氏纂修宗譜其華胄紹安漢生景安慶裕正培諸君介及門秦生和鳴請余爲序按袁氏代有名人東漢有袁安者臥雪茹貧高尚其事守道之君子也晉代有袁宏者文才淹雅撰集後漢記別出鑿裁儒林之通才也宋代有袁樞者秉性峻直喜誦溫公資治通鑑嘗區別其事而貫通之輯通鑑紀事本末此史例之別出心裁者也明代有袁黃者字了凡創立功過格每日記載教人教品修行官兵部主事時日本侵朝鮮曾佐經略宋應昌往征多所策畫仁者必有勇豈非然哉史學家有喜談袁了凡詞鑑者俱津津樂道之也而余更有進者士大夫生今之世當以氣節爲立身之本有氣節而後能擎天柱地臨大節而不可奪回憶四十年前余供職清代總理署時曾追隨桐廬袁爽秋先生諱昶者矯亢不阿嘗著詩詞心焉師之卒以參劾拳匪得罪朝貴爲所害古直臣丰裁如在目前諡曰忠節余哭之以詩曰綠章萬口傳寅直碧血千年怨子規頗爲時人傳誦宋蘇老泉謂讀蘇氏族譜者孝弟之心可以油然而生然則讀袁氏族譜者氣節之思當更奮然而起也武進荔墅村袁氏素稱望族考是譜緣起始於明代萬曆時累代纂輯迄今十次諸君孝思不匱水源木本之志尤近世難能而可貴者也若夫世系之繁盛傳燼之次序俱詳於前人序記不贅述

青陽黃氏續修宗譜序丁亥

人生以不忘本爲先而務本以追遠爲急宋范文正之設義莊贍宗族而家世食貧者力有未逮則莫如修譜譜牒之學始自六朝紀載詳贍傳諸後裔綿綿延延而勿替斯爲敬宗收族之最可貴者降及後世倫紀寢衰甚至有數典忘祖不復憶其高曾之諱者世所謂不仁不智古人所由以三世不修譜牒爲不孝也戴璉丁亥六月江陰青陽黃氏續修宗譜屬錫邑戈君子才來介屬爲序言且告曰斯舉也黃氏君梅金玉趾勳介人諸君共同主持兢兢業業而成焉者也余作而嘆曰甚矣黃氏諸君之孝思不匱也孝經云天地之

性人爲貴人之行莫大於孝孝莫大於嚴父由本身而上溯之吾之祖考卽吾父之父也吾之曾祖卽吾祖之父也身也者親之枝也父母全而生之子當全而歸之自是而慎行其身保其身體保其神明愛我同胞如愛我身體立身行道大者尊親其次弗辱其下能養終身不忘其親教崇品行勤修學術舉世咸彬彬焉莘莘焉無有越乎禮法之外者則宇宙太平之兆實基於此譜牒之中矣漢有黃氏諱香者冬夜嚴寒常溫親之衾被此爲冬溫夏清之法式明末有泮浦黃忠端諱道周者著孝經集傳一書爲日月不刊之作人生必讀之書忠端公在獄中時又嘗手書孝經百冊聞至今手蹟尙有存者惜不得一見也忠孝大節炳耀日星凡此俱足爲江夏世家模範若夫世系之源流累葉之功德則宋朱子之世系歌與張南軒楊萬里諸先生之序文均已詳述余特表續譜興存之大端首著於篇蓋水源木本之大義權輿此矣

古隍朱氏續修宗譜序丁亥

歲次丁亥季秋古隍朱生延璽因續修宗譜蒞事浼及門徐生萬里愍愍來請作序言予嘉朱生孝思誼不容辭爰書其簡端曰攷朱氏得姓遠在唐虞時尙書所載朱虎熊羆是也系出高陽周初封其後於郝子孫去邑爲氏始爲朱氏子姓繁衍散居各行省洎南宋新安朱文公出爲一代名賢傳授道統彪炳寰區是爲道德教育之宗奮乎百世之上百世之下讀其文集語錄者高山景行相與私淑奉爲矜式夫新安子姓與古隍子姓是否同宗不可攷然固朱氏之大光寵也吾又謂道德必根於性情有至性者易於入道朱子放厥詩云若知赤子原無罪合有人間父母心性情中人讀之墮淚更推而廣之如宋天長朱壽昌母劉氏他出壽昌尙幼母子不相見五十年熙甯初壽昌棄官刺血寫經行四方求之遇於陝州迺迎母與二弟歸當時蘇東坡王荊公作詩歌以美之有明泰州朱恕樵薪養母一日過王良講堂謂曰離山十里薪在家離山一里薪在山良聞而異之招爲生徒以勸孝行嗚呼此二人者同出朱氏其性情懇摯若此與曾子歸耕歌

所謂往而不返者年也逝而不可追者親也又曰孝有不及父母既沒雖欲孝誰爲孝乎其至情至性殆無異也今觀朱氏族譜體例謂立身身概先德行而後才藝大都孝弟爲重耕讀次之顯親揚名孝弟大端故科名次之藝葦葦車孝弟實事故能創能守次之善夫孝弟爲人之本朱氏子孫當弗替引之矣

無錫顧氏續修支譜序丁亥

余曩讀崑山顧亭林先生文集曰論語首章言學次章言孝弟爲仁之本以下又記曾子之言曰慎終追遠民德歸厚善哉夫學者所以明人倫也孝弟人倫之本也慎終追遠孝弟之本也人倫明於上則小民親於下斯言也如日月之經天江河之行地千古不磨者矣丁亥仲冬錫邑顧康伯先生因族中續修支譜躬躬焉兢兢焉來請序於余余爲之肅然曰盛矣是真亭林先生之遺緒康伯諸位先生實能善繼其志善述其事者夫謹按顧氏先世本居崑山系出三國時吳丞相諱雍之後子孫綿延弗替至明代隆慶時有榮祥公卜居崑山華定鄉天啓時有玉麟公諱鶴因魏璫煽虐逮捕周忠介公諱順昌吳氏顏佩章等五人憤擊促騎蘇省震擾玉麟公匆遽徙無錫之蓉湖莊是爲遷錫始祖當是時家業中落宗譜因之散失遞傳至六世孫開鎮公諱錄七世孫儀卿公諱鴻遠晉川公諱汾影恬公諱灝經營貿易家道蒸蒸日上數十年間貨財殷阜邑中善譽胥賴維持蓋其種德深矣洎三公相繼逝世繼起者又有八世孫曰璠字輝吉曰璠字春坡曰球字達甫九世孫曰寶書字森伯曰維賢字幹臣諸公會議修輯宗譜擬定名爲錫山顧氏支譜合計當時人丁已五十有餘於同治十二年冬月功告訖成道光緒丙午年幹臣公提議修譜而未果幹臣公者康伯先生之尊人也今康伯立志續修可謂孝思不匱者矣而余竊有進焉者亭林先生學術行詣炳耀日星吾輩後生常抱高山景行之願茲者康伯先生續修支譜繼自今以往惟望顧氏後昆相與志亭林先生之志學亭林先生之學勿替引之夙昔故老傳聞亭林先生於所著郡國利病書外別有黃紙結繩數千堆積

屋之半楹告其家人曰吾一生精力盡萃於斯逮先生歸道山執友李二曲先生來弔家人導示之李大哭曰方今文網周密速焚之家人開視其數捲則每邑之形勝若何攻守若何具載無遺蓋擷郡國利病書之菁華而益以用兵方略其規復明代之志至死不渝忠貞亮節奮乎百世之上百世之下聞者莫不興起其斯之謂歟顧氏後賢其勉之哉余本婁人也地與崑山接壤瞻玉峯之曉靄覽崑塘之煙波慨焉遐想安得有亭林先生者出而正人心挽頽俗則余與康伯諸先生庶幾同享昇平矣夫後之讀是譜者當人同此心同此理也夫

江陰唐氏續修支譜序丙戌

我唐氏得姓始自陶唐堯舜之道孝弟而已矣孝弟爲人倫之本豈非唐氏最初之彝訓哉周封公侯唐叔最著康誥斯作孝友是重遞傳千餘載後李氏淳興唐遂爲建朝之號惟時有諱儉褻者事親以孝聞佐太宗定鼎圖形凌煙閣宋代有諱傑者生二歲卽知孝經祖母蔣氏病目失明傑以舌舐之良有效劇賊孔彥舟犯邑城傑負蔣氏號哭突圍出賊敬其孝舍之事載史傳有明中葉毘陵荆川公文武兼資卓然爲一代儒宗文治昔年曾撰其讀書處碑記高山景行雖不能至心嚮往之焉然更有進者近世貪冒之風日甚邦之阨陞實由於此非得清廉勁節者痛矯正之不足以振起頽俗前清咸豐時鏡海公諱鑑者以特薦會文正督師令聞令望輿誦翕然於是善化之唐彪炳遐邇邇其廉介清操尤有令人欽敬者自維弁陋所聞於長老之稱述載籍之紀錄者如此歲躋丙戌江陰宗人耀和全寶宗望佩基佩元雲漢樹奇風儀等以書來請曰我江陰章卿太平橋唐氏一支原屬武進白鶴溪治中華甫公後洎前清順治九年十一世孫蔘淳公創輯支譜至光緒五年譜凡一創三修迄今又越六十七年宗人等深懼歲久遺忘漸就湮沒爰由風儀任主稿諸同宗分任採訪徵收等事計自乙酉冬至日始凡歷一載而竣事敬請一言以爲序文治恭閱之首

列序目詰命訓規次世系世表又其次凡例家規及傳序墓誌等井然有條秩然不紊不禁肅然起敬曰盛矣夫昔司馬遷有言天者人之始也父母者人之本也人生天地間孝弟敦睦天下之大本也擴而充之至於中和位育天下之達道也皆天職也凡我唐氏公族聰聽彝訓自必讀經教品心體躬行他日者根茂實宏天保穀穀俾昌而熾俾壽而威其庸有涯淡夫其盛矣夫

崇明瞿氏詩禮永懷圖序乙酉

搢紳者一國之元氣也詩禮者一家之元氣也惟搢紳家舉能誦詩讀禮而後能修明倫理保合太和其効在無形之中未可爲淺識者道也崇邑同鄉瞿君季剛以詩禮永懷圖屬爲記余展讀之見其家傳所載先德之言欲以學術救國以道德救人心而立身行事必本於孝弟忠信允矣老成人之言爲千古不磨之論而季剛之緬懷明德念昔先人爲近人所難得也竊維孝爲德本教所由生而欲培植其本根道在學詩禮而已論語載聖人庭訓不外學詩學禮微特爲天下搢紳之法式且爲後世人心世道計者至深遠也夫孝道莫備於詩禮詩既醉篇言孝子不匱永錫爾類又曰釐爾女士從以孫子見傳家之久長不在富貴利達而在孝弟之子孫其他散著於蓼莪苞栩陟岵諸篇悽愴愴傷皆足以感動人心魯頌曰靡有不孝自求伊帖孝非爲求福而受福者必本於孝讀天保第四五章可知矣孟子言事親從兄曰禮之實節文斯二者是也孝弟節文莫備於禮小戴禮記曲禮篇冬溫夏凊昏定晨省出必告反必面視無形聽無聲何其委曲而詳盡也若夫內則一篇上慈下孝穆穆雍雍所以講德於兆民又何其懇而摯也而其中載曾子之言曰孝子之事親也樂其心不違其志樂其耳目安其寢處以其飲食忠養之其曲體親心無須臾或失焉至大戴禮記曾子立孝大孝各篇皆娛親養志之法而疾病篇曰父母既沒雖欲孝誰爲孝乎年既耆艾雖欲弟誰爲弟乎故孝有不及弟有不時其此之謂與而蔡邕琴操載曾子歸耕歌曰往而不反者年也逝而不可追

者親也仁人君子讀之潛焉出涕矣今季剛斯圖非皆本於先賢之意與嗚呼凡人孰無父母孰無兄弟披覽茲圖益將神遊於重華之庭宗聖之室下武之詩曰永言孝思孝思維則古之聖賢不第盡一己之孝且將廣其孝於天下而示之模範吾故特爲之記以勉季剛且以勉天下之孝子

太倉修理文廟暨四先生徵信錄序丙戌

慨自丁丑事變擾攘八年我婁水弁山俱在島夷蹂躪之下泮水宮墻鞠爲茂草殿堦尊嚴之地易爲國人遊牧之場四配神龕毀夷殆盡兩廡丹楹繫馬留之如追蠡過之者觸目傷心吞嗟涕洟可勝嘆哉此外如吾鄉先哲陸陳江盛四先生祠初則又以鐵鳥所經震驚墜圯風雨漂搖莫之顧問而時昔都講撰杖之地淪爲犬羊窟宅又所弗論兵之爲禍烈矣曩歲抗戰勝利撥雲霧而見青天丙戌之春吾鄉諸父老昆弟輩推原國亂之暴起皆繇于聖教之陵夷時以喪亂初平籌款萬艱用是小葺四先生祠先資號召而熱心毅力者聞風興起於是後海而溯先河鳩工庀材督修文廟不遺餘力自春徂秋功告訖成而四先生祠字亦得兼營並進輪奐聿新齋舍僉備主其事者爲陸君勳之而金君鴻蓋陸君博泉朱君鐵英張君拜彤趙君燿如諸同志或仔肩募款或董理工程均足以彰勞動而光里乘自茲以後同人規約春秋二祭祀孔後一日爲釋奠四先生之期永留紀念誠盛典也茲者修理文廟及四先生祠各項收支徵信錄將次印行及門陸君博泉郵屬序言爰謹書數行用志慶幸并質諸邦人君子以教之

吳縣沈信卿先生詩文集序丁亥

嗚呼學術之盛衰豈非視天心氣運爲轉移哉君子知天心之不可測不得不與天爭然雖與天爭而卒不能勝天者此理之當然實數之無可如何者也當前清光緒之季拳禍擾攘以後當事者頗思勵精圖治振興教育培養人才吾蘇爰設教育總會於上海林蔭路請信卿先生主辦其事惟時余監督南洋大學任會

長者四年月必會晤四五次各邑教育分會總會實董其成當是時人才鱗萃楊君翼之雷君繼興蔡君松如史君暈才相與奔走其間某邑之教育良某邑之教育未善某邑之人才盛某邑之人才未興皆得匡之直之從而振德之學校事業蒸蒸日上達可謂極一時之盛矣余因欽佩先生嘗欲延先生兼任南洋大學庶務長先生曰兼職恐心力不專爰薦同鄉夏蕙飲先生以自代天運杭隍世變元黃教育總會取銷與各邑教育亦遂隔閡余與先生遂不經見越四五年偶於友人座上相值形容消瘦驚訊之則曰曾遭傾跌耳蓋其憂傷憔悴者深矣可勝慨哉鴻印圖書館者先生所特設也月必數至焉余深冀其優游泮奐可以頤養天年乃又越數年聞先生竟歸道山矣余爲不怡者累月先生卒後同人亦各星散無復友朋相聚之樂矧時局滄桑一經敵寇之內變再經勝利後風俗人心如江河日下靡所底止有心人靈歎頹息藉使先生尙存於今日其感嘆當復何如哉予室翹翹風雨漂搖追維往日曷禁霑襟之浪浪也丙戌仲冬先生婿胡君厥文哀集先生遺著曰越齋詩存凡六卷曰華梧軒文存凡四卷曰教學片羽二卷此外尙有自撰無成人傳年譜行述并著述日錄暨哀誄祭文等都若干卷將授諸梓人來問序於余余受而讀之俯仰數十年來世變之大棘朋舊之凋零昊天孔昭我生靡樂旁皇執簡不知所云嗚呼唏矣爰勉綴數言以見文章與世變相因吾輩雖欲與天爭而無力以回天也敬以告當世讀先生集者

無錫奚文憲先生詩文集序乙酉

天地嚴毅剛直之氣綿延廢續終古不息其在人也播之爲事業發之爲文章而文章又因其人之性情品行萌砥而出桐城姚姬傳先生有言觀其文諷其言則凡人之性情行狀舉以殊焉余常申其義曰凡文之勁達以健者其人必剛正磊落者也凡文之篤實以舒者其人必敦厚忠信者也故凡閱文而不能知其人者非精於論文者也丁亥孟夏及門奚生干城攜其祖考文憲先生遺著見跡並述先生易簣時之言曰吾

爲諸生逼處貧困無所恨惟有遺文三百餘篇古今體詩千餘首俟孫輩學成爲吾梓而行之可無缺憾於地下矣敢乞先生爲序以垂不朽余受而讀之覺其正直豪邁之氣流露行間雖摹給小品亦感時撫事必歸於正大精剛之域因作而歎曰自周易著直方之訓洪範有平康正直之文而孟子論養氣之方曰至大至剛直養無害塞於天地之間此言人之養氣也而文章之道在是矣夫一鄉有正直之士立人倫之模範則一鄉子弟感其化亦皆侃侃諤諤無有諂諛而卑污者世衰道微言行不復相顧於是士皆習爲機械變詐不知人間有愧恥事嗚呼可鄙也亦可傷也先生弱冠後卽有聲庠序間敦樸劬學自壯訖艾常捐資創設高等小學於本邑安陽山麓來學者踵相接弦誦之聲洋洋盈耳乃因家道日落不得已輟講侶際無聊作詩文以自遣至貧困以終論者以爲天之待先生氣數無乃過奢庸詎知君子之澤積久彌光迄今鄉之人咸感頌之曰此詩書彝訓文憲先生所留貽也戒後進毋敢忘然則先生之教深入於人心流風餘韻累葉弗替天之待先生抑亦厚矣清初平湖陸稼書先生論師道曰天下有興起之師有成德之師興起者廉頑立懦拔人心於陷溺之中成德者砥行礪名造人才於粹精之境今先生剛正之行無愧興起之師矣若夫雖雖以和爾肅以破成人有德小子有造後生學子其可不自勉乎抑余平日教育宗旨惟以孝弟爲先務之急丁丑歲余挈諸生避地長沙以達湘鄉聞干城令姊瑞珍以金釧一事交干城曰以此爲川資速隨唐師去干城因得偕余行在桂林畢業此孝弟至誠之行豈非先生家教所流傳耶詩大雅既醉篇曰孝子不匱永錫爾類余嘉干城之孝思爰序述先生品詣文章俾弁諸集首烏乎宇宙大矣其懷才不遇屯艱否塞以終者胡可勝道惟在後起者有以表章之爾中庸曰善繼人之志善述人之事並發揚斯義以勗干城

無錫華藝三先生八十有五壽詩序乙酉

無錫同鄉華藝三先生長余四歲與余締交四十年瞻其貌藹然而可親聆其言秩然而中理觀其行粹然

而寬仁恂恂乎君子人也乙酉仲冬先生年八十五矣同里德生榮先生以先生重游泮水詩來屬和余愧不能詩爰作序文以賀曰吾鄉自東林高顯諸賢講學以來代有傳人而如先生之品重圭璋令聞令望不數數觀蓋先生醴精道德涵養有素固將壽心以壽身壽身以壽鄉而推之以壽國者也先生夙喜余譚經爰述經學爲先生祝蓋古來致壽之方首在定慮次在養氣余嘗作仁壽鑑以發明之先生貌厚而神完志定而氣固小雅天保之詩曰天保定爾俾爾戩戩無不宜受天百祿古經之言壽者首推虞舜周文繼之者厥惟召康公其佐文武成康凡歷四代尙書康王之誥所稱太保卽康公也今讀書召誥篇曰節性惟日其邁節性者節嗜欲之性孟子所云君子不謂性也又考詩卷阿篇召公所作也其詞曰豈弟君子俾爾彌爾性彌性者充五常之性孟子所云君子不謂命也先生居恆寡嗜欲定心氣書君爽篇曰天壽平格朱注謂天無私壽惟至平通格於天者則壽之先生蓋當之無愧矣若夫重游泮水之喜更有爲先生頌者泮水之詩曰思樂泮水薄采其芣魯侯戾止永錫維老先生引掖後進中正和平非所謂載色載笑匪怒伊教者歟而闕宮篇則曰居常與許復周公之字魯侯燕喜既多受祉黃髮兒齒先生前年曾獲兒齒之瑞豈非人間世之休徵徵特吾鄉之榮譽也茲者普天同慶旣復周公之字矣先生杖履優游言旋言歸復我邦族人皆歎羨以爲神仙中人夷攷泮水之五章曰矯矯虎臣在泮獻猷此卽近世之武備學校也淑問如皋陶在泮猷因此卽近世之法律學校也先生重游之時值國家全勝之會親猷猷囚之喜度必有歌勳於懷思振興武備而有以整飭之思修明法律而有以弼教之則所謂壽心以壽身壽鄉以壽國者庸有艾乎周易六十四卦之序畜德之後次以頤卦剛健篤實輝光日新其德而禮經所謂百歲期頤者先生當可操券而致也同鄉諸君子佳什璀璨騰光彬彬郁郁陳下里巴人之語用殿鏗金瓊玉之後云

嘉定陳仲達先生行政練習序之四

政治學權輿於聖門論語子路一篇包括行政要領而顏淵篇先開其端聖人三答季康子之問其言曰政者正也子帥以正孰敢不正又曰苟子之不欲雖賞之不竊子欲善而民善矣皆寓本身作則之義而不欲尤爲大要故子路篇又曰苟正其身矣於從政乎何有後世爲民上者其能不欲乎其能正其身以正人乎儻皆能奉聖訓以爲法則國治而天下太平豈難致哉執友陳先生仲達篤奉聖門家法精研經史及近世政治學余長吾妻太屬中學時敦聘爲教師及學監諸生翕服奉爲圭臬歷有年所今春旋出宰太邑嘉定縣並任無錫縣縣長清廉公正有口皆碑去官後擔任復旦大學教授歷有年所今春以所著復旦政治學系行政練習講演集見眎屬爲弁言余受而讀之閱深肅括條理秩然而愛民之誠溢於言表不禁作而歎曰陳先生洵無愧於聖門矣論語言舉直錯諸枉則民服斯民也三代之所以直道而行也孟子紹其傳昌言曰民貴君輕而梁惠王一篇自古之人與民偕樂章以下屢言民字更僕難數夫天生民而樹之君蓋爲民經理萬事者也三代之世聖君賢相所以兢兢業業者無非欲得保乂吾民而已後世不知此義於是虐民殄民吸民之脂膏盡民之生計吁此吾民之所以保抱攜持以哀籲天者也世之學者苟能體仲達之意研究政治常以愛民貴民保民爲心救民於水火之中則困苦者變而爲康甯憔悴者變而爲愉樂夫禮運大同之治豈空言所可緣飾哉竊願學者家置仲達先生行政練習一編而無忘救民之宗旨與孝興弟興仁興讓行見數年之後吾民皆鼓之舞之拜甘棠之嘉惠含和吐氣被福祉於無疆矣

嘉定陳仲達先生民國政治文選序丁亥

昔人有言知古不知今則爲腐儒知今不知古則爲俗吏故博古通今者尙焉書疏之學首推唐代陸宣公奏議其慈祥愷惻之感人雖武夫悍卒聞者莫不流涕宣公之所謂今卽後代之所謂古也余執友陳先生仲達乙酉歲有行政練習一書付梓其學說原本孔門余既讀而序之矣茲者復有纂述民國政治文選發

刊而探厥淵源蓋由研討宜公奏議而旁及之者自黎黃陂武昌起義訖段合肥執政下野逋遷大事記諸文告可誦讀者若干篇加以按語燦若列眉使讀者渙然冰釋怡然理解洵難能而可貴者溯自民國肇造庶政事新不久軍閥放恣出入奴蠅蟻沸蕤幾與德唐德宗時藩鎮專橫無以異惟雲南討檄馬廠督師三代直道之公猶留於天壤吾輩飽眼滄桑由後溯前方策具在不至如杞宋不足徵陳先生學優而仕又復仕優而學凡後生小子皆當奉茲編爲知今之嚆矢矣抑余竊有進焉者先生自序引子思子行遠自邇登高自卑之說勉學者讀此編上溯及唐則以最高文格蘄望吾黨友朋尤爲朏擊莊子云吾生也有涯知也無涯上庠之中多聰明傑出之士則取材施教由唐而更溯諸漢如賈長沙陳政事疏賈山至言董江都天人三策諸葛武侯出師表咸屬書疏濳觴爲日月不刊之作後之人師其意不泥其迹則得之矣奚必斷斷於今古哉

嘉興錢君海一辭辨序乙酉

余少讀李次青先生所編國朝先正事略心甚好之迨服官京師時先師嘉興沈子培先生語余此書蓋係吾同鄉錢侃石先生所編碑傳集作藍本余乃亟取碑傳集反復展玩更大好之厥後先師繆藝風先生編續碑傳集亦極詳備乙酉仲冬及門王君瓊仲以嘉興錢君海一所輯辭辨屬序余詳閱之其中有益於經學者如勿勿二字斷爲愚字亦勿之正音引大戴禮曾子立事篇君子終身守此勿勿爲證考勿字本義說文訓作斂脚捲一角磨之以止三軍之進故論語顏子四勿視聽言動皆在外而四勿則守之在心也其有關於聲韻學者如伍員之員應讀如云引昆山顧亭林先生詩落日江頭送伍員秋風壘上別徐君員字不入先韻而入眞韻可見古人韻學之精審又如曹大家家字應讀若姑推之若室家國家等均應讀姑合於古韻余按詩鴟鴞篇予所授茶予所書租予口卒瘞曰予未有室家以茶租瘡家協韻今吾蘇方言多有讀

家若姑實合於古韻也又款乃二字引元結款乃曲顏氏家訓及柳子厚漁翁詩爲證憶三十年前文治隨侍先大夫泛西湖每過小橋樞中輒作款乃音乃知古人審音之精不必讀如襖襦也余嘗讀德清俞曲園先生春在堂隨筆輒以俗事加以古時考據如泰山石敢當齧齧齧之類皆以古事釋之淵博無涯瓊仲又示余錢文端公暨侃石警石兩先生事蹟蓋詩書考據之學累代相繼今海一君傳其遺學足徵文端公暨二石先生之澤源遠流長而曲園先生之學派亦有傳人矣因追溯文端公處全盛之時雍容檢揚作儒林之模楷噫其可羨矣夫

嘉興王君瓊仲文集序之四

人生當世氣節而已矣士大夫所負之責任激勵氣節而已矣氣節者氣骨也骨強則能撐撐負重而堅立於天地之間否則骨抱體柔遇事如煙之銷如火之威輕浮飄蕩社會隨之浮沉國家亦因以杌隉論語曰執德不宏信道不篤焉能爲有焉能爲亡天地間亦何貴乎有此等人說何以矯之惟有氣節嘉興王君瓊仲於庚申年承先師沈子培先生之教來無錫國學專脩學校肄業察其貌溫溫然聆其言藹藹然挹其度淵淵然知其爲君子人也丁丑之歲日人入寇東南一隅不幸淪陷王君志節激昂不平之鳴時露於楮墨間顯其時日寇檢査密王君則以詩文稿藏於地板之下乙酉歲日寇降河山復故宇宙重光而君詩文遍顯於世本年年季冬愆愆來請序於余余喜甚爰爲之序曰天地正大之氣雖當昏亂之時不容稍有泯滅昔孟子論養浩然之氣曰至大至剛塞於天地之間又曰其爲氣也配義與道宋文山先生宗之作正氣歌曰天地有正氣雖然賦流形於人曰浩然沛乎塞蒼冥後之人讀其歌覺其浩氣充滿於乾坤窮天地亘萬世成仁取義者皆奉爲矜式今王君始雖險遭不測而卽值昇平俯仰身世亦云幸矣然其際遇雖較古人爲幸而其責任則非較古人爲輕宋張橫渠先生有言爲天地立心爲生民立命立心立命惟主持氣節者足

以任之吾知王君自茲以往必能以氣節倡率天下不以皓皓之白蒙世之溫穫俾頑者廉懦者立舉近世貪鄙庸劣卑污醜詘之習一掃而空之如撥雲霧如滌塵埃此實國家之慶豈第吾門之光哉昔姚姬傳先生答魯絮非書謂接其人知爲君子矣讀其文非君子不能也蓋文行合一先儒所重王君之行清矯拔俗凜然如不可犯讀其文者當知其爲君子也余常勉人爲君子世皆笑以爲迂而余不顧蓋君子教育始於周文而大昌於孔孟讀論孟二經即可知其宗旨所在今時惟有奉君子爲法提倡君子教育吾國其有劣乎世有同志者讀王君之文自當欽其爲人而勉入於君子之林鹿鳴之詩曰視民不佻君子是則是攸卷阿之詩曰豈弟君子四方爲則吾知王君必益勉之而爲當世君子之楷模也

太倉季君調卿詩文集序丙戌

吾婁南郊有巨鎮焉曰南碼頭蓋自劉河潮流西注蜿蜒由陸渡橋趨半涇灣達城河以歸於太倉塘加以南渡桃花奚止千百樹莫春三月幽人逸士憑眺憩賞者累軌接踵地靈若此人文煥焉成豐年間有季南阿先生諱敦詩者與先大夫同游於庠光緒六年有季君亦南諱福綬者與余同補博士弟子每屆學政按臨時歲科試必有南碼頭人列名其間文學之秀僉曰盛哉盛哉吾婁舊有婁東安道兩書院先師王文貞公紫翔先生嘗主講是二席惟時有南碼頭季君調卿文貞公之外甥也君發穎豎官師課榜發軔衷然首列惜余其時肄業江陰南菁書院旋舉進士於京師未及與季君論文講藝光緒三十年嘉定秦佩鶴學士諱綬章督學閩省文貞公介季君入學幕司總校所拔多知名士僉曰懋哉懋哉厥後政體改革人情傾向共和號爲民主季君獨嘆曰彝倫如此敦民智如此鷲矣夫不揣其本而齊其末是猶適燕而南其轅也誤哉誤哉亟銷聲匿跡歸隱田廬不復與聞世事越數載遂歸道山同志之士莫不凄然灑淚曰惜哉惜哉歲次丙戌孟秋其猶子位東播君詩文集來屬余爲序余展讀之多感喟時事之作而識見必衷於正理解必

歸於純信乎難能而可貴者也爰綜君平生學問事實序以歸之獨惜此文之成徵特先師不及見並不及與君討論商榷外感滄桑內維身世又豈不悲哉悲哉惟余有仿曾文正孫氏鶴論序略附諍論讀慧言世弟所撰君傳文謂漢學之末流遂致用夷變夏未免太過漢學之長在訓詁名物如鄭君三禮注實係日月不刊之作漢宋學源流一貫不宜抑彼揚此君子之言平則致和激則召爭未可率爾陳辭也

上虞沈君思敏顏子傳略序丁亥

余嘗輯師四賢法曰顏曾思孟已列入演講集爲多士修養之則已將十稔矣茲者陰陽棗繪亭毒胚胎陽動霞灰出坤入震適有上虞沈君思敏特豚曲阜顏子故宮肖像暨手輯傳略與言行錄等成冊屬爲弁言余維古來尊顏子爲復聖者先儒謂孔子於易爲乾卦顏子於易爲復卦引初爻不遠復爲證其說遠矣余再廣義以推之繫辭傳曰復其見天地之心乎天地有起元來復之機人心亦應有剝極來復之會晚近以來人心放失貪污成風一點良知復於何有儻人能皆如顏子履空安於陋巷簞瓢不必侈談天下歸仁與爲邦能羅四禮樂則造成廉潔之風卽不遠復之初基也又按繫辭傳孔子贊顏子曰有不善未嘗不知知之未嘗復行此卽明代王陽明知行合一之宗旨余往昔曾著陽明學術發微印行於世有志之士儻能熟誦而心體之庶幾遠道不遠再開昔年山東兵燹顏子廟頤受傷損現在想已恢復元祀矣通都大邑聖廟有鞠爲茂草者惟望振興文化之儒各出實力相與維持一綫珍碩錄而種來復之機也

泰興丁君素堂曾子學序丙戌

人生天地間孝而已矣爲人而不能孝則性情漸滅愛敬消除而乾坤或幾乎息矣吾讀大戴禮記曾子十篇最喜讀曾子疾病篇曰人生百年之中有疾病焉有老幼焉君子思其不可復者而先施焉親戚一指父母言一旣沒雖欲孝誰爲孝乎年旣耆艾雖欲弟誰爲弟乎故孝有不及弟有不時其此之謂歟又最喜蔡

邕琴操戴曾子思親歸耕歌曰往而不反者年也逝而不可追者親也吁嗟兮歸耕歸耕乎此歷山盤兮豈
豈明日即歸省其愛親思慕悱惻之情溢於言表可與蓼莪鴛鴦羽陟岵諸詩並昭垂於天地之間讀之而不
動孝思者非人也詩曰永言孝思孝思維則孝思以何爲則法曾子而已矣孟子言大孝終身慕父母余嘗
作大義三篇以表矜式蓋自古大孝遠而在上者曰虞舜隱而在下者惟曾子余於昔年作曾子大義先以
孝經次探論語孟子大小戴禮記羣經並諸子中引曾子之言都萃其中而藁本爲福建葉君長青攝去不
數年葉君歸道山原稿訪求不可得矣及門秦興丁君素堂孝悌中人也余請其爲國學專修學校諸生講
授孝經聞其訓言有感動流涕者可徵孟子性善之訓實從至性中流露而出也今歲素堂以曾子學一卷
見畧余讓之愛不忍置惟望素堂以講授於本校者推之於一鄉一邑而即達之於一國未有仁而遺其親
未有義而後其君忠孝之詣漸漬於人心良知良能達之天下擴而充之以保四海其裨益於國民豈淺鮮
哉豈淺鮮哉

崇明沈君汝梅適廬叢稿序戊子

歲次戊子季春崇明沈君同一將其鄉先哲沈君汝梅適廬叢稿來徵序於余受而讀之共分四部曰詩曰
文曰筆記曰雜俎其精要概略一曰修養身心二曰人倫道德三曰教育政治之評隲四曰人心風俗之匡
維五曰時事諷刺及一事一物寓有藝術深味者編次以年歲先後爲序嘆其用意之明爽莫與儔也昔劉
彥和文心雕龍曰文之爲德大矣實與天地並生又曰言之文也天地之心哉蓋人莫不具仁義禮智之性
感而遂通天下之故則發而爲喜怒哀樂之情聖賢保合太和範之以樂律趨以采齊行以肆夏其涵養德
性至矣故曰大樂與天地同和道泰政燭書樂經遂亡於是感動人心者遂託之於詩文易傳曰聖人感人
心而天下和平握其要端天理民彝皆顯於倫常日用蘊之爲孝弟擴之爲仁義孝經感應章曰孝弟之至

通於神明光於四海神明者言通本心神明之德也聖門四教文行忠信首之以文者行忠信之宏綱大用皆載於文也今沈君是稿先以涵養身心古聖人注重躬行之道也次以人倫道德古聖人敦崇孝弟之意也其辭雖淺顯而其指則深遠洵有味哉余昔年曾編國文大義與古人論文大義國文經緯貫通大義三種首重文行合一以爲凡文之博大昌明者必其人光明磊落者也文之精深堅卓者必其人忠厚篤實者也惟天下第一等人適能爲天下第一等文反是則其文不足存其人即不足道沈君所持宗旨與余嚮所見不謀而合昔姚姬傳先生言接其人知爲君子讀其文非君子不能也又謂誦其文諷其音則凡人之性情舉以殊焉可見人文合一之致古人蚤發明之矣崇明本我鄉邑代有聞人近惟我執友王文恪公且揆先生著有農隱廬集問世今君之適廬叢稿可與並傳不朽矣抑又思之適者適意之謂也吾人講學與道大適動合天機則凡世俗之貪鄙心自私心俱一掃而空之其於世道人心詎不大有裨益哉爰書所見闡明文章本原根於品行質之於君當不河漢斯言

孟子救世編自序丁亥

救世以何爲要讀經而已矣讀經以何爲要先讀孟子而已矣昔司馬子長作孟荀傳敘窮衍闕大不經之說謂中國名曰赤縣神州禹之序九州是也不得謂爲州數中國外如赤縣神州者九乃所謂九州而子長先提其端曰余讀孟子書至梁惠王問何以利吾國未嘗不廢書而歎也曰嗟乎利誠亂之始也後世儒者或驚怖其言或迂遠其論不知是乃子長之特識也二千餘年後歐美兩州發現大九州之說固有明徵矣愚嘗乘輪舶泛裨海馳鐵道走大盜抵英法美諸國都嶽格之語象寄之倫雜列於吾前爭欲詢吾國聖賢之彝訓詩書之根本廉恥名教之大坊余常告以孟子仁義之說雖舌人淺道而彼都人士多類首會意若不勝其歆羨者孟子道性善東海西海心理皆同豈非具有明驗哉迨反觀吾國則廢經不讀而好利之弊

什伯倍於曩時孟子所謂後義先利不奪不腰上下交征利於斯爲極不遺親不後君忠孝大節炳若日星
疇其能深體而躬行之哉嗚呼可慨矣夫利字本義刃植其旁縱欲濫取估勢強奪必至自殺孟子曰吾今
而後知殺人親之重余爲轉一解曰殺人之子孫人亦殺其子孫而本心昏昧者沈溺其中卒莫之悟嗚呼
可痛矣夫爰不揣弁陋做朱子纂孟子要略之例編爲十類曰孝弟學曰尊孔學曰貴民學曰心性學曰政
治學曰教育學曰氣節學曰雄辯學曰論戰學曰周易學而於養平旦之氣葆其良知良能由愛親敬長達
之天下尤不憚苦口疾呼三致意焉夫奮乎百世之上百世之下聞者莫不興起非我所敢期也若夫閉聖
道正人心息邪說經正民興則余禱所服習者不敢不自勉而並以勉人也江陰孫君壽熙甯波縵君天行
受業於余讀是書尤好之爲出賃印行深可感也

三民圖書公司廿年紀念刊序乙四

人生當世修養道德激勵氣節而已矣周易泰卦之彖傳曰君子道長小人道消否卦反是則曰小人道長
君子道消余常謂求國家永久之太平非提倡君子教育不可論語一經載君子凡百有五處其以君子小
人對言者有四十餘處最要者曰君子喻於利又曰君子上達小人下達蓋喻義則志氣日益
安而漸進於高明喻利則志氣日益卑而漸趨於汙下上達下達即判於此而風俗之所以盛衰厚薄國家
之所以廢興存亡卽係於此豈不重且大哉然而縱橫億萬里上下數千年大率君子少小人多而操用人
之柄者亦如適燕南轅駘有得當豈果無其人哉道德不修氣節不立之所致也余嘗讀乾坤正氣集正誼
堂全書及唐宋元明氣節諸賢遺書文集往往高山景行俯仰流連而不能已然苦無易簡專家之集便於
學士誦讀而措諸躬行者亦社會中遺憾事也同鄉吳生拯寰爲余同學中特出之士講求氣節特立不撓
民國十四年四月創辦三民圖書公司迭印抗日救國圖書道事變後敵人檢得之怒其索主筆者遂於三

十三年四月某日橫遭逮捕拯我毅然挺身往蹇蹇侃侃一無所屈敵人亦敬異之即以囚車送之歸嗟乎拯我可謂凜然正氣能配義與道者矣周易大過之彖傳曰獨立不懼孟子曰威武不能屈其在斯人歟其平居所印書籍若正義教科書青年修業服務叢書有關於砥勵志節持躬涉世之要道又增訂古文觀止增輯清代忠義節烈之文宣揚中華民族正氣都凡一百八十餘篇又輯歷史古事附以圖畫選擇民族英雄二十人國文對照俾初學童子培植名節根砥激昂愛國精神又蒐集扶持正義之文編補習學校課本使工商界失學青年悅心研慮或作爲夜校講本甚矣其用力之勤也繼自今以往聞其將編輯建設專書包含心理倫理政治社會經濟各種俱印行之又承印各地文獻諸籍藉以發潛聞幽流傳掌故余維大難艱平不乏忠義殉節之士亟待表彰按從前粵匪之難吾鄉先哲嘗刻太鎮忠義姓氏錄日月不刊拯我猶此意也各省各邑宜踵爲之用昭志乘之光夷考其所刊廿年內容分經學政治經濟法律教育科學文藝醫學各門類將以餉遺多士則更有默契余心者夫經籍吾國之寶筏也世未有蔑棄其國粹而可以立國者余曾於讀經管見中論之並詳列讀法拯我諸君儻不以余言爲迂而盡力提倡之吾國庶幾有考矣夫

醒齋月序丁亥

昔曾子有言君子以文會友以友輔仁說者謂指文學家言余謂不然太史公撰貨殖傳云子夏學於仲尼廢者器財於曹魯之間七十子之徒賜最爲饒蓋端木以言語之科而究心實業連騎結駟得勢益彰是學與商同條共貫者也余前掌商部時提倡組織商會等崇商業道德而沙溪濟泰紗廠方始萌芽余嘗扶翊左右其間人爭滄桑工業之磨礪亦因之而演進方今利泰紗廠爲吾婁工業最大之鉅型業務蒸蒸日上職工連二千餘人以維持生活者萬餘人此皆由經理各大股東暨在廠各執事同心協力殫精竭盡有以致此吾邑瘡苦之區賴茲救濟誠盛事也歲躋丁亥仲冬及門陸生博泉貽書來告曰利泰紗廠諸君近有

聯誼會組織規約業餘時間聯絡附屬機構人才研討學術維繫情感并注重鍛鍊軀幹鼓舞正大娛樂爲一鄉一邑倡將以進益所得業爲月刊而工務長周仲溥先生當仁不讓見義勇爲尤經商而好學者爲爲序言以樹風聲余適作而嘆曰宜聖有言志道據德依仁游藝禮記學記篇曰藏焉修焉息焉遊焉凡人乘天地清明之氣終日熙來攘往耳目所接觸者形形色色思慮之雜焉得屏除惟有學術以涵養之盍譬以切礎之然後德業日新精進無疆大戴記曰與君子游如長日加益而不自知又曰如入芝蘭之室久而不聞其芳則與之俱化茲者聯誼會之擬設聲相應氣相求有裨於風俗人心豈淺鮮哉抑余更有進焉者技能國之寶也心性國之基也尙技能則可以富國而療貧尊心性則可以強國而祛弱故修己治人之方宜先讀孝經次及論語孟子最爲深切是故讀經可以救國卜氏子有言百工居肆以成其事君子學以致其道人皆謂早嘗而噲余則謂百工居肆者皆致道之君子也夫十步之內必有芳草十室之邑必有忠信主忠信一語論語凡三見吾鄉自陸陳諸先生提倡風教俗尙敦朴諸同人能守忠信二字爲經商之大本行見事業與風俗與時俱進企予望之矣

伉儷月刊小序一丁亥

或問伉儷至情何人爲最曰莫如虞舜或曰嘻先生好古亦甚矣何至上述大舜曰據尙書釐降二女於媯納言舜爲天子二女嫫而禮載舜葬蒼梧之野二妃未之從於是哭之備絕淚痕凝黃竹唐韓昌黎祭張員外文云南上湘水二妃行迷淚蹤染林古者三十而娶舜壽百有十歲度二妃亦已百歲乃至情至性若此湘妃竹淚痕至億萬年猶存然則伉儷之教篤孰有過於二妃者乎大舜刑于之化亦可見矣迄於後世輕於合者輕於離而夫婦之道苦於是而谷風之詩載於葩經矣

伉儷月刊小序二丁亥

唐杜工部佳人一詩全胚胎於谷風詩幽居在空谷卽谷風也夫嬌輕薄兒新人美如玉但見新人笑那聞舊人哭卽所謂誰謂荼苦其甘如薺宴爾新婚如兄如弟也在山泉水清出山泉水濁卽所謂涇以渭濁湜湜其沚也侍婢賣珠回牽蘿補茅屋卽所謂我有旨蓄亦以御冬也摘花不插鬢采柏動盈匊采綠詩所謂終朝采綠不盈一匊也天寒翠袖薄日暮倚脩竹綠衣詩所謂絺兮綌兮淒其以風也彼佻儷乖戾者誦之當感動而涕零矣他如伯兮詩自伯之東首如飛蓬豈無膏沐誰適爲容中谷詩有女仇離條其嘯矣遇人之不淑矣其語皆極痛心故曰溫柔敦厚詩教也惟讀經之君子乃能立家庭之模範

高君踐四傳跋丁亥

余及門無錫高君踐四諱陽承其尊人秋荃先生遺志毀家興學並其家藏所有股崇悉數售充學費余於民國十年創辦私立無錫中學開校之日踐四痛述先人志事並謂吾先人不及見唐先生面託肇興錫邑文化云云言次慟哭流涕不能自己一時聞者莫不感動此真興孝之效也民國二十七年丁丑歲日寇內憂余倉皇由無錫出走踐四來送黯然潛然若不勝其悲者余旋遷長沙又轉湘鄉與踐四消息隔絕翌年夏余由桂林回滬乃不久聞踐四已歸道山又聞其貧窶甚居古廟中有人欲飲助之踐四不受以無力入醫院竟死廟中臨歿時僅一老僕侍側而已傷心哉踐四以興學而家業蕩然且清廉自矢竟至死古廟中純孝廉節無愧完人余聞其噩耗爲鬱伊者數日夫闡潛德之幽光是吾儒之責也爰紀其事聞其風者其可廉頑立懦矣夫

茹經堂文集六編目錄

卷五 傳記類

- 太倉陸勤之先生家傳 丁亥
臨川黃穉棠先生家傳 丁亥
平湖趙存培先生家傳 丙戌
崇明陸才甫先生家傳 戊子
無錫戈仲翔先生家傳 戊子
無錫朱福明先生家傳 丁亥
江陰徐邦基先生家傳 丙戌
江陰郁詠唐先生家傳 丁亥
無錫李晴村先生家傳 戊子
永康呂月軒先生家傳 丁亥
無錫王君翰仙家傳 丁亥
嘉定胡君春臺家傳 丙戌
武進沈燿廷先生暨德配汪夫人合傳 丁亥
江陰沈源興先生暨德配謝夫人合傳 丁亥
上海黃雲僧先生生傳 丁亥

武進張惟鱸先生生傳丁亥

太倉孝貞女陳氏生傳乙卯

崇明龔母沈太夫人家傳丙戌

丹陽姜母姚太夫人家傳丙戌

廣西平南歐陽謝太宜人家傳丙戌

宜興陸母吳夫人家傳戊子

海門王母杜孺人家傳丙戌

無錫王劍秋夫婦母女殉難記丙戌

無錫王淑靖孝女割股療親奇驗記丁亥

無錫二泉橋記丙戌

無錫許氏三畏堂記丁亥

上海交通大學文治堂行奠基禮記丁亥

上海永康中學增建思齊齋記丁亥

無錫辟疆園移寶金匱山記丁亥

海濱續修嶼圖記戊子

義馬記乙酉

茹經堂文集六編卷五

太倉唐文治蔚芝著

傳記類

太倉陸勤之先生家傳戊子

歲次戊子二月十六日太倉姻世執友陸勤之先生以舌瘡證卒於里第先生性仁慈樂善施與不倦鄉人被其澤者相與奔走巷哭余聞噩耗亦不禁恫心揮淚曰嗚呼失一師資矣蓋吾鄉自陸陳江盛四先生講學以來風氣純樸人心敦厚遠近延師者莫不取資於吾婁因之四方之稔先生名者亦痛惜曰失一師資矣先生諱曾業勤之其字後改名起先生本吾鄉望族八世祖諱毅以名進士官監察御史巡視中東兩城丰裁嚴整不阿權貴有自撰遷城瑣記曾祖諱元文字子鏡嘉慶癸酉順天舉人著有練齋詩稿祖諱恩藻考諱汝梅均太學生代有積德先生爲本生考成甫公諱勤次子天性至孝事親先意承志母徐太孺人病革封臂籲天調藥以進稍效後卒不起先生大慟曰天不許我報罔極恩耶先生年踰弱冠遊於庠旋食廩領舉優行先受業於李先生伯豫王先生晉蕃嗣又受業於同邑王文貞公之門文思大進聲譽起乃應秋闈屢薦不售諸鄉老咸爲太息平居見義勇爲親族中有貧乏者贍養之惟恐不及民國初年先生往遊冀北天津白河泛濫大浸稽天先生晝夜跋涉跣足行水中力救難民江浙齊盧之戰吾鄉瀏河當其衝炮火所及玉石俱焚先生奔走號呼籌款築室以庇鄉人全活藜衆至今猶有感念之者居北京時先生入法政大學肄業昕夕劬學浸至咯血入醫院維時余官京師勸其少息迺輟學而錢塘施植之先生延攬先生佐理哈爾濱道署事閱三載余方監督南洋大學以庶務科長需才甚急特三次電招先生來校而先生亦

以思親彌切幡然南歸就職余倚之如左右手焉民國肇造五路恢張而隴海路綫尤長督辦施省之先生亟招先生佐理其事先生又襄路務者數年旋以積勞體孱急急思歸惟時余與省之先生創辦國學專修學校延先生爲總幹事締造艱辛倚畀益重而先生往來於婁江滬濱之間又幾閱寒暑旋浩然歸隱築室於邑之鮎魚墩蒔花栽竹無意問世矣先生初以繼室施孺人逝世悼亡伊鬱肝火上炎遂患舌病時發時止初不介意詎歷二十年竟成舌癌證先後入上海鑄鏡醫院及中山醫院療治已稍稍愈矣無何節屆春分夙疾大作遂爾作古天奪善人傷哉憶往者余同鄉畢君枕梅嘗曰凡人所不能爲者惟陸君能爲之且高尚廉潔豈常人所能及武進莊君思緘與先生共事嘆服曰若陸君者可謂先之勞之且能無倦綜二君之言可以概先生之平生矣先生以清同治丁卯年七月二十六日生民國三十七年國曆三月二十六日卒春秋八十有二去歲丁亥重游泮水元配胡孺人繼配施孺人均有賢德先先生卒二雍伯公項太孺人女也長適吳澱驥次諱巧蔭未字年十九以貞烈投水死得旌表如例余嘗爲文以哀之本生兄弟四長諱修爵三諱修濂四修祐姊妹三長適錢雨田次適王熾甫三適朱子久子二長慶熙供職上海中央銀行娶同里太原王氏次慶祺供職上海開北水電公司女慶蘭爲余第四子慶永婦孫二樹孫松孫孫女兩門庭之內賢孝可風先生之食報宜哉

論曰余初聞先生歸道山念六十載交情不覺霑襟之浪浪也既而思之曰可無遺憾矣往者讀書洪範篇怪其敘五福自壽富以迄考終不及子孫之賢若先生之一門孝弟可補洪範之缺矣孝子不匱永錫爾類君子萬年永錫祚胤特援引詩篇以慰幽靈於地下卽爲其哲嗣文孫勗焉

臨川黃穉棠先生家傳丁亥

先生諱鴻圖字咸和號穉棠江西臨川縣人其先世子玖公當宋末避亂遷居於邑之北鄉湖西村爲湖西

黃族權興又十二傳曰懷西公再傳曰勳堂公三傳曰海瀾公代有積德曾祖諱某字晴嵐性仁慈喜施與祖諱垂烈字芳揚妣游氏考諱樹敏字棠村清同治壬戌科舉人任弋陽萍鄉餘干等縣訓導教士有方妣帥氏棠村公生子四曰筱棠曰次棠曰幼棠先生其季名曰稗棠幼天性敦篤聰明岐嶷年七齡隨侍棠村公受書於弋陽訓導署溫恭孝謹能守曲禮訓昏定晨省無失儀迨十四歲十三經畢業尤好四子書朱子集注均能背誦頗能以切實躬行爲志長老咸器重之年十七德配邱定宜人來歸越三年先生弱冠應童子試獲薦取入府學歲壬寅食鳳嶺旋就撫郡師範學堂之聘方是時學說龐雜學子靡所適從先生登意立品勵行毋入歧途歲己酉拔萃於鄉次年庚戌獲選七品小京官分陸軍軍計司議制科旋調郵傳部承政應考績科厥後遭家不造雁行零落折翼似續之事頗費周章卒奉棠村公命以謨泰爲冢嗣於是宗公有定位矣初棠村公教授生徒不務帖括學惟以通經致用爲宗旨比時督課子姪及諸甥輩壹以熟讀經書砥礪品行爲先務之急可謂知本矣禮曰尊祖故敬宗敬宗故收族族先生孝行充積於中歲庚子考樹敏公棄養甲辰妣帥太夫人見背先生擗踊欲絕居喪不聞樂不與宴午夜思親恆伏枕痛哭悲不可仰如是者歷有年又聞堂上病爲醫所誤因思程子爲人子者不可不知醫其言最有精理因研究醫學參九藏之動每值朔望謹忌諸辰必齋戒沐浴躬親蓬豆設其如在之誠日記言君子有終身之喪忌日之謂也可不謹乎臨沒之前六日爲七月五日適逢母帥太夫人忌辰先生臨祭痛哭流涕病因之加劇屬纊之前猶啜咽詔謨泰等曰天地之間惟人爲大全受全歸之義惟以繼志述事匡濟時艱爲最重要之事若夫慎終追遠敦睦九族尤爲立身處世之根本其勉之哉本支祖懷西公祠宇失慎先生爲重建之玄祖勳堂公祠宇傾圮先生爲修葺之寒暑風雨督工罔懈泊工告訖功先生心始稍慰又擴親親之恩於大二三五姊若妹之喪躬自泣奠撫其後嗣其教手足誼如此其他濟困扶危之舉更不可殫紀也且夫士生今世孝弟而已

矣氣節而已矣孝弟所以培氣節之基而氣節所以維孝弟之用處今日而不知激勵氣節則萎然荏然而以屹立於天地之間先生純孝既如上所述倫紀之間靡所缺憾平居尤喜誦武侯出師表張睢陽李忠定文信國楊忠愍史忠正諸忠臣烈士傳而於信國正氣歌忠正致清睿親王書則更往復流連吟誦悲歌不能自已嗚呼此誠發於天性者耶余嘗謂天下惟真性情中人乃能立真氣節既於先生見之矣先生居恆治經不分漢宋門戶惟以實事求是爲歸金石篆隸亦喜研究臨摩據德游藝優游彌性洵無間然退隱後又復動恤民隱孜孜樂善如先後修築堤工又以族姓殷繁建設義倉以廣贖養主郡中教育端飾師範詰姦安良捍衛閭里凡屬諸端均難能而可貴者既歿之後鄉人私謚曰貞孝可知其內行之純篤矣先生以清光緒六年五月十三日生民國二十幾年庚辰七月十一日卒春秋六十有一配邱宜人繼舒宜人子七人諱泰謨沁諱讓謨熙謨丕均存又諱毅庚年早夭女六人華馨華馨早夭餘均適望族孫男五人孫女三人論曰讓泰謨沁余及門弟子也其在國學專修學校肄業時溫乎其貌遽乎其志懇懇乎好學而罔懈蓋先生之遺型未墜也先生之德行余特爲表章之記曰善繼人志善述人事而其志與事則當傳燼於無窮讓泰諸昆季固當守茲勿替而世之聞先生之風者尙亦勉之哉

平湖趙春培先生家傳丙戌

歲丙戌孟冬月及門趙生欽一持狀來請曰舊歷十月十七日爲吾父殉難之期忽忽已屆九周矣戴天之恥失怙之悲鬱結不敢忘敢乞先生一言爲傳庶吾父之慘死於生前者或可移穆愉於地下乎言之潛然余深嘉其志之孝而哀其言之悲也案其狀則又肅然起敬曰世之殉難以死者已不易得矧義烈壯節正大之氣萃於一門者乎是烏可以無傳先生諱春培字寅桃別字晉堂浙江平湖縣籍其先世爲宋太祖次子燕王德昭之後遞傳至元初文簡公孟堅學士結廬當湖遂家於斯祖考翠谷公諱爲植清太學生居恆

讀書勵行恪祀祖先戒子孫以無忝所生爲訓清咸豐十年粵匪竄浙先生於七月十五日遇變殉國難其繼配張氏亦並殉焉其元配高氏高文恪公江邨尙書五世孫女考少閣公諱廷燮年十二遇寇被虜於杭州乘間得脫輾轉流徙行乞爲傭得不死妣金氏豈憐慈祥族黨稱之寅桃先生昆弟四人仲弟諱夏培字已柳庚申之變前先生一日被難妹襄蕙適同邑時孔昭十八年己卯日寇鴟張襄蕙從事地下工作以事洩遭寇難嗚呼前乎先生者若斯後乎先生者亦若斯眞壯烈矣哉平湖自陸清獻提倡正學敦崇氣節三百餘年流風未沫先生則儼前賢清介自守丁丑十月十六日敵寇自杭州灣登陸長驅入平湖先生初避鄉間未之知也翌晨自鄉返城遇敵被執迫脅爲鄉導先生怒叱之敵憤甚橫加鞭撻并搜得腰藏日記多藏敵愾語遂以利刃斫之死狀極慘嗚呼尤壯烈矣哉先生少時受業於先賢高文恪公喬孫閣如先生之門繼畢業於平湖師範講習所歷任競新袁莊國民學校校長新倉區高等國民學校校長並任教稚川學校治毅女子中學及上海嚴氏公學又結尊古社陶情社協募平湖經籍志著有善注表詩鐘格各一卷曾任浙省昆蟲局治蟲督察員臨海縣國民會議選舉監督公署特派員復充永康縣土地陳報處主任小試其才未獲大用性曠達不求仕進恆以詩酒自娛雖屢空晏如也德配費夫人有賢德子五長欽一肄業無錫國學專修學校旋入中央軍官學校欽二塲欽三習商業欽復欽隨俱塲女三欽仁早塲欽伍待字欽介蚤卒余維孔曰成仁孟曰取義讀聖賢書養氣節而已矣輕死不可也臨難逃避更不可也明浙省蠶山劉念臺先生著曰三關曰人已關曰義利關曰生死關且謂破生死關最難余之所以傳先生者以其死事之勇爲不可及也禮曰臨財毋苟得臨難毋苟免惟清操不苟得之人始能果決於一死貪鄙之徒坐擁厚貲官室之美妻妾之奉久已失其本心詎能無苟免乎如先生者可以風世矣欽一爲累代節義之子孫又沐前賢清獻之風修身立品之道當聞之熟矣尙其勉之哉

崇明陸才甫先生家傳戊子

先聖嘆善人不可得而見而於爲邦教民必歸諸善人又與端木子論鄉人之好惡則曰不如鄉人之善者好之其不善者惡之余常欲求鄉里善人以爲一方矜式子春正譜姪王君毓僑攜崇明同鄉陸才甫先生事略來請爲家傳余讀之爲起敬曰余向所謂善人先生其庶幾焉先生諱家嘉字才甫江蘇崇明縣人先世惠尊公自句容遷崇習武事有官勳五傳至先生考西垣公蘊藉工文章聞望達疊序間不幸幼學蚤世士林惜之西垣公生三子長家鼎留日得農學士次卽先生三家駒留美得工學士先生幼時遭家不造年十三失怙喪長丁母倪太夫人憂覺覺在疚誦詩至夢我及閱予小子諸篇未嘗不流涕願其志氣益踴厲風發膏欲以他國之長補我國所短發憤留學東瀛習法政殫精攻苦閱四載得政治學士學位歸赴部應試中孝廉任譯學館教習除年廷試列前茅授縣令分發浙江省大吏重其才能時延見垂詢財政暨司法諸要端先生獻可替否悉中機宜方是時世界元黃中原鼎沸先生蒿目時艱亟掛冠歸辛亥政變人權幾無保障先生慨然曰宋張子有言民吾同胞非有法律以範圍之則弱肉強食乾坤或幾乎息於是本春秋之大義揭律師制度成書上政府當道體之往來蘇滬間任律師職辨護俱達民情或以苞直進則嚴斥之又主任金閩海坊法政學校教務爲諸生導揚法律作之模範代議制立先生被舉蘇省議會議員繼膺參中兩院議員之選矯矯尤尤不事詭隨任省議員時有藉鹽墾公司霸佔民產者有影射紗產名義濫發鈔幣者人皆側目不敢言先生不畏強禦據理力爭卒寢其事此以法律揀人者一先生在滬時任律師公會執委有某氏讀書謚愿租界捕房恃外邦勢力鍛鍊周內誣繫榜掠瀕死者數先生仗義執言昭露出諸犴狴而皓吏奸胥之肆虐者皆科以反坐罪此以法律揀人者二日寇內變腥聞於天先生杜門輟晦大節凜然勝利後人事漸明矣而當崇邑絕續之交奸匪伺隙蠢動攻城略地七邑時驚事定鄉人有誤涉嫌疑

者被誣極夥家屬呼籲無門先生愀然曰彼無辜者忍令其沈孽海耶白於有司一日而得釋者百餘人歡聲遍閩闔此以法律揀人者三國庫空虛政府乃頒糧賦徵實令崇邑係濱海斥鹵農產求過於供不克負荷時先生患喘體羸扶病晉省力陳利害議遂寢此以法律揀人者四總先生平生曾辟爲地方檢察廳長却徵任律師事又歷任財政司法兩部祕書外交及魯案委員會委員取與必謹爲羣僚法式胡期天不慈遺喪我善人惜哉惜哉先生以清光緒十一年十月二十日生民國三十七年正月一日卒春秋六十有四德配蘇夫人先卒繼某夫人子一頌威尙幼爲善有後企予望之矣

論曰近世之言法律者胥本唐律疏義實根本於漢律虞廷明訓惟刑之恤禹謨言與其殺不辜甯失不經好生之德洽於民心好生者天地間之元氣也論語曰如得其情哀矜勿喜宋歐陽子曰常求其生猶失之死而世常求其死也慈祥愷惻之言善人君子舉奉爲圭臬矣

無錫戈仲翔先生家傳戊子

歲次戊子春余僑居滬濱錫邑友人戈君淵亮字子才來請曰先考仲翔公之歿距今四十年矣平生德性淵懿沈毅昭昭在人耳目而刻鏤不孝之心膺深懼湮沒不彰則罪戾滋重謹齋事略敦請椽筆爲傳藉垂不朽余受而讀之歎曰宣聖歎善人不易見若仲翔先生者洵不愧爲善人矣按先生諱明峻仲翔其字江蘇無錫縣籍祖考諱德孚考諱曉榮國學生先生天性孝友幼時遭洪楊厄隨親避難江北徙離艱苦亂平歸里幸屋廬無恙佐曉榮公迺宣迺啟迺迺適理疆田疇於以恢擴畜歲入七八百畝家道小康比長專師武侯之謹慎深自韜晦不事表曝令聞令望達於一鄉邑宰稔其賢能鄉里服其貞幹羣相推引請其董正一方先生堅辭不就而於地方善舉當仁不讓皆隱行其實不居其名每值隆冬改歲之時輒惻惻若有思人問之則蹙然曰詩言無衣無褐何以卒歲孟子云飢餓不能出門戶粟烈若斯貧民何以度歲於是潛行鄉

曲間至丙夜不倦寒者衣之餓者食之此豈非古人已飢已溺之德量歟至於三黨九族之無依者隣里有貧戶不能舉火者輒詳詢其所以致貧之由非四支懈惰彘有嗜好者均一一調恤之可謂仁至而義盡矣若夫婚嫁喪葬無力舉行者任恤亦如之天地之大人猶有憾惟水旱凶荒爲甚故盡力溝洫功德最鉅先生宅居荅湖五瀉壩稔知水利農田惟隄防是賴爰斥巨貲督修龍塘隄周家隄北浪隄槌之畚之甕之築之用是歲占大有樂利無疆附近居民僉歌詠曰此仲翔先生之德也口碑因以傳誦焉又以餘力興修八卦橋滋德橋懷陵橋百子橋工告訖功民不病涉此皆有關公益之大者至如表章先德則建宗祠致陸族誼則修譜牒恩逮黎庶則辦平糶培植後進則興學校其居恆忠信篤敬常書諸紳與子言孝與弟言恭勸用周旋壹以禮經爲則徵獨鄉里內之典型抑亦藝林之模範矣先生以某年某月某日生某年某月某日卒春秋五十有五元配趙夫人均有賢德子二淵亮淵晏王出恢復先業中華染織廠暨元大煤油公司有孝有德克世其家事王母某太夫人盡含飴之樂享壽九十二歲而終女六長適署四川榮昌縣顧鴻遠次適嚴麗甫三未字四適朱晉範五適嚴德軒均趨出六適高鏡秋王出孫幾孫女幾門楣光大可前知已論曰書言聰聽祖考彝訓詩言孝子不匱永錫爾類其類維何望家之靈凡人家庭所難得者不在富貴赫奕而在于孫繩武續戎善繼善述則靈史有光榮矣余與先生哲嗣子才君爲毗鄰稔知其芝蘭玉樹秩秩溫溫且篤守前型樂善不倦他日門第崇隆可限量哉向例凡鄉里有善行者即可載諸志乘爰記仲翔先生之行詣俾先編諸靈史云

無錫朱福明先生家傳丁亥

先生諱福明字錫章江蘇無錫縣人世居邑之北鄉雙河曾祖諱某祖諱某考諱某子姓繁衍爲棠陽望族其哲嗣廷墀廷烈介余宗姪滋源持狀來請爲傳計距先生之歿忽忽已十年矣滋源夙與其子若孫相知

爰述其累世積善之功太和洋溢施及後昆振振公子有壬有林雖遇習坎重險而邁往貞固之精神實足以承先而啓後然後知修德獲報之說爲不爽也先生少時食貧輟讀隨篙師操舟爲業苦心志餓體膚安之若素每慨然曰吾氣骨得所磨鍊矣暇輒閱古來忠孝節義傳記怡然理解所以爲人之道識者歎爲具有夙慧有清之季海禁宏開萬物隸通商業萌芽始中國則倣泰西製造品日新月異先生沈幾觀變於光緒甲辰勸建裕康貨號於邑之北大街爲發展權輿不數年營業丕著又勸福綸襪廠於邑之西城脚裕康襪廠於邑之厚德里祭乎隱隱各得其所工人賴以維持生活者無慮數千人厥後天產札苧品彙滋善人工造作供不應求爰於民國二十四年在邑之吳橋盛岸浜購地鳩工庀材擴充爲裕康電機針織廠屋宇鱗次櫛比杼軸駢陳馳電掣規模益宏遠矣懋遷之廣無遠弗屆惟是先生經營事業固屬商戰英雄而先生之宅心行善尤有不可及者吾錫紅卺會溥仁會爲當地最大慈善機關余於昔年呼籲各省災荒罔不立應而先生自周甲後以廠務屬兒輩入爲會員壹意靜修古人所謂爰清爰靜守德之宅先生默斯旨矣自是厥後益致力於博濟散財發粟惠恤災黎樂而不倦由是紅溥兩會乂壇奉濟祖訓錫字曰惠潤時人交稱之以爲寵榮昔宋朱子爲同安主簿有放賑詩云若知赤子原無罪合有人間父母心惻怛慈祥溢於肺腑先生之爲善其報本於先正之典型歟至於掩骼埋骸既澤枯骨又益衛生充足欽焉平居處世以誠待人以寬律己以嚴齊家以儉勤常誦朱伯慮先生家訓爲座右銘鄉人有爭執則必訴諸先生以俟判斷皆悅服而去其善言善行更僕難數丁丑事變先生挈難友以行者百餘人衣食賴之漢陽風鶴播遷宜昌是年先生七十有一痛家國之陸危哀民生之憔悴俛仰抑鬱因以得疾遽沒於宜昌途次天喪善人傷哉先生以清某年某月某日生民國二十六年某年某月某日卒德配沈夫人夙具賢德治家有法度子二長廷埤次廷烈能繼志述事不揚前烈喪亂既平在滬戈登路恢復錫邑裕康電機針織廠申廠復組

織振興紡織廠於錫邑裕康廠原址揆張實業擴而充之先生可穆愉於九京矣廷墀娶趙氏廷烈娶周氏女三長適都蚤卒次適孫三適嚴孫五人如水如鏡如蓮如潤如楠均嶄然見頭角孫女二雅望聖璽蘭玉森森一門鼎盛余常謂居今之世乃爲善大好時機惟望廷墀廷烈昆仲益勉於行善恢胞與之仁懷守先人之教訓他時寢熾寢昌罔有涯涘猶不僅目前之發達而已也詩曰貽厥孫謀以燕翼子所謀維何孳孳爲善而已爰傳先生之行詣更爲賢子若孫勗焉

江陰徐邦基先生家傳丙戌

人之所以見重於社會者仁而已矣信而已矣仁信交孚遐邇靡聞於是鄉里奉爲典型子孫卜其昌熾非偶然也吾謂徐先生邦基可以當之矣先生諱志根邦基其字江蘇江陰縣籍曾祖諱某祖諱某考諱嘉言世有隱德妣夏太夫人賢而有能嘉言先生於清咸同時遭粵匪之難攜槍經天戈鏗滿地風餐露宿飢渴顛踣辛苦艱難備嘗之矣亂平後夏太夫人來歸誕生邦基先生自幼聰穎出就外傳讀四子書了解大義目數行下孝行尤摯一日自塾歸聞乃父叱犢聲慨然曰小孝用力我粗知稼穡艱難忍令復從事於耘耔襁褓間乎於是棄其所學代父耕課晴問雨自穗黍糜芑以逮瓜瓞果臝之細罔不經營而擘畫之而定省溫清之事亦未嘗缺失吾聞古有趙至者性至孝聞老父叱犢聲掩卷而泣人聞其故曰余幼讀使老父勞苦若斯故自悲耳後卒能發展所學以此方邦基先生何多讓焉先生治農業數年後倉箱充切室家盈止漸臻小康矣書曰鑿牽車牛遠服賈用孝養厥父母先生知其大義復慨然曰一家無衣食則急一鄉無衣食則窮一國無衣食則危於是振米業以救人之飢崇布業以救人之寒往來運輸信譽卓著鄉人莫不熙熙而登春臺焉平生喜慈善業凡窮獨無告必傾囊以助之如不及然常詔其子貴榮曰凡人以報德爲先不可忘恩負義爲善最樂古有明訓汝其志之先世故居廿三家村厥後生齒衍繁先生篤友于誼將舊宅

讓與弟姪輩下築於本鎮西南營建大廈六階兩楹棧屋櫺比地當水陸交通帆檣林立斑孟堅所謂紅塵四合煙雲相連盛矣夫商業之繁榮亦彷彿得其意矣先生生於清同治丁卯年某月某日民國辛巳年某月某日卒享壽七十有五葬妯娌山牛舫村之阡德配周夫人享壽六十有六子貴榮字宗德武進中學肄業兼祧胞弟子楊後孫五長如資孟世次柏春闕立復且大學肄業三麗春梁豐中學肄業四泳春江蘇省立南菁中學畢業五同春江陰縣立中學肄業女四長適青陽章嘉惠次適青陽王可觀三適青陽周家祺先卒四亦適周氏爲繼配孫女七四正青陽初中畢業五涓六安七靜均幼讀子孫振振深望其謹守祖考之彝訓紹承先德云

論曰余弱冠時肄業江陰南菁書院居蓉城者四稔見其風氣樸質崇文尙義心輒嚮往之惟近今以來吾蘇人士多有廢經不讀者然聞澄江風俗尙能如舊讀書行善居今世爲尤急矣吾傳邦基先生爲之神往不置也

江陰郁詠唐先生家傳丁亥

師道立則善人多有訓蒙師有成德師有傳道師師之格不一其爲教亦不一小以成小大以成大是故師也者文化通塞之根源而世道人心因以晦明升降者也吾聞郁詠唐先生遺行喟然歎曰師道其於今未墜乎先生姓郁氏諱棣蓼詠唐其字江蘇江陰縣歲貢生例授按察司經歷曾祖諱誨數祖諱某考諱介祉增貢生兄弟凡幾人先生居長幼穎悟過人好學不倦弱冠補博士弟子員旋食廩領邑中長老咸以大器目之先生益殫志精研自六經外旁逮歷史諸子百家靡不蒐討治古文辭壹以桐城姚姬傳先生爲宗曰此文章正軌也平居出所學授生徒爲人師歷四十年自澄江教讀外嘗客梁川客蓉城客昆陵棧所蒞皆以姚氏考據詞章義理三者不可偏廢爲主旨而壹歸於有用嘗曰周易明訓多識前言往行以蓄其德

士人先德器而後文藝若徒以咕嗶爲功則失之矣諒哉斯言漢揚子曰師也者人之模範也模不模範不範爲不少矣豈非誤人子弟乎且夫里塾黨庠之教必自家庭孝弟始先生有丈夫子五甯進而詔之曰我家遞傳四世沐浴詩書之澤絕無踰越範圍者青氈爲我家舊物塾師者進德修業之根基也得良師則一家盛且興反是則衰且替其家庭彝訓若此余常謂今世訓蒙之方必以孝經論孟爲根抵循是以進則成德傳道駸駸上達與先生志意不謀而合深願推廣其說世道人心庶有豸乎民國二十一年先生第幾子祖頤病沒先生抱西河之痛伊鬱不舒於二十二年二月十一日卒鄉里咸歎曰吾鄉少一師範善人矣德配徐夫人溫厚淑慎聿儉聿勤先生得盡心教授賴內助力居多常晝夜紡績無少輟晚間一燈荧然課諸子讀織機聲與讀書聲相應和族里鄉鄰舉欽其賢生子五祖頤祖泰祖同祖安祖慶凡五人頤祖泰先卒祖安畢業於國學專脩學校余門弟子也丁亥孟夏持先生行述來請曰吾父棄養已閱十有五稔矣不孝等不善繼述且未嘗有所建樹願吾父學生績學累行足爲後嗣楷模深懼湮沒不彰罪戾滋大現屆修家譜之期請先生立傳冀垂不朽余嘉其情辭懇摯能永言孝思也爰述崖略如此

論曰往者先大夫宵訓文治曰教讀一事造福在於斯作孽亦在於斯何謂造福督讀經書教勸品行是也何謂作孽膚淺庸陋放任下達是也文治奉以兢兢弗敢隕越夫教讀爲士人恆業而福孽判於無形之中危乎微乎可不慎乎今觀詠唐先生教授精勤庶幾能造福者乎據祖安述先世教讀已歷四代自茲以往繼志述事將綿延至十世數十世而無窮庸有艾乎其在詩曰成人有德小子有造今任師道之責者其以先生爲矜式乎

無錫李晴村先生家傳戊子

歲次戊子春門人薛君桂輪以其外王父李晴村先生事略來乞傳於予予維先生有四德秉承家學精研

岐黃自設藥舖貧病概不受酬紅羊之亂甬平疫癘大起先生惻然憫之迺開錫邑風氣之先延攬同志創設玉祈鎮藥局博施濟衆生命賴以保全者不可勝數仁也先生自奉節儉而善養父母又拓地重建李氏宗祠親自督工不顧勞瘁孝也平時好讀史鑑對於歷代忠臣義士感慕最深尤拳拳服膺壯穆張睢陽之爲人因集資重修武帝廟又創建雙忠廟於鎮南鳳阜墩俾資瞻拜而樹模範義也先生以世居玉祈鎮東街晚年目擊道路崎嶇行步維艱迺毅然鳩工出資興修不久西街響應全市井然至今遺惠不淺慈也至於待人以誠謙和爲懷凡事以身作則不愧一族之長排難解紛勸善規惡不用強制純然發乎天性執業有恆老而彌篤盡瘁鄉邦始終不渝亦莫不以此四德爲本嗚呼方今世道衰微人欲橫流苟有一技之長輒挾以欺人利己而主持地方行政者又鮮不假公濟私置民衆福利於不顧終則身敗名裂甚至子孫受其慘報若先生者可以風矣先生克享期頤後裔繁昌詎非天之所以報善人耶予故樂爲先生傳子又願先生之族人皆能以先生之心爲心以先生之行爲行而傳之於無窮焉

永康呂月軒先生家傳丁亥

先生姓呂氏諱鏡蓉字月軒浙江永康縣人世居邑東族姓繁衍世有積德明代鼎革時其十世祖某避亂遷居距城三十里之儒家村曾祖妣氏某祖妣氏某考雙珩妣氏某先生十餘齡時椿庭棄養哀痛哭泣如成人乃祖與祖妣撫養之方是時家境清寒先生從事耕種出入息耘耔襁褓罔或倦怠乃祖見其秉性誠懇又聰穎異常兒令其耕而兼讀清光緒十八年德配戴夫人來歸得內助學益進踰年生長子師鈞厥後科舉停止先生自顧身世慨然曰吾親老家貧亟須籌謀潔養不得不改絃易轍矣爰棄儒業商挈其弟擬設呂中和行於河東貿遷貨居信用漸著家業稍稍裕嗣又舉長女某及次子師堯仰侍俯蓄辛勤倍至戴夫人因病逝世無何爲鴛鴦戩翼時維光緒三十四年逾歲繼配應夫人來歸持家井井有條內外

秩然周易家人卦之四爻曰富家大吉先生蓋得是兆矣於是高掌遠躡審物力操奇贏往來於甯泉杭紹閩晉茶筍等業且夫商業勝敗得失之由自有根本而人以其在無形之中輒憐焉不察是何也蓋商業道德是也茶筍兩業或雜低貨售於外人遂爲人輕視此非道德窳落之繇歟先生察知其勢力圖改進同業者因其才識敏果然諾不欺德則屢中羣投資以委託之先生指揮如意攬厥綱維盈虛酌濟人皆謂范蠡計然之策重見於茲永康之營商業者曰此呂先生所營業也擴充至上海市場亦曰此呂先生所營業也雲從景坳爭趨如鶩盛矣夫顧先生商業雖如是揆張而自視益欲然不足其至性誠篤既如前述而見義勇爲不詭隨流俗在河東時有族叔和一公墓道被人侵漁歷久湮沒代訟之官得直遂歸其主永資仁政橋資產爲人竊奪亦訟之歸公儒家村聚族羣居者百餘家食貧曩曩歲海饑輒虞溝瘠先生乃商同族雄於貲財者見之昆仲捐田並設義倉得古時常平倉之遺意宣統三年生三子炳煜而師堯方出外就傳頭角崢嶸先生因慨念清寒子弟無力求學倡議指撥先代祭田若干畝歲取息移充獎學基金性矯亢見義不落人後其敬宗收族睦任恤之德皆根源孝弟而出論語曰君子務本本立道生其可風矣夫輓近以來家庭教育寢廢先生誨其子女曰荀子有言騏驎一躍不能十步駑馬十駕功在不舍凡人則須努力則人所能者我必能之泰山之溜可以穿石惟其不息也優劣之判在自勉與自棄耳斯言也不獨可垂爲家訓矧頑起懦社會中可奉爲名言居恆好文辭嫻書畫數學尤精通醫理丙夜嚴寒求醫者無不披衣急趨之不取值嘗在遂安監理松盛冶廠夜分匪徒呼嘯猝至先生倉皇奔避上書鳴之官邑宰與語心器之折節與交聘保衛之策鄉民咸感其德先生生於清光緒某年某月某日以民國七年某月某日卒享壽幾十有幾德配戴夫人繼應夫人子三長師鈞業農次師堯上海慶豐公司保豐紡織染廠織造部工程師健輪織布準備廠董事政府特許爲專利師堯式染色漿紗機發明人亦異數也炳煜福建浦城交通大隊長女

某孫幾人今距先生之卒二十餘年矣師堯懼先生嘉言懿行久而弗彰持狀乞為傳余嘉師堯之孝思特著之載諸家乘易曰積善之家必餘慶師堯昆仲勉勉循循積善勿懈則其家之興盛庸有艾乎富翹首以俟之

無錫王君翰仙家傳丁亥

自周文作周易象辭提倡以君子為教孔孟於是君子教育論語學而篇首重君子教育堯曰篇以君子作結計論語中稱君子者百有四其中又贊嘆之曰得見君子者斯可矣又曰君子人與君子人也其勉人為君子如此其至吾聞無錫王君翰仙之事略喟然曰是不愧近世之君子矣君諱汝昌字翰仙江蘇無錫縣籍曾祖諱恩綬字樂山以知縣分發鄂省當是時粵匪方圍武昌城入督與城共存亡城陷遂以身殉盡武愍贈知府銜賜祭葬祖諱庭楨字子泉歷任湖北施南府武昌府知府入祀名宦祠父鏡寰字次清秉性澹泊工詩詞著有梅墅集行世皆能以君子世其家母朱氏溫良恭儉宗族鄉鄰僉稱其賢生二男四女不幸於庚戌年卒惟時君年甫十七哀痛逾成人弔者咸悲之君幼聰穎早歲畢業於北京大學應文官考試分發交通部供職洎國民政府成立歷任交通鐵道兩部職務丁丑歲日寇內熨勢披猖其君隨政府遷渝調任教育部秘書洊升參事兼國立禮樂館編纂及總務主任等要差君喜曰禮樂為君子之事吾性所近也乙酉歲復員調任上海市教育局主任秘書夙夜殫精恣模罔懈旋任社會教育處處長兼美術館籌備主任嘗喟然曰君子之道誠之為貴鏗而不舍庶幾有益於社會有裨於國家听夕策勵而病根自此伏矣疾既作猶伏枕批覽公牘或敦勸其稍休則曰子方寸之間不遑暇逸勤於所事庶本心稍安爾用是搜疾彌篤遂綿綴不起嗚呼余常謂凡人能盡其性分之所固有職分之所當為則天下自治若君之兢兢自守待人接物豈出於至誠豈非近世之難能可貴者故其卒也鄉黨僚友莫不惋惜之曰君子人也余子婦

俞慶棠辦理社會教育與君共事數年亦咨嗟太息之曰此君子人也君天性至孝在渝時以不得定省爲憾時動狄公白雲之思與曾子歸耕之感平生精繪事有遺墨數幀曾陳列於上海市美術館之名畫展覽會清新雋逸脩然有出塵之概蓋志潔行廉故發於外者如此也君既卒踰月其妹丈淞源余姪也來請爲傳爰敘而書之君生於清光緒二十年甲子三月十九日申時以民國三十六年丁亥七月二十二日午時卒春秋五十有四德配施氏生子四長世元供職上海市教育局次世俊蚤卒三世貞服務中匯銀行四世沌肄業復興中學女三靜儀適顧君其行靜昭靜簡早卒深望其後人皆以君子之行交相勉勵庶幾克振家風云

嘉定胡君春臺家傳丙戌

君諱士熙字春臺先世居浙江山陰縣後徙江蘇嘉定之南翔鎮遂占蘇籍考諱啓乾妣某太夫人本生考諱懋源妣某太夫人君爲懋源公第四子幼聰穎英偉啓乾公特器之商於懋源公嗣爲己子君遂爲啓乾後六歲入家塾從馬陸封華卿先生授讀十一歲改入姊丈李策齋先生塾讀四子書十七歲從本邑黃閣伯先生以講解諸經及讀書禮記爲日課中西兼習於是窺見聖賢經旨及新學徑塗清光緒三十年學使唐春卿先生督學江蘇君應院試補博士弟子員先是畏陵盛杏蓀官保鑒於國勢之阻杭亟擬採取歐美各國之長以補吾國之拙爰設立南洋公學以郵縣張讓三先生充提調君往赴試得列前茅入校肄業教員通州馮君子久武進程君芝巖深器重之旋公學改爲郵傳部高等實業學堂余自北京歸承乏監督於每星期日親自授課講漢代訓詁學宋代性理學及古今文學源流本末君於是知學術本原不在咕嚕章句之末也宣統改元君畢業土木工科部派江甯傳詹天佑兩先生蒞校覆試列最優等余力保君品學邁倫才堪大用於是郵學二部會同奏請獎勵奉旨恩賜舉人以知州儘先補用並由郵部奏派赴英國格

蘭斯哥大學與蘇格蘭皇家實業學校肄業兩校工程學於世界最爲有名君入校後深自慶幸晝夜攻苦
夙規兼營期滿得文科學位及機械工程師名位以歸取道西伯利亞游覽德法意比俄英等名都君至是
不但學術湛深閱歷益闊遠矣回國後余聘任交通部工業專門學校工科教習任職六年勤慎罔懈民國
八年京師延攬人才君入交通部補授技士路政司技術廳等科員調車輛處總務主任官郎署者十稔南
京定都以還後赴京漢膠濟等路辦理材料弊絕風清又兼任青島市政府工務設計局科長技正亦歷十
年海波沸騰日寇內讐維時君初歸海上而成渝路局延充秘書兼總務科長君忻然赴局從事經年遍歷
川滇省諸名勝地會日寇鐵鳥盤空蘭石震宇於是復返滬寓目神傷不與世通者八年嘗自嘆曰余賦性
恬澹仕宦非素願回憶昔年遨遊各國名都登泰山上房嶗山燕京西山昆明名山又攀躋峨峩峩春城絕頂
眺覽桂林陽朔諸名勝君然長嘯旁若無人今此境不可復得矣幸而時局返泰得爲太平之民與孫黎以
經籍書畫碑帖等自娛意有所適夢亦同趣猶髣髴中年子役時也嗚呼此可知君胸懷高尚絕塵寰矣
君以清光緒九年九月某日寅時生民國三十五年三月十日即農曆二月七日戌時卒春秋六十有四配
王夫人璩齡有賢德子二長可時在渝供職聞父病星夜馳歸侍承有孝有德其現任救濟總署總務處處
長飢渴情殷克稱厥職次可昭先卒女三長可宜三可寧先卒次可宜孫三以經以緯以德孫女一以福詩
曰宜爾子孫又曰俾昌而熾余有厚望焉

論曰造物之生才異矣哉有才而有德者既不易覯如君者可謂才德兼備矣然而未竟其用不克大顯其
經猷抑又何也余掌交通大學時君爲余建造圖書館沐雨栴風勞動卓著並爲余撰記皮諸調笛藏壁中
維時同學胡生粹士才德與君相埒迺天既喪粹士復阨春臺余心滋戚矣然以彼衡此粹士文孫尙未成
立而春臺哲嗣可時鬢發穎豎有聲於時則春臺亦可穆愉地下而無遺憾矣夫

武進沈耀廷先生暨德配汪夫人合傳丁亥

丁亥春仲及門沈君秉魯來請曰近因家族修譜而先君先妣事實均有足傳者願先生爲文用垂不朽余繼修譜敬宗收族之盛舉且秉魯孝思誼奚容辭按先生諱邦彥耀廷其字別號隱墅江蘇武進縣籍其先世系出唐長史秦初公神堯末刺湖州卒於任民戴其德堅留其子孫家吳與宋慶曆間有諱勝者偕其弟北徙晉陵元末擾攘勝之孫諱名者卜居邑東南小樓名之長房孫名璣者郡鳳生於明季遷邑南鄉黃塘沈家村十三傳至諱順秀者遭紅羊亂蕩析離居而天性孝友克世其業生子三耀廷先生居長伯考諱順郎無子以先生爲之後性聰慧誠篤七歲已知勤學嶄然露頭角年寢長時與優秀人士會文於前黃三近書院屢列前茅同儕折服嘗一應童子試以發語傷時被黜憤曰科舉豈足發名成大業迺授徒講學本原詩禮不襲迂遠之論獨究心時務彘研格致算術學從學者日益衆辛亥政變後先生謂非教育不足救國爰約同志創設小學於運村鎮鄉里風氣爲之丕變繼又出理鄉政凡交通水利慈善諸端殫心規畫成效聿著鄉人至今德之年五十有九患瘠疾翌年夏某日忽語其德配汪太夫人曰余平生志在匡時爲環境所迫事與願違不無遺憾嗣後教子訓語惟我夫人是賴言訖溘然又撫秉魯等而詔之曰我死後治喪與奢甯戚勿事餽張至於爲人之道內則慎獨外則慎交勿爲外物所誘一念之差終身之玷汝其戒之哉家人方訝其言之不祥乃越七日竟卒嗚呼此非具大智慧而前知其身世者耶汪太夫人系出宜興楊橋望族諱克明先生長女幼婉淑順嫻內則教年十七來歸耀廷先生槃區滯澗致敬無形事親以孝接下以和蘆布脫粟不求華美春桑秋稼勉有無詩天保篇曰吉蠲爲糧是用孝享夫人有馮洎耀廷先生捐館後秉魯昆仲有甘旨之奉輒愀然不樂蓋追憶耀廷先生不克洗腆與共也嗚呼此又非至情至性發於不吝己者耶可謂節義兼全者矣先生以清同治六年丁卯七月十三生民國十五年丙寅五月二十八日卒

太夫人以清同治十一年二月二十六生民國二十一年壬申八月十三日卒冬合葬於村西順秀公塋之昭穴政府林主席題其墓曰垂示後昆生子五秉鈞秉正俱天殤秉魯畢業上海交通大學電機工程學院電信系遊歷英美法比各國飽學歸歷供要職現任交通部電訊總局總視察張谷鸞乘蘇精營業娶朱璉乘一畢業交通部吳淞商船學校現服務民生實業公司船舶處娶孫雪瑛女三長桐生適楊君光圻次秋生適陸君俊生三梅生適李君培甫孫九係女四門庭鼎盛識者知厥後之必昌云

江陰沈源興先生暨德配謝夫人合傳丁亥

易傳言庸言之信庸行之謹淺識者於家庭之言行或忽焉不察不知此正和氣之綿延而充積者也一家多和氣則一鄉一邑化之矣然則保合太和之詣不綦重哉吾於江陰沈源興先生暨德配謝夫人懿行以爲可以當之矣先生姓沈諱金川源興其字江蘇江陰縣籍本生考名揚公嗣考維揚公世居本邑南街後遷春陽南沿河至先生歷五代世有積德夫人謝氏同邑潘家橋嘉應公長女兩家俱望族也源興先生幼敦行孝弟家故業豐營商業願數奇屢遭折閱家遂中落夫人出奩田數畝售以佐之困勉有無朝齋莫臘意泊如也乃不幸先生以處境迍遽遽爾殂謝夫人擗踊欲絕飲冰茹蘗艱苦備嘗又以食指孔繁膝前共丈夫子四女三男長次俱殤存者洪祥洪森二人長女適南沿河謝氏壻早卒有遺腹子乃以餘乳哺其弟洪祥昆季之生也夫人年已四十餘矣迨夫人之歿也洪祥甫十二齡洪森甫十齡舉凡家庭一切瑣屑之事若教養若婚嫁若慶弔存問若日用飲食衣服寒暖之宜悉由其長女料簡而噢咻之故洪祥昆季每曰大姊之恩不可忘也然溯厥本原皆由源興先生與謝夫人懋昭淑德和氣充周有以致此蓋天道人事之報有必然者先生以清道光二十八年十一月十五日生光緒二十四年二月二十六日卒夫人以清咸豐四年五月二十二日生光緒三十二年十月七日卒子四女三如上所敘洪祥昆季騰譽商市均克世其家

焉論曰余弱冠後肄業江陰南菁書院居凡四載蓋先生梓里也其俗樸而隨其風文而質其人直道英峙象有尚武精神孟子有言一鄉之善士斯友一鄉之善士洵不誣也先生伉儷平居不事表曝而庸言庸行豈重一方豈偶然哉蓋由其樂善之誠遇戚族姻婭鄰里鄉黨有關公益之舉靡不悉力以赴之是以善氣彌綸造福於子若孫有如是也詩曰俾昌而熾洪祥昆季恪守彝訓其益勉之哉

上海黃雲僧先生生傳丁亥

歲隴丁亥季冬之月及門上海項君鎮方來請爲其同鄉黃雲僧先生作生傳余以生傳非古謝之項君曰黃先生亟求敘其生平以自觀省且已有朱君孔文暨鎮二文爲之先例矣余乃按其所述敘之以爲傳先生姓黃氏名宗麟一名蘊深雲僧其字上海閔行鄉人祖諱橙考諱兆熙世有積德令聞垂一鄉先生幼時習科舉願不屑屑於帖括學抗心希古絕不趨時未弱冠補博士弟子員嘗以爲學貴實用咕嗶奚爲爰借顧丹泉鈕揚生兩先生創辦強恕學校於馬橋一時同氣相求雲從景附咸知實學之爲貴矣先生又以時局多艱必須取他國之長補我所短於是遊學東瀛習法政學成歸國應部試中舉人廷試考績稱最授七品小京官分外務部時維宣統三年國步初更任華亭地方審判廳推事而當道稔知先生諳練外交調任外交部僉事旋出任朝鮮領事代總領事弊繁益著當是時國事嫻蟻先生蒿目時艱中心伊鬱著殷鑑一編用抒憤抱識者鑒之世界聿新交涉益形嚴重於時有華府會議我國外交名家若顧惠慶若顧維鈞若王寵惠諸先生致聘先生掌文牘任機要秘書先生精細縝密懲前毖後收回利權不少旋參與關稅會議賢勞卓著抑更有進焉者漢文帝有言與我共百姓者其惟良有司乎有司者親民之官而閩閩太平之基礎也然非實施不足以顯其才長元吳三邑爲蘇省治平綱維方是時蘇省主席鈕先生稔知先生能始則辟任要職翊贊機宜繼則出任吳縣縣長三邑統歸轄治先生本學道愛人之旨勤恤民隱興革爬梳爲民

生謀利至今父老尙有稱述之者出宰二年省席易人卽掛冠歸旋又應鈕先生招供職餘敘部及蘇省教育經費管理處而對於桑梓公益如公款公產慈善團俱悉心董理其事比歲隱居海上以詩酒書畫金石自娛有陶靖節之風焉所著書有執軒印草公法私法之區別閱行詩存竹岡黃氏家譜已行世殷鑑雜著華胥遊詩稿各一卷待刊德配張夫人生女二長人玉畢業人和醫院適顧次憶螢燕京大學理學士適徐繼配吳夫人生子六長廷錫出嗣早卒次天錫次桂馨次高錫地錫厚錫均大學畢業魯頌之詩曰君子有穀貽孫子深望其子孫勿替引之以光大其門閭也

論曰易言積善餘慶又言善不積不足以成名先生高尙其事天懷淡定不染世俗委瑣貪庸之習自茲以往由耄叟以至期頤可卜也論語言知者樂仁者壽先生樂善兼全聞其風者可以挈然高望矣

武進張惟燾先生傳丁亥

丁亥季春武進張惟燾先生屬余及門湯生毓夔紹介請作生傳並以自述文見朕余謂生傳雖非古然舉平生事蹟臚列而時術之亦人間愉快事也先生名學翰字煥生號惟燾籍隸江蘇武進曾祖諱玉官祖諱洪仁考諱國華叔父諱德華均邑庠生芹藤聯芬鄉里稱羨其薰陶於詩書禮義之澤非一朝夕之故矣先生昆季三人居最長幼聰慧格庭課以識字年終考綴約熟二三千幾於過目不忘七歲入塾從德華先生讀越八載四子五經均精熟年十九應童子試先後遊胡復孫沙小峯兩先生之門年二十三李宗師殿林督學校士取而不傳繼聞邑中錢名山先生覃精古文聲譽卓著亟往受業年二十五唐宗師景崇督學江蘇先生應試獲雋蓋困於小試者數年至此迺脫穎而出可喜也自是厥後設帳授徒二十餘年壹以敦品行崇實學爲主旨平生不尙浮華布衣脫粟訓教子孫惟以克勤克儉文行交修爲本與人交重然諾崇信用嘗慨然曰宋歐陽子有言利不必溥於物要其心之厚於仁吾力雖不能施濟而欲立立人欲達達人之

願當奉聖訓以終身矣於是見善勇爲凡興學施賑修橋設渡諸善舉靡不惟力是視可謂善人矣至其處家庭中之庸行又有足稱者方先生令弟泉生之生也在清光緒甲午二月妣楊太夫人產後櫻疾先生侍奉湯藥視無形聽無聲晝夜弗敢離無如竟不起祖母胡太夫人以其聰穎勸學恩斯勤斯而繼母莊太夫人亦願復周摯以故庭闈融洩絕無間言歷十餘年如一日亦難能而可貴矣泊胡太夫人暨國華先生棄養先生以家運屯遘勉力支持無虧無憾先人餘蔭繼述弗渝戊申援俗例兄弟析產先生以爲產業身外之餘事也昆季天性所固有也凡祖遺租債悉以讓弟其敦親誼尙廉潔如此德配賴夫人同邑禮嘉橋襄廷公次女明達靈警慮事精勤居家深得內助丁丑九月日寇內熨蚩霧障天先生挈眷避邑之瀟湖濱越年又徙蘭陵先居白雲渡後徙麻巷歷六稔與高君景憲朱君溥恩許君光世相過從杜老詩云山中儒生舊相識同話夙昔抒懷抱先生有焉已而國土重光言旋言歸復我邦族先生忻然曰吾得享太平之福矣先生現年六旬有八與夫人同庚子幾女幾家庭之樂肅肅離離蓋積善所致云

論曰先生從錢名山先生遊名山余之執友也懷黍離麥秀之感御道冠以終身其志節早著天壤間先生爲名山先生高弟其衷必有度越尋常者余嘗作楹聯云人生惟有廉節重世界須憑氣骨撐先生同志其必以氣節提倡當世矣

太倉孝貞女陳氏生傳乙卯

余於甲寅歲爲陳封翁硯香先生撰家傳畢王森大令復述其女弟貞孝行誼甚悉且曰余女弟之真人知之願其孝行有不可沒者君能援溫公爲范蜀公例及生存而爲之傳使天下知孝行之尤大而俾余弟藉以不朽可乎案女陳氏名寶芬字蕊雲硯香封君之季女幼許字同里汪曾緒未歸而曾緒歿聞變即撒環瑱屏紈綺立志守貞有勸之者輒涕泣曰余命不辰復何望獨母氏春秋高動息需人余奉母以終身矣他

非所知也自是依依膝下跬步不離凡飲食與居燥濕寒煖之節視無形聽無聲如是者歷二十餘年光緒三十一年秋八月母歿女痛哭晝夜不絕聲與之食不食凡十有餘日形骸瘠甚女兄弟苦謂之曰禮毀不滅性爾死不得爲孝母有靈滋傷厥心且又何以處兩兄事死如事生事亡如事存以終天年不猶愈徒死而傷母心乎女聞言稍進飲食有間謂諸昆曰我即死當於我父母塋旁覓尺寸地以埋我吾願畢矣女生性閒靜喜讀書時以吟詠自遣現存年五十有一

前史氏曰傳曰一與之齊終身不二妻之爲言齊也謂成婦而後誓以終身非一受其聘終身不二也明歸震川氏謂既嫁而後夫婦之道成聘則父母之事而已女子固不知身之誰屬也有廉恥之防焉自後論者或疵之或諒而予之要之皆以爲賢知之過非中庸之道也攷諸朝廷旌表之典曰節孝曰貞孝必繫以孝者孝爲天之經地之義而貞與節其後起者也事孰爲大事親爲大守孰爲大守身爲大女以未亡之身竭方以事其親且誓以魂魄隨父母於地下而卽以守身不字者報其已聘之夫所謂權而得中視世之沾沾以守貞爲榮者有公私之判焉余故徇王森之請作孝貞女陳氏生傳冠孝於貞者示所重也且以教孝也

崇明龔母沈太夫人家傳丙戌

余讀周易坤卦傳曰至哉坤元乃順承天知乾元之順必有坤德之貞以輔之是以家人卦曰男正位乎外女正位乎內男女正天地之大義也龔母沈太夫人世居崇明淑慎溫恭早嫻禮教子歸深嚴先生視元配瞿太夫人之子如己子蘋繁中饋母忝厥職生子方縝方縝方縝以教以養至於成立太夫人事舅姑維謹克盡孝道相夫以義教子以慈不幸深嚴茂才捐館中年喪偶痛不欲生只以呱呱在抱節哀願變死節易撫孤難審其輕重亦明於大義者矣按龔氏累代孝廉聯翩科第爲崇邑望族吾太邑相隔一水風聞其名今同鄉蔣君平階與龔生方縝夙係知好持其太夫人行狀來乞余爲傳竊思聞幽發微儒者之責其何以

辭太夫人柔嘉維則有守有爲位居繼室而前室之子方績方績一視同仁不分畛域其難一也夫死後撫育諸孤歐家蓋荻謝氏機杼篝燈課子能世其業其難二也平居荆釵裙布克勤克儉孟光之德敬妻之勞兼而有之其難三也平時御下有恩絕無疾言厲色好施與遇困乏者必應其求周禮陸嫺任恤之道老而彌擊其難四也易坤之文言傳曰積善之家必餘慶所謂積善者庸德之行庸言之謹爲孝爲悌爲慈而已矣有天地然後有男女有男女然後有夫婦夫婦爲五倫之一不出家而成教於國知陽剛而陰柔乾健而坤順由苦而甘困而不失其所亨其來有自今子孫繩繩或職司教育或投身政界寶桂謝蘭荀龍薛鳳分道揚鑣均克自立而後知天之報施善人爲不爽也吾故樂爲之傳俾後世講倫紀之學者是則是倣焉。

丹陽姜母姚太夫人家傳丙戌

太夫人姓姚氏其母姜氏先世居江蘇丹陽滕村考諱壽祺字洪生清太學生曾以勞動例授六品頂戴邑望頗著太夫人自幼性至孝婉婉淑順嫻內則訓光緒丙申來歸姚氏宗璉先生姚氏亦望族乃舅全照公嘗以績功著誥贈奉直大夫五品職銜當是時與姑賀太夫人在堂太夫人聚匭滌瀨視無形聽無聲體順周至和睦妯娌均無間然賀太夫人晚年得肝疾致思目皆動多怒莫之敢撓太夫人至則片言立解臧色載笑溫清咸宜賀太夫人常曰吾四兒婦在側吾目不覺其盲吾懷不覺其悶蓋宗璉先生固行四也於是戚鄰盛稱之曰可謂純孝也已戊戌生子祖訓壬寅生次子祖光舉家方相率慶幸迺運丁慘變癸卯歲宗璉先生遽因疾殂謝時太夫人年二十八大慟暈絕數四欲自裁者屢而姑賀太夫人泣撫之曰兒乎汝上有重闈下有遺嗣祖宗血食賴茲襁褓中兒詎忍舍我而殉夫乎太夫人聞之容髮粲然目睽巖然迺勉進饘粥延喘撐瘠茹蘗飲冰如是者十餘年送死養生皆得盡禮而祖訓昆季亦先後成立於是戚鄰又

盛稱之曰可謂苦節也已世俗之稱賢母如陶母丸熊歐母畫荻太夫人能繼其芳徽其訓子也動以至誠自賀太夫人棄養後歲時祭祀必泫然流涕曰吾撫兩兒成立皆蒙祖宗庇蔭之功惟痛吾舅姑之不及見耳言次輒嗚咽又嘗詔祖訓曰汝外祖父與祖父俱有令望汝亟宜努力向學以顯揚汝親以引翼汝弟迪惟前人光祖訓翽翽受命不敢忘於是戚鄰又盛稱之曰可謂慈德也已太夫人生於清光緒丙子年九月九日民國二十六年丁丑八月十七日卒享壽六十有二丁丑九月二十一日葬於滕村梅頭溝之阡子祖訓交通部南洋大學機械科學士祖光營商業歲躋丙戌夏五祖訓郵狀來乞爲傳余維閩閩中庸德曰孝曰節曰慈而太夫人兼有之洵可傳諸不朽矣又前代定例凡在三十歲以前守節撫孤者均得請旌建坊今其制雖湮廢而節孝懿行尙不絕於人間亦足徵至情至性之不容泯滅也余嘗謂纂邑志省志者於節孝婦女皆當詳細編列以振社會之風氣特附記之用質世之有心世道者

廣西平南歐陽謝太宜人家傳丙戌

余往讀宋歐陽子瀧岡阡表述其太夫人懿行嘉言曰養不必豐要於孝利不必溥於物要其心之厚於仁爲之維誦反復以爲閨閣中之模範無踰於此越千載後廣西歐陽復有謝太宜人足繼崇國公鄭太夫人之芳躅而並濟之以勇尤可佩也太宜人爲余及門歐陽革辛之母革辛性仁孝丙戌孟冬款門持狀來請曰革辛兄弟不幸長爲無母之人矣願先妣遺行不忍湮沒敢乞先生爲傳以不朽吾母言已潛然噫革辛可與言孝矣按狀太宜人姓謝氏廣西平南官成鄉人爲邑望族考諱義德以耕讀起家代有清德太宜人天性孝友深得高堂歡年及笄歸歐陽繡文先生家故貧乃考卓然公率家人力田自贖而繡文先生從邑儒林挺臣諸先生遊治舉子業篋瓢屢空泊太宜人來歸粲區滌澣勉有無能致敬於無形之際姑某太夫人晚年多病不克起坐往往遺矢汙牀褥太宜爲之洗滌脣飾絕不煩厭倦怠又因久病易性善怒太宜

人能巧變婉容以適其意處妯娌雍睦無間遇僮僕有恩善化導蓋恐拂護堂心或致不悻也於是媼族鄉
鄰僉贊歎曰可謂孝也已太宜人生七男二女多天殤惟男拔英革辛與女粹行三人在依依膝下恃母孺
燈讀孝經四子等書太宜人聞古人忠孝節義輒演爲故事娓娓講解無倦容里鄰有游戲之舉則嚴禁與
狡童比泊拔英革辛先後長金秀設治局山棲遠市履太宜人必遣使致魚肉蔬果以爲常而革辛昆季偶
有遠行常念太宜人性好儉約陰以緒錢給屠者日致豚蹄詭辭飾說進以奉之上慈下孝可謂兼盡也已
拔英繼室吳氏革辛繼室袁氏母家均饒貲財迨入歐陽門則蕭蕭離離悉屏紛華雜婢媼勤操作皆出自
太宜人不言之教也歲遇饑饉戚友求貸者盈門散財發粟無稍吝夏日炎熇常命婦兒謹配方藥陳路肆
以應病者治家之暇精研釋典無故戒殺嘗詔子若女曰爾先大毋嗜蛙一日將宰之蛙四足抱刃展轉哀
鳴惻然釋刀悉縱蛙竟日食不下咽汝其志之嗚呼可謂仁厚也已民國肇造世變孔亟匪饑日張閩里騷
然繡文先生與辦團練綏靖一方而大藤嶺山爲匪巢穴所在平蒙修象諸邑胥被侵掠繡文先生亟上治
僑匪策於大吏膺軍功五品給獎手鎗十桿得以捍衛閩閩父老思之迄今弗衰太宜人久處患難中勦匪
之策耳熟能詳庚午秋某夕匪衆圍劫歐陽家時拔英等外出太宜人率家婦介婦等持鎗以待適宅外有
十人圍大枯樹忽倒仆窻篠中斷竹發聲如發彈連珠然匪衆疑官軍至狼狽逃此非太宜人智勇兼人而
獲神助者耶天佑善人於斯益可驗矣太宜人以清同治己巳年四月十二日生民國三十五年三月二十
三日卒享壽七十有八子拔英畢業廣東公立法政專門學校長金秀設治局出宰平南蕩寇有功配江氏
繼吳氏革辛畢業無錫國學專修學校亦長金秀設治局初治軍浙右爲日寇憑陵抗戰錢塘蕭紹鄞嵎諸
邑間躬冒矢石瀕危者數嗣翊贊乃兄密謀反攻平南並馳援思和行署慶戰五晝夜解其圍其秉太宜人
忠勇之教有如是哉配黃氏繼袁氏女粹行適本邑思旺鄉袁純佳係幾人孫女幾人余於丁丑後避難湘

桂間見婦女多戎裝矢志敵愾磨石運磚俱自任之因歎小戎板屋之風於茲未墜倘能推而廣之俾忠勇之風遍於閩關吾國化弱爲強庶有多乎革辛繼承大宜人之遺訓可與言孝言忠可與言仁言勇他日干城之寄企予望之爰傳太宜人之懋德並以勗革辛昆季其志之於北堂世爲子孫法

宜興陸母吳夫人家傳戊子

嗚呼人孰無父母其能嘔肝瀝血而稱述其親之懿行者近世以來惟明歸震川先生清初張臯文先生先妣事略二篇敘述最爲沉痛戊子之春及門陸生景秀來余寓嗚咽陳辭乞爲其母夫人立傳余讀其事略宛轉沉痛慨然曰是可與歸張二先生之作鼎足而三矣誦斯文者其誰不慘然感動孝思耶陸生述略曰先母自幼天性誠篤敦行純孝年十八來歸家君稼華先生十九生長兄隱林年三十有七而歿二十有三生大姊雪巖年十四而殤二十有五生次兄民彝年四歲即殤二十有九生景秀三十有六生弟隱坡三十有七生大妹三歲而殤四十有二生妹梅先男女共七人今存者僅余及弟妹三人而已云嗚呼震川先生敘其母臨歿前頻蹙曰吾爲多子苦景秀母夫人所遭亦復如是而其屯遭困苦過之其痛心當復何如耶述略又曰景秀生四歲先祖棄養又明年二月不幸遭回祿禍六月先祖母又棄養嗣景秀婦潘氏綠梅又以病卒家運慘黷一廬風雨四壁淒其幾非人境所堪也夫閨閣中之懿德慈孝儉勤亦已足矣而夫人度越尋常蓋智勇中人也述略言景秀年三歲盜劫其家夫人大呼盜至力與抗鬥創甚幾不能支得良醫迺治丙子歲夫人邁厲虐疾景秀侍奉湯藥衣不解帶者數月天心佑善漸次告痊抗戰軍興驚傳風鶴全家竄匿山中比出則屋廬蕩燬長兄殉難夫人淚積盈眶時時飲泣莫由慰解住苒五六載母子暫別夫人氣體尙健方欣年登花甲愛日方長也詎意離家五日竟溘然棄養是晚景秀宿願渚山友人王顯民家忽心悸不能成寐亟起坐以待旦王友小女持湯盞至景秀前倏失手墮地盞水方沸濺一身心惡其不祥亟

辭主人行三日抵戈村江南行署夏台長期岳卽以靈電見朕不啻晴天霹靂長號伏地不能起時雨甚亟奔歸涉水沒脛過流洞橋梁天已昏暮徧體淋漓滯德不能支杖而行風雨益虐四野盡黑飢渴顛踣旬旬抵家東方漸白嗚呼禮記奔喪篇云見星而行見星而舍景秀至此肝腸寸裂矣抵家後撫屍號哭一頓幾絕鄰里鄉黨聞之僉曰孝哉無間然夫人平生樂善不倦儉於己而厚於人遇鯨鯨孤獨窮民無告者飢則推食寒則推衣昏嫁喪葬有不給解囊仗助靡佞御僮僕有恩曰此亦人子也嗚呼可見德量之寬安矣景秀萍水竹居藉娛高堂夫人徜徉其間倚欄餽孫一日忽語景秀曰余衰老多病恐不能久幸爾等能自立較之宋歐母所言無一瓦之覆一壠之植已差勝矣惟爾妹尙待字讀書未卒業此爾之責也語次汝然嗚呼此家常絮語何意竟成讖囑耶夫人生於清光緒十年甲申三月初九日以民國三十二年六月十三日卒享年六十孟子曰大孝終身慕父母今景秀椿庭健在宜稍抑一時之痛而移爲終身之思也

論曰嗚呼人生當世可不及時以盡孝哉觀於景秀得母夫人不祥預兆其事頗奇而實常理所默寓也昔曾母擗臂曾子心痛感應之理雖數十里亦無間隔孝經感應章曰孝弟之至通於神明幾動於此誠動於彼母子一體所分感召捷於影響吾記景秀之事將以勸萬世爲人子者及時以盡孝也

海門王母杜孺人家傳丙戌

古來閨閣中之懿德庸言庸行聿儉聿勤而已然處環境萬艱之際會具百折不撓之精神歷由苦而甘之時而仍矢志茹苦之志教子成名足與宋歐陽母媲美尤可敬也若海門王母杜孺人足以當之矣孺人嗣子曰賢有孝行丙戌孟冬介余友吳君丕績踵門來請曰吾嗣母棄養距今將六十日矣願賢有大痛於厥心者在不克奔喪一事益疚心於子職之虧缺終天抱恨追悔何窮溯吾母自六十以後屢擗疾病洎賢適歸病良已輒喜曰汝還吾卽愈可爲勿藥之徵也余聞之愕然曰以嗣母而有如是之慈以嗣子而有如

是之孝相依爲命豈非近世難能者耶賢爲之慘然有頃復言曰吾鄉不幸兵禍頻仍避難僑居者尤遭猜忌偵伺蹤跡所在捕逮禁囚甚且致之死用是家人恐成戒賢勿行吾母見背時賢既不能侍奉湯藥又不克躬親含殮吳天不弔初不虞至於此極也言已潸然余乃曲慰之曰此固孝子所不忍言不敢言者然聞揚慈母之懃德昭示子孫則可永永不朽也孺人姓杜氏幼聰穎博聞強識教善行不怠鄉黨戚族推爲知禮旋來歸如蘭王先生同心同德阻勉有無匝月歸甯母氏詢近狀曰夫婿眞儒者讀書不治生產吾惟安貧自適而已於是服田疇勤紡織勞苦之事靡不躬親乃天降鞠凶鴛飛戕翼如蘭先生遽爾逝世孺人痛不欲生將自經者屢矣戚黨長老輩以守節撫孤勸之孺人睨睨梅梅然曰吾姑忍死須臾以延王氏後乃撫賢爲嗣子兼育二女以養以教恩斯勤斯而緣督賢課尤嚴每當月下燈前課讀聲與刀尺聲相和或講說古籍及前賢善行聲聲不倦必令賢會悟而後已方諸昔人丸熊畫荻何多讓焉迨賢出就外傳脩脯有不足卽節衣縮食以補之曰甯從名師弗惜脩費讓者款爲名言無如氣數慘澹二女遽殤別撫一女嫁臨年亦卒先後二三十年間迭遭舅姑父母兄弟姊妹之喪孺人悉力辦擋雖措置悉合於禮而心力交瘁矣歐陽子曰利不必溥於物要其心之厚於仁孺人雖辛苦備嘗而爲善之志不稍懈方賢旅滬時孺人以母氏與己儲蓄之款授賢曰此吾母及余貯之將以贍窮民無告者汝當擇最急者周之賢謹受命賑濟鄉里旱災及建造石梁推諸瀝地捐輸咸取資於是焉噫可謂仁矣孺人年八十餘猶服布衣食麥飯賢勸其稍進甘旨則笑曰吾安吾素冀留其有餘貽後福於子孫也平居精研釋典日有常課蓋其培善因積善果深造自得蘊蓄者非一朝夕之故矣孺人生於清同治二年七月十七日以民國三十五年九月十三日卒享壽八十有四民國九年旌表節孝嗣子賢工詩書畫及金石學曾任東吳大學及美術專科學校教授有聲於時女二撫女一俱先孺人卒孫幾人曾孫幾人余既欽孺人之賢孝貞操又嘉賢之孝思純篤也爰爲之

傳俾載諸家譜用垂不朽云

無錫王劍秋夫婦母女殉難記丙戌

嗚呼自日寇內犯國軍抗戰以來其臨難不避死於鋒鏑者何可勝數而如無錫王君劍秋夫婦母女同時殉難尤可慘也君姓王氏諱傳基劍秋其字江蘇無錫縣籍業本邑慶豐紗廠民國二十六年十一月二十五日日寇竄錫邑焚燒淫掠無所不至當寇氣逼近時閩邑士民相率奔逃劍秋之妻周氏也其長女麗貞適適是疾臥床不能起君與周孺人謀曰吾輩不出走固死出走則麗貞死吾輩亦必不免然祖宗血食不可斬於是揮涕以子世志託慶豐紗廠友人陶君心華挈之西行其次女滿珍託鄰人攜出寄養舅氏周君鼎承家慷慨自誓與城俱亡無何寇大至劍秋故喜著制服寇見之以爲公務員也立刺殺之推諸屋前池中孺人慟絕地寇迺舍之去有頃孺人稍蘇起號哭竭己力移夫屍入室泣告麗貞吾二人不如同死麗貞哭曰吾因病累爺及娘願同殉奈罔極之恩未報何惟時母女皆哭不成聲孺人旋蹶然起取爨下積薪閉戶自燔於是一家三命同赴劫友其地蓋在錫邑北門外大河池沿云嗚呼方是時也天地悽愴鬼神感泣矣越十年丙戌春及門周生樹慈因慶豐廠同人之請來求余記其事余作而歎曰慘矣夫可敬矣夫閩閩中有此義烈之事亦吾邑之光也夫昔清同治年間粵寇初平當事者於各縣分設忠義局採訪殉難官紳義士孝子烈婦貞女載諸邑乘以垂不朽今者世道人心稍稍替矣余謂亟宜做行同治時故事由邑志登諸省志由省志登諸國史庶幾天地正氣綿延不絕於人間如王氏夫婦母女忠盡義烈亟宜載諸國史者也此執政者與社會諸君當各盡其責者也余與王君未相識然敘茲事不覺潸然欲涕而後之過其地者痛墟骨之莫埋憑弔欷歔更不知若何感槩也雖然吾聞天道無私常與善人茲者幸得梓鄉同志撫字其後人則今之慘怛於一時者必當寢熾發昌於後代縣延而靡有窮期也

無錫王淑靖孝女割股療親奇驗記丁亥

禮記言父母全而生之子全而歸之孝經言身體髮膚受之父母不敢毀傷然則人子割股一事恐傷殘父母道體殆非所宜然吾又進一解焉人子當親病危殆幾於垂絕之時恨不得以身代親斯時也求生不得求死不得邊有他計哉惟有割股或可療親於萬一此吾輩所不忍非之亦不敢非之者也若無錫王女士淑靖之割股療親更有奇驗焉茲事也吾聞之於淞源族姪淞源之言曰女士名淑靖爲前清湖北知縣樂山公會孫女公殉洪楊難賜諡武愍其祖子臬公武昌府知府入祀湖北名宦祠父次清先生邑庠生忠厚誠篤義行著於鄉里女士承名門之後自幼純孝性成善體親意年十二母氏朱恭人棄養女士擗踊哭泣有逾成人幼字馮氏念勤先生之三子也不幸蚤世女士聞耗則慟曰髮彼兩鬢實惟我儀命也奚言即矢志不嫁初女士鞠育於陳氏從母從母早寡無子撫女士如己出親授四子五經讀女士感其恩勤侍奉惟謹辛苦相依蓋二十年如一日也從母晚年患肝疾瀕危時女士焚香籲天割股和藥以進從母歿女士服喪三年記曰無於禮者之禮其動也中女士蓋深得禮意矣治喪既戴事即歸家壹意侍父次清先生視無形體無聲曲盡其歡先生夙患喘證每屆秋冬間輒發辛已歲九十月之交先生猝中風食頃失箸舉家惶急延醫診治均束手其夕疾大漸女士長兄汝昌侍疾恍惚見幃幔間現白光如月形爛然由小而大中若有符篆驗時始隱翌日先生病稍瘥能進飲食不踰旬而大瘳人莫測其故久之始知汝昌牀側親白光之際正女士庭前虔禱割股時也余聞之不禁肅然起敬曰至誠可以格天豈非信而有徵者哉其現靈光何也孝經言孝弟之至通於神明光於四海尙書言至德明光於上下蓋誠能通神形著明動有不期然而然者女士誠信上達蒼穹此神光蓋由女士血性所形著豈可測度而思議者哉又嘗聞淞源言女士既孝事其親又友於兄弟姊妹維護朏摯友愛孔昭嘗祈天永親壽茹素終身論語曰孝弟爲仁之本大孝未有不

象悌德者孟子言親親仁也敬長義也無他達之天下也向使推而播之於社會其誰不從而興起哉余時昔有言父母之壽與不壽係於子女之孝與不孝蓋和氣萃於家庭親心常在愉快康樂中自得長生之樂洪範五福一曰壽繼之以攸好德大德即大孝也今女士純孝若此永清先生期頤之福庸有艾乎謹序而書之藉以敦薄俗疋時弊符當率女士爲矜式焉松源於女士爲內家之姊故知之極稔云

無錫二泉橋記丙戌

錫邑西鄉濱湖黿頭渚與獨山間有翼然而新者曰二泉橋是邑人所公建紀念錢子泉孫卿二先生昆仲者也曷爲紀念二泉先生一則以文章著一則以功業傳微獨吾邑之人瑞抑亦國家之祥符也丙戌歲二月二日忻逢二先生六秩攬揆良辰二先生同時誕生同有建樹於本邑同有令望於邦家蓋吾邑自有明東林以後學術文藝代有傳人高顧兩賢理學氣節彪炳乾坤秦文恭公著五禮通考顧震滄先生作春秋大事表爲當代考據家名宗邇者薛叔耘先生出使歐洲又有四國日記籌洋芻議之作二泉先生文藻傑出天才秀發紹厥遺風子泉先生著作滿家學繼周秦文撫漢唐其教澤自本邑推暨遐方避難贛湘間手不釋卷施教之遠達於藍田莘莘後學罔不翕服孫卿先生特抱經世大猷周應萬彙甲子歲齊軍圍邑城孫卿先生夜縋城出與周旋閭閻七邑無驚至今口碑猶在又迭任商會會長通惠敏敏無黨無偏信乎二先生之功德不可不表揚也錫邑山水之秀甲於全省太湖三萬六千頃吞吐煙雲扶輿旁薄而惠山錫山兩峯並峙雄奇峭拔若二惠競爽然其清淑之氣曠藹城中而湖水亦有蜿蜒環繞之象地靈人傑宜乎二先生之應運而興也錢氏系出武肅王之後武肅當五代時嘗築塘捍海萬弩射潮肇興農桑之利保全民族赫奕史書二先生不愧爲傳人矣又有足稱者其姑嗣鍾書鍾韓昆季十數人均嶄然見頭角或淹貫經典淵源或熟語佻虛文字中西兼擅造極登峯梓鄉長老僉爾而羨曰盛哉靈秀之氣其萃於一門乎其

六藝之府乎其百家之歸乎其德行文學之矜式乎余僑居錫邑與二先生里閭相望既爲畏友復訂執友稔其行詣爰紀其事即移作壽言並集葩經以頌曰天錫純嘏復我邦族宜兄宜弟俾爾戩穀南臺北萊邦家之光以引以翼令剛令望威儀孔時從以孫子壽考且寧以保後生

無錫許氏三畏堂記丁亥

民國二十六年丁丑之秋日寇內壘蚩霧壘障飛鳥遺音余時僑居錫邑國學專修學校率諸生及眷屬避地於城南揚名鄉東許道及門許生岱雲敦行勸學士也乃弟岱青亦樸實篤誠余迺遷眷主其家仍聚徒講學不輒旋復避地長沙達桂林越二年餘寇氛漸戢迺返上海迨三十四年規復河山鄉人咸復邦族岱雲以余曾講學於許道也因舊建三畏堂請爲文以記余維許太岳之胤詳於左傳邇傳至東漢有名慎字叔重者作說文解字是爲訓詁家之權輿洎宋代程朱軀興大昌性理元初有名衡字魯齋者得伊洛淵源之學於經傅子史禮樂名物星曆兵刑食貨水利之類靡不研究慨然以傳道爲己任厥後又有名謙字白雲者受學於金仁山先生教示學者至誠諄悉內外殫盡從游者千餘人此三先生者一則爲漢學之鼻祖一則爲宋學之儒家而余在許道講貫之時則以文章爲要旨蓋文章者擷性理訓詁之奧窔陶鑄而出焉者也際此之時雖當干戈擾攘之秋而講貫從容聲傳戶外鄉之人咸來旁聽焉或當風清月白之會扶杖出游則見長幼有序道里秩然黃髮垂髫怡然自樂有見余者咸來致敬益歎其風俗之純樸爲不可及也岱雲昆季負一鄉重望偶有爭執之事得其片言立解昔太倉陸桴亭先生作治鄉三約於教育經濟防守諸要務纖悉靡遺誠能仿而行之洵可爲錫邑各鄉之模範矣更有進者易傳言積善之家必有余慶論語云見善如不及居今之世尤以行善爲急岱雲昆季於善行善果汲汲皇皇積之有素異日者善氣扶輿旁薄由一家而推一鄉由一鄉而推一邑詎有涯涘岱雲昆季其勉之哉周南詩曰宜爾子孫許氏後嗣蒸蒸

日盛其各勉之哉至許氏之累代積德已詳於岱雲之述略不復贅云

上海交通大學文治堂行奠基禮記丁亥

余前在京師任農工商部署理部長職旋丁內艱去官服闋後即不復出山隱居滬上任交通大學校長（原名南洋大學）一凡十三年在任之時每於星期日集諸生講經並修身立品大要無如目昔日甚先後辭職至十次於民國十年九月始邀部准接任者為廣東凌君鴻勛字竹銘即本校高才生余最器賞者為深喜曰吾校得人矣嗣凌君就管理鐵路職繼之者為廣東黎先生照寰字曜生動慎緣督不辭勞瘁又繼之者為崑山吳君保豐亦本校高才生被服儒素學貫中西丙戌歲諸同人與同學集議擬建文治堂於校之西南隅占地約十餘畝於民國三十六年一月十五日行奠基禮是日校長吳君保豐與舊同學裘君維裕字次豐先乘車前來迓余至午初刻行禮嗣復由凌君竹銘宣述余從前講學宗旨謂學問之道首重品行人格須居第一等不為聖賢即為豪傑吾校中人因篤守唐師之訓是以品詣純無下達者云云繼請余致詞余愧不敢當適進而昌言曰今日之禮可謂隆矣諸君之誼可謂厚矣余承乏於茲歷有年所烏可以無辭昔孟子生戰國之世著七篇之書首以提倡仁義斥絕貪利為惟一根本其言曰後義先利不奪不蹙又曰未有仁而遺其親是孝也未有義而後其君是忠也人生大節豈有外於忠孝者哉此外又言舜蹙之分在利與善之間去利懷仁義以相接未有不王然則今世求學者為孟子學而已矣今日世界一大戰國也孟子學以何為要教民於水火而已矣且余更有進者古人講學植品惟以氣節為擎天柱地之本近代士夫或不免好實無厭浸至脂韋成俗學者入社會之中習澳澀之情狀無待洪爐早已銷骨如是而欲其屹然特立不隨風氣為轉移非所謂南轅而北轍者乎余嘗作楹聯云人生惟有廉節重世界須憑氣骨撐諸生既尊崇余言務宜以聖賢豪傑自勵其勉之哉吳校長暨諸同人諸同學僉曰善哉此楹聯即當懸諸於

文治堂以爲永久矜式余見諸生之鼓舞奮興深有感於心也爰飭不律記之於是堂

上海永康中學增建思齊齋記丁亥

歲次丁亥仲秋金華呂師堯先生愜愜然以永康中學增建思齊齋來請作記余深服諸先生興學之勤而念舊之篤也誼奚容辭師堯之言曰永康中學本由應繼周先生主持校務從學者頗衆洎今校長胡子康先生蒞任益發揚而光大之多士來歸泮濱焉莘莘焉相與翕然心悅誠服今秋爲擴充校舍蒞滬集費由校友應振三應壽紀李德康馬其駿方子安胡炳文王元初徐大欽諸先生集成之而師堯隨其後焉因念先師夙以論語見賢思齊爲最爰奉商諸今校長胡先生建築齋舍顏曰思齊胡先生欣然曰此實吾應行提倡者也請爲文以爲記抑師堯重有感者方今生計日艱學界中尤爲困苦各校學生所以觀望不前者皆由籌費之難也而永康中學向來收費極爲低廉嚴學子之課程而輕父兄之擔負所以諸子來者皆爭先而恐後也余聆其言肅然起敬曰甚矣胡先生與諸先生之熱忱毅力也余嘗謂教育根本在性情措諸躬行則爲道德再輔以近世科學斯爲體用兼全今思齊齋之取義道德之根源也而師堯先生之不忘師恩性情之發現也斯齋旣成諸生相與沈潛乎道德性情教育之中誦詩讀書絃歌不輟他日必有奇才異能出乎其間砥德勵行以淑身而淑世豈不懿歟然則諸先生與師堯先生之維持學派規撫前型意在斯乎意在斯乎爰書以紀之

無錫辟疆園移置金匱山記丁亥

歲次丁亥孟春正月吾邑顧康伯先生來請紀辟疆園移置金匱山事爰詢其始末康伯之言曰據邑志金匱山一名紫金山在城中第六箭河北岸前清雍正四年析無錫東境曰金匱縣是山高踰三仞環繞約三十丈陸然中峙既景迺岡周眺四圍道里適相等故老相傳郭景純嘗埋黃金符匱於山下有紫氣上騰因

以得名厥後地歸秦氏築室於茲顏曰金匱山房咸豐時粵匪擾亂焚燬無餘蒼涼棘目欲問其事而故老鮮有能言者余舊墅辟疆園築於第六箭河南岸距金匱山數十武而近丁丑歲敵寇內壘四出侵暴而是國獨無恙松菊猶存蒼翠欲滴若有神靈呵護之者亦云幸矣請一言以爲記余聞之歎曰此不獨掌故攸資益徵顧氏之遺澤孔長也江北冒氏有園亦以辟疆名藏書極夥聞經丁丑以後摧殘墜落蕩焉無存藝林之士過其地者賄頹垣殘瓦憑弔欷歔不能已已而康伯先生之辟疆園嶽焉如新殆不可同日而語蓋其培植土峯猶其氣節之高尙也其點綴湖石猶其胸懷之磊落也其栽松蒔竹猶其誘掖後進也更有進者余故鄉太倉地本瘠貧先生因曾經主管沙溪紗廠感情彌切卽今以粟易款捐助積善會所辦粥廠貧民無告者羣沾實惠口碑流傳其善氣之彌綸善果之宏碩實非淺鮮尤可佩也易曰積善之家必有利慶詩曰俾昌而熾俾壽而臧吾知顧氏之福澤未有艾也爰爲記以張之

海濱續修禊園記 戊子

歲次戊子三月上巳良辰本社諸人聯袂采蘭廣續修禊余亦忝附其列維時春日載陽和風習習芳草綠絳好鳥嚶鳴極聲應氣求之雅特繪圖以張其盛寶山金巨山先生賦詩咏余並屬爲記溯矣未上巳已留鴻雪之跡今更有斯雅集洵盛舉也昔明季吾妻有十老會之聚吳門高士張永暉爲之圖陸尊道陳安道江孝友盛貞介德星咸蒞於以提倡宗風匡扶大道今諸同人修禊之舉其亦寓景仰前賢闡明正學之意歟夫今日之世何世也相彼小民流離瑣尾仁人君子咸思有以安集之小雅之詩曰鴻雁于飛集于中澤雖則劬勞其况安宅今諸同人之志其將拯救民生俾之得所歟然則今日之一觴一咏豈徒暢敘幽情歟盍轉剝爲復轉否爲泰之機於是焉在昔范文正登岳陽樓有把酒臨風其喜洋洋之樂今諸同人亦有先憂後樂之旨歟是日參與雅會者南通孫敬人秦興楊靜子嘉定戴伯行華亭閔瑞之丹徒李晉卿上海郁

志甘金山高吹萬丹徒吳眉孫淮陰朱德軒如皋繆鏞樓上海趙晉卿善化瞿兌之賈山金巨山太倉唐蔚芝凡十四人云

義馬記乙酉

乙酉孟秋紀綱高大勛轉述伴人陳炳才言義馬事雖馱也而實正氣所係不可不爲之記上海曹家渡有義勇隊與敵人戰隊有良馬一義勇軍敗馬爲敵所得見其神駿不凡甚喜一敵人先乘之馬怒遽掀之頭又一敵人乘之亦如前敵憤又強乘之馬益怒狂嘯跳踉掀敵下以足踐踏并嚙之竟衝其胸血肉狼籍死敵大驚惶羣以鎗擊之馬奔擲叫號死敵刳其腹剖其腸厥狀極慘嗚呼方事之殷也懷貳心而附敵者亡論矣卽有志節清剛特立不屈者除軍人抗戰視死如歸之士其化倪伏匿不出者或閉門著書窮伸正義者何可勝數是馬馱也微特強毅不屈且蓄敵之首而噬其骨至於身死剖腹而不悔豈非乾坤正氣之所鍾哉爰爲斯記將以感於人也

茹經堂文集六編目錄

卷六 碑銘類

秦縣韓公紫石神道碑銘丁亥

安徽方公佩齋神道碑乙酉

錢塘施公省之墓誌銘丙戌

慈谿宓公莊曉墓表丁亥

廬江吳南陔先生墓表丁亥

浙江王一亭先生功德紀念碑丙戌

美國李克樂先生紀念碑戊子

吳興楊甸侯先生墓誌銘丁亥

海門薛雨霖先生墓誌銘丙戌

秦縣陸答山先生墓誌銘乙酉

歷城曹幼珊先生墓誌銘乙酉

江陰沙君循矩墓誌銘丁亥

廣西北流陳君柱尊墓誌銘甲申

太倉黃君伯樵墓誌銘戊子

太倉陸君彤士墓誌銘甲申

太倉胡君粹士墓誌銘丙戌

長沙黃母楊太夫人墓誌銘丙戌

秦縣盧母崔太夫人墓誌銘乙酉

閩省鄭母陳太夫人墓表戊午

無錫劉母顧夫人墓誌銘丁亥

嘉興王生季閔哀辭丙寅

江陰章君子衡哀辭乙酉

茹經堂文集六編卷六

碑銘類

太倉唐文治蔚芝著

秦縣韓公紫石神道碑銘丁亥

維民國三十年十月某日前任江蘇省長韓公紫石以被敵寇逼迫出山不屈又被監視忠憤填膺遂卒於秦縣之徐莊措紳君子暨葑屋編氓相與咨嗟流涕或奔走巷哭追念其功德不置越六年丁亥季夏常熟龐先生旬材偕寶山金先生其源將武進蔣先生維喬所撰傳狀慰勸來請碑銘嗚呼余與公雖僅獲一面然固千里神交也烏可以不文辭公姓韓氏諱國鈞字紫石江蘇秦縣海安鎮人本生祖鳳翔公值前清道光季年大水爲災謀售宅作賑恤費無應者遂拆其宅得資易米麥以恤窮黎資罄活人無算蓋其種德深且遠矣嗣祖諱某妣某氏考諱某妣某氏公九歲丁父憂十二歲丁母憂哀痛如成人賴其二姑母撫育以成立少有異稟負大志每晚退塾後輒集鄰童於宅西曠地自任指揮儼若司馬法行軍然諸長老嘆異之曰此大器也年二十一以詩賦第一見賞學使補博士弟子員年二十三登賢書屢赴春闈不第迺以大挑一等知縣分省河南上游祭其才派署鎮平縣甫三月頌聲大作呼爲韓青天又稱韓一堂蓋以公案無留牘片言立決故有此輿誦常於午夜乘馬巡行三四十里翌日視事絕無倦容其精神非常人所能企又草擬鎮邑計里開方圖清查戶口每村頒一冊冊首繪本村圖分戶口甲乙丙三等奸宄無所容相率遁去考績報最調署祥符縣尙未之任某日因公赴鄉停輿河畔有一老嫗奉簾曰此韓青天耶聞將舍我等而去此後誰其養有我耶淚隨聲下追卸篆起程百姓咸設香案陳酒果祖餞於道壯丁爭來肩輿越數里始羅

拜而別嗚呼此與清初陸清獻治嘉道愛殆無以異官祥符未久旋調武陟縣其地濱黃沁兩河每經潰決沙壓田畝膏腴驟變石田公籌翻沙出土之法歲增熟田四萬餘畝民得粒食嗣奉檄署永城縣查放旱荒災振維時公感受時疫不能興然關心民瘼不遑啓處永城盜風孔熾公爲訂團練巡緝之法盜知有備不敢竊發又奉檄赴濬縣任適有藉命圖詐案詭稱偕子行乞爲某用磚擊斃其子公檢驗之卽斥屍主曰此汝殺子以圖詐也一鞠而伏其神明如此方是時海禁宏開交涉需才尤亟光緒二十八年公以河南道員任河北礦務局總辦兼交涉局會辦維時道清鐵路建設伊始民不知鐵路爲何事相率抗售路地上游檄公開導之公至民咸曰韓青天非欺我者於是羣領官價而路遂成外交既協更注意內政清化李家凹田蕪不治歷有年所公度隰原濬溝洫闢草萊植湖桑萬株三載成陰爰於清化設立蠶桑實業中學風氣大開其爲民興利如此趙公爾巽督奉天調公赴奉任交涉局長當是時俄曠於北日闖於東而日方戰勝強俄篋尤張公深維國體遇事據理力爭日人無如何卒就範張公人駿督粵調公赴廣任督練公所參議兼兵備總辦於是公由文德兼武事矣粵軍中多留學生號稱難治標統趙百先者亢直尙氣節公器之乃江督端方疑爲革命黨密電撤其軍職公曰黨羽固宜清是非不容混爲力言得解其激厲忠直如此宜統改元先後簡任奉天勸業道交涉司值風疫大作公防範焦勞已亦屢瀕於危時日俄藉口防疫欲奪我主權公從容布置不稍讓在任三載交涉益棘其尤著者若蓋平漁業公司案撫順礦界案本溪湖合辦煤礦案鴨綠江駕橋通車案安東採木公司案無不據理力爭日人迺斂手不得逞宣統三年任吉林民政司會吉省罹火災公撫循安輯甫就緒而武昌革命事起公冠歸民國二年簡授江蘇民政廳長兵燹後戶口凋零財殫力竭公下車伊始卽設法貸款以植教養之基會江督張勳去任部下幾譁變公百計消弭民慶安堵三年調任安徽巡按使公擬於皖北改良農業皖南改良茶務長江兩岸剏造森林未及設施與皖督倪嗣

冲意見不合而去十一年簡任江蘇省長在任三年既受制於軍閥又牽掣於議員最困難者若公債發行議教衝突水電廠標賣公糜精力尤鉅甲子齊盧之戰公堅持不可開釁盧賊之齊斥之迫齊敗逃公會一兼督篆率軍南下省長易人公遂下野然猶不忘百姓之病孳孳研求水利胥慨然曰昔鯀治洪水專務築隄隄崩則水位益高而橫決禹則以疏濬爲事而未嘗廢隄防故禮記祭法篇曰禹能脩鯀之功楚辭贊禹功曰纂修前緒遂成考功而龍門之下猶有所謂鯀隄者此其證也公任江蘇民政長時籌設江南水利局江北運河工程局疏濬與隄防因地制宜十年秋霖雨爲災淮沂汜濫運河長隄岌乎不可終日公以開壩爲莫大危機爰設法開關東台之王家港以導入海之路水勢迺退二十年淮水大漲運河東西隄決口數十處爲空前浩劫公出任復堤大工次第合龍爲蘇北惟一保障二十三年夏赴開封視察黃河南岸工程其冬至淮陰觀導淮入海工程二十七年黃淮並漲開新二壩用資宣洩二十八年春堵閉壩口以保春耕厥後中央特任公爲黃災救濟委員會主任委員凡屬修築圩堤疏通海港皆有精詳計畫其殫精戮力於水利如此迺天道蒼茫善人罹劫有不忍述者公本家於海安日寇內變避地坂塢旋遷徙泰縣之徐莊敵寇調知之三十年九月十三日黎明突率騎包圍公宅強公出山任僞政府職公堅辭敵出手槍手梏威脅之公怒厲聲叱曰吾八十餘老翁本欲求死即槍斃我決不畏敵迺督視公行動越五日駐海安賊會南部親往以甘言誘公駐東台賊會山崎備肩輿迎迓均置不理是時徐莊亦淪陷矣公外遭迫脅內懷憤憂因之寢疾祈死益切峻拒藥餌越兩旬津液自膚中流出識者曰此癘閉證也遂於民國三十一年一月二十三日薨於徐莊享壽八十有五嗚呼公處爲純儒出爲名臣皎皎大節可謂天地間完人矣鄉人哀之私諡勤恪遺著其夥政府喪予國葬已刊者海陵叢書又永憶錄止更年譜二種爲其弟子龐樹森梓行餘尙待刊回憶公長蘇時凡我邦人君子爲民請命之舉罔不立應太倉巨鎮劉河爲文治祖宗邱墓之鄉某歲

颶風肆虐海塘衝刷岌乎莫保而國帑籌撥維艱無法救護先大夫憂心如焚卽率文治赴省向公叩籲已整裝待發矣有人告公公駭然曰詎可使老輩長途跋涉立卽籌款派員星夜督修隄塘以之鞏固劉民免其魚之禍嗚呼此可見公之從善如流而文治追念先大夫之言愴懷無已也公配某夫人子幾孫幾銘

長江浩浩清流轉竺生韓公膺厥選維公貽哲秉異委文才武略能兼資甘棠遺愛在吾蘇周歷宦途口碑傳棧槍亘天敵寇入鐵騎千百圍公宅威脅利誘卒不屈厲聲呵叱如驅羊恨不礪齒齧奸獍一病不起身報國乾坤正氣排闥閱我銘神道勒諸石千秋萬禩永不滅

安徽方公佩齋神道碑乙四

孝者天之經地之義無論文人武士舉以孝行爲先務之急司馬子長曰父母者人之本人其可忘本乎哉清封建威將軍方公佩齋武人中之有孝行者惟能移孝以作忠故其勳業可傳於後世旃蒙作噩之歲夏五其文孫正將乃父慎厂先生壙之命持狀懇請撰碑文余深嘉其至誠而至孝也按狀公諱玉興字佩齋安徽合肥人合肥本尙武之區咸豐同治間粵匪煽亂李文忠公鴻章創練淮軍繼湘軍而起由是論武功者爭推淮軍公於淮將中尤卓犖有盛名粵匪擾皖省時公考大授公隨江忠節公忠源守廬郡不幸殉難公聞噩耗仰天泣血誓與賊不共戴天冒萬死突入賊營痛哭覓得父骸而歸議者謂其有神佑不知其純孝哀毀之誠上薄蒼穹是以出生入死而無所毀傷也自是厥後壹以殺賊復讎爲素志遂投効淮軍隨李文忠公暨劉文誠公乘璋苦戰皖鄂浙閩直魯蘇豫間歷陣數百克城數十歸市者不止田之果蠶下無戎馬跡抑何神歟有精於武略者曰此皆由公愛民如子待兵將如一家故人皆樂於效死吾謂其皆移孝作忠之至性也嗚呼其豐功殊績異日載諸清史而有光矣光緒八年海氛頗熾上游調公入粵時連山

會匪猖獗公以爲立人之道首崇仁厚宜剴撫兼施不宜累及良民匪聞風反正厥後戍粵西防右江匪咸
驚慄投誠蓋非特愛公名實感公化也十三年川督劉文誠公奏調公任維州協駐防重慶時萬縣土匪勾
結變民相煽繼變勢張甚公率師蒞萬殲渠魁裔裔從川民喁喁愛戴共慶太平大吏上聞溫綸褒獎於是
公威望大著矣我國自通商互市以來民教隔閡教案動多棘手二十四年大足教案驟起長官愕眙全川
恆懼公不動聲色化險爲夷厥功至偉二十六年印雅土匪作亂越二年省匪又復蠢動公先後靖亂閩
安堵旋以功高出鎮川南轄境二千餘里西鄰康藏南接滇黔蓋由西林岑公嘉公勞苦功績尤懋故保膺
此重任於是公夙夜憂維思移孝以作忠責在推廣不遺親不後君之要旨爰籌安邊大計條陳簡練軍實
興學屯墾諸大端西林極意嘉納嗣以岑公調任兩粵公亦統達字全軍辦理雷波馬邊交涉事宜未克見
諸實行惜哉惜哉綜公平生治軍數十年辦匪案教案更僕難數從未作威逞志輕戮一人其宅心之仁厚
皆所謂孝思維則也然而以仁爲體亦必以義爲用摘伏發奸卽所以揚清激濁在協維州時枿角稍露不
免爲親貴媚忌公洞濁幾先又因國步日艱措施抑復不易嘗喟然歎吾願振興國家恐從茲無望矣居恆
鬱鬱遂挂冠歸始寓蕪湖後徙維揚猶時時以民生疾苦爲念禮記曰不忘百姓之病其憂思有如此公當
之無愧矣不幸避疾卒享壽七十有三公生於某年某月某日以宣統三年五月二十四日卒於揚州寓邸
卒之後因時局不靖暫厝於平山堂側德配嚴夫人勤儉恭慎治家有法度避地海上於民國二十二年甲
戌八月二十七日卒於滬寓其子墟迎公匱於揚州與夫人合葬於上海公墓証料三十二年四月忽聞當
局有促遷公墓靈柩之耗墟挈正急往省視則荒煙蔓草問僅得墓銘一方而親匱不知被徙何所傍徨無
所爲計慮攜銘石歸自七月十九日始墟每日躑躅於公墓內外尋覓不獲以爲從此絕望百身莫贖矣洎
二十四日方聞梅梅倉皇探訊時忽有人告之曰公墓東北十餘里外有少數棺柩暴露露地盡往求之

迺徒跣急足往探則淒然在焉悲痛之餘於心忼然爰扶匭改葬於上海萬年公墓時維乙酉三月四日也嗚呼當墟輾轉尋覓之時正值戈鋌倥偬之會此其辛苦艱難無殊於厥考覓大授公遺骸可謂後先輝映矣公生丈夫子三長楠從事軍務前年歿於衡陽次樸隨馬占山將軍在關外佐軍務三即壻爲名醫有聲於時孫七善路善欽文某正善駿善德善同語曰孝爲百善之原其後人之昌熾可知而正肄業國學專修學校爲余及門亦頗能植品勗學大雅之詩曰孝子不匱永錫爾類正其勉乎哉余夙欽公之移孝作忠也爰大書之以詒來者

錢塘施公省之墓誌銘丙戌

公諱肇曾字省之浙江錢塘人後建別墅震澤並占蘇籍曾祖諱某祖諱某考諱某字靜庵與乃兄少欽公種善樹德有聲於時睦嫻任恤凡有貧困來求者靡不分金指困如其願以去蓋其善因善果蓄積者久矣公若齡嗜學讀四子五經外旁逮往盧文字罔不覃思精研探厥奧窔壯歲隨楊子通星使遊海外任紐約正領事轍跡所至聲譽鵲起僑民咸懷其德閱歷既深爰擬採他國之長以補吾國之絀綜其生平蓋有不可及者數大端初毗陵盛宮保籌辦京漢鐵路在滬設局知公才堪大用遂以漢鄭路工委界之惟時風氣否隤人尙緣飾爭攬路權視爲利藪公砥柱中流盟心若水此堅定不可及者一也此款訂約英人爭權於是要求五處路工而滬甯錢實居其一公折衝壇坫不競不綵用是敦槃輯睦卒保主權此其語練外交不可及者二也滬約告成公復主京漢路工惟時毗陵入掌郵部潮流傾洞訛言朋興公懷禮經三坊浩然歸滬杜門却掃作海上寓公適養時晦此其見微知著不可及者三也民國肇造百廢俱廢中央籌設隴秦豫海鐵路袤延四千餘里爲中原縮殺公遂膺督辦之命經營十載殫精竭慮路工駸及逸睡成效不著而於國庫恆濟有無養彙不思自潤年方周甲急流勇退解組歸林靜參釋典此其經綸稍展廉潔自持不可及

者四也。願外業之崇隆，既如此而內心之蘊蓄，更有不可及者。夫國學壽世之命脈也，十三經壽人之寶書也。辛酉壬戌之交，公在錫山，創設國學專修館，延余主講，培植髦士，並商討余藏十三經評點善本，壽諸梨棗，備遺來學。名山事業，足永千秋。而于滬上復創設有英中學校，敬業樂羣，以端趨向。菁莪棧樸，竹箭南金，樹木樹人，項背相望。其漸被教育者，廣矣。中國濟生會，慈善團之領袖也。自公長會務以來，值盤根錯節之際，爲擴義滂仁之舉。凡遇各省水旱凶荒，兵災疾疫，撫循噢咻，發粟授衣，不可僂指。計吾鄉太倉瘠苦之區，迭被災殺，貧窮無告，沾閭澤者，口碑載道。又若創辦佛教淨業社，苦海慈航，誕登彼岸，惟日不足，回憶辛未之春，難友僑集本社，而獲庇大廈者，無慮千百人。其壽人壽世，又何如哉。至於任集堂軒統務佛院，統監修士林林長，無非積善根源。餘如實業界主，持閩北水電公司，經濟界被選永亨銀行交通銀行董事，長酌盈濟虛，厚生正德，俱可稱述焉。戴記儒行篇曰：雖危起居，竟信其志，猶不忘百姓之病，余嘗作六字箴爲教育宗旨曰：正人心，救民命，公之立人，達人，其有心心相印之意也。歟。公以清同治某年某月某日生，民國三十五年某月某日卒，享壽八十。德配龔夫人，先公幾日卒，筮室某氏，介弟建名，肇基字植之前，特任駐美大使。名聞中外，子幾某，女幾孫幾，孫女幾於某年某月某日與龔夫人合葬於某原之阡，銘曰：

慈谿必公莊曉墓表丁亥

錢塘靈秀，震澤蒼茫，篤生賢哲，令聞望，象通譯美邦，名揚路政，肇始公，握厥維，孰緩熟急，爲幹爲支，呼吸千里，應輪四馳，滄桑蒿日，退隱滬濱，潛研二氏釋典，道經孜孜，爲善施粥，濟生園學，專修徵集，名流弱嗣，善本予焉，取求藏諸名山，不朽千年，藝林戴德，口碑留傳，篤篤翼翼，雙戟簫史，昇僊芝蘭，玉樹森森，滿前我銘，公墓執筆，淚漣後有達者，來拜茲阡。

天地之大德曰生，人居覆載之中，所以盡道而立極者，孝而已矣，仁而已矣，孝者所以植人之基，仁者所以

充孝之量二者兼資而後可爲當世之矜式卓哉必公其孝其仁其可爲今世之矜式乎公諱彰孝字莊曉別號允和瀾江慈谿縣人係出單父宰後鳴琴而治潛德聿彰遞傳至南宋有光祿公銀者由剡遷慈爰世居杜若之濱遂爲慈谿望族高祖諱江曾祖諱如梓並授登仕郎祖諱文桓國學生考諱元塘本生考諱元壕以公貴並贈奉政大夫又以公之子貴晉贈資政大夫妣氏葉本生妣氏樂均誥贈夫人兄弟四人公居三幼聰穎讀四子書貫通大義會時局多艱棄儒業就買於杭州當是時粵匪陷浙省四出侵暴公困居危城絕糧旬日繼旬旬逃竄夜宿古廟中漏三下夢恍惚有銀髮老人呼之曰走公巽然覺然惶懼不敢逃又入夢聞呼者三迺亟起潛逃至廟門時雨味爽行半途徑益荒僻飢餓叫號猝一虎迎面而來公知虎直視亟臥路側虎越足而過兩涉大難卒能履險如夷皆公精誠所感格也天佑善人豈幸哉粵寇救平公默知國家將興正值可爲之際遂擴充稻業大啓榭宇經營十餘稔家業迺蒸蒸日上矣考諸孝經曰夫孝德之本也教之所由生也公孝友根莖至性三十失怙擗踊哭泣有如孺子之慕事龔堂及寡嫂益誠懇周擊善待猶子無異所生推其肫篤之誼於三黨朋友間睦嫻任恤閭澤咸施孟子云親親仁民仁民愛物公蓋能深知其意矣先是有遭粵匪之難者枯骨零落暴露荒郊公嘆曰掩骼埋骸月令所重揆諸本心既有不忍而陳尸人積久抑亦瘴厲所蒸起也爰特捐鉅貲購買山麓高原若干畝有死無所歸者任其掩埋仁德沾溉下被九京矣此外施舍醫藥建設興梁利物濟人之事難更僕數嗚呼可不謂仁矣哉公先以鉅貲助邊例授同知分發江蘇補用公潛然不以爲榮有勸之仕者公辭曰吾纓短汲長仕官非所願惟期子孫讀書爲善稍有裨益於國家不負我平日所期亦已足矣其謙抑淵度如此晚年尤注意教育規立義塾名曰奮經堂做宋范文正公義田法購良田千畝延名師課讀宗族中之孤寒無力者詩曰成人有德小子有造豈不懿與維時嘉定廖毅士巡撫浙省具狀奏聞褒獎樂善好施匾額一時榮之公猶子起濤子崇祿光緒

乙酉丁酉兩科中式舉人此外列學官登仕籍者踰踰躋躋五步十聯識者僉以爲公樹德種福故能報施滋大若斯也繼公而起者當益孳孳爲善矣公以清光緒乙未八月丙戌寅時生以光緒庚子正月戊申亥時卒春秋六十有六葬於本邑鳴鶴鄉後世昌之原德配俞太夫人以道光丁酉八月丁未巳時生以咸豐辛酉十二月乙亥巳時卒生子崇煥二品頂戴賞戴花翎直隸補用道繼配裘太夫人以清道光甲辰六月甲寅卯時生以宣統己酉正月甲申亥時卒生子崇祿孫五人曾孫二冠服服務金融爲實業家冕察營紡織業頗有建樹現正赴美攷察將來學成回國對於邦家富有贊助也曾孫女幾捐資興學亦有聲聞於時云

廬江吳南陔先生墓表丁亥

孟子有言一鄉之善士斯友一鄉之善士推而至於一國天下宋周子有言善人多則賢才輔而天下治諒哉斯言善人者天下國家之元氣也吾於吳先生南陔深有契焉先生諱憲升南陔其字又號崎翁皖廬江人先世自青陽遷合肥復遷廬江遂占籍焉曾祖諱輝卿舉鄉飲大賓祖諱天安記名總兵考諱家相候選州同知本生考家齊同知銜江蘇卽補知縣嗣考本生考均早卒先生幼時連丁外艱梵梵在疚孝思彌篤讀禮之餘出應賓客已如成人民國二年陳其美將軍舉義淞滬先生翊贊有功旋棄去歸與鄉人規辦廬江中學成績燦然冠皖省各校在鄉並興革利弊扶困抑強盧永祥將軍督浙敦聘先生堅辭不獲參贊戎機旋亦棄去蓋其先覺之智遠矣退梨郎溪南瀟湖濱田萬畝躬自耘耔穉穉溥暑燒薙行水藉糞土疆歲則大熟民國二十年大浸稽天江水倒灌大吏徵隄防築先生慨然曰技能非雖然非有仁義固結人心詎肯在雪霜風雨中安其勞而樂其利哉論者以爲名言蓋其好善之誠深矣軍興以前先生被舉總理當塗花津湖田墾事子常憊因其疾新瘥婉言勸阻盡少息先生又慨然曰曩者吾梨郎溪民得粒食無慮此湖

田幸成又可活數萬人的生命吾不敢以孱體謬資會軍書旁午未實行厥後郎溪告警廬江又岌岌而寇盜
震先生名有黃巾不入鄭公鄉之誠方是時先生慨大局艱危侘僚太息憂憤莫殫致疽發於項連醫二十
七年十二月二十八日卒春秋五十有九德配許夫人繼潘夫人簞室宛須子四常壽潘出賢南大學副教
授常照宛出郎溪分團主任常熊潘出盧江縣參議員常杰須出幼讀女三孫六孫女九先生慷慨豁達然
諾不欺平生邃於學洽熟吏事兼工書畫願皆不自意以爲君子務本首崇孝弟事母某太夫人溫清必謹
視無形聽無聲棄養哀毀水漿不入口鄰里爲糜粥以拯之甚哉孝爲萬善之原先生洵無間矣循是而
推之奉寡嫂撫弱弟訓諸姪罔不盡禮祖塋習於水先生大憫亟遷善地詔諸子曰生人富潤屋陰陽無
二致庸可忽乎子常壽爲余及門弟子聰敏好學性尤篤實爲先生所鍾愛余常勗以讀經救國尤以孝經
爲大本蓋此書爲萬古不刊之作近通儒番禺陳東塾先生謂學字从孝教字亦从孝教者非孝無以爲教
學者非孝無以爲學故曰孝德之本也教之所由生也常壽旣以孝弟成其家教以之自勉卽以之教人積
善餘慶保合太和庶幾如孝治章所言天下和平災害不生禍亂不作豈不懿歟爰闢揚先生善行卽以爲
常壽歸

浙江王一亭先生功德紀念碑丙戌

天地之所以長存國家之所以永久者善氣而已矣善氣之在天下拭目而視之不可得而見也傾耳而聽
之不可得而聞也惟旁薄默運於人心消息之微賴以綿延弗替宜聖嘆善人不易見吾於近世得一人焉
曰王先生一亭先生諱震一亭其字世居浙江吳興後遷江蘇南匯縣周浦鎮曾祖諱樹德祖諱天祥考諱
福溇本生考諱馥棠妣氏蔣先生自幼開敏逾人家貧依外家教養喜讀經史十五歲入滬市習錢業閱三
年就學廣方言館舊學新知精研並進已嶄然露頭角矣旋復經營商業懋遷有無億則屢中貿易家嘆服

以爲弗及而先生益謙退斂抑不伐嘗曰一己之榮不若與人共榮推之遠大要與社會國家共享其榮其志願宏遠如此辛亥前國事竄敗岌岌不可終日會陳英士先生來滬先生與結納當是時宋教仁譚人鳳于右任諸先生奔走謀改革事先生並與往還兼教勸沈綬雲先生出巨貲補助民立報又與同志籌辦民聲報廣通聲氣會廣東黃花崗事敗先生痛之每屆演講聲淚俱下武漢事起陳英士先生攻上海製造局失敗被獲先生偕李平書先生赴局訪局長陸士珩先生說以大義慷慨激昂當事者感動遂不加害泊上海光復孫總理來滬組織軍政府統一各省先生被推爲交通兼農商部長及同盟總會總攝黨務復兼經濟部長洎清廷遜位袁項城帝制自爲因先生與英士先生俱以義俠聞於世恐不便於己始以利略繼以威脅下令通緝先生潛避得免仍留海上與同志激厲反袁並爲宋教仁先生經紀喪務洎雲南起義海內響應袁以憂卒先生喟然嘆曰民生憔悴若此當以爲善爲職志矣適奉太夫人命休養經年先生自維體氣虧孱倘然退隱登意慈善事業孜孜不倦綜計辦理災賑其奉國民政府命令設施者有若十八年三月特派爲賑災委員會委員兼駐滬辦事處主任十九年二月特派爲振務委員會常務委員兼駐滬辦事處主任二十年八月聘任爲救濟水災委員會委員兼聯絡組委員二十五年三月又特派爲中央救濟準備金保管委員會委員長此外若任中國紅十字會總會長上海華洋義賑會董事等與夫扶生救死濟良育才諸大端屢指難數具詳於家乘事略中余於壬申春因太倉水災造訪先生於上海仁濟堂先生藹乎其容粹乎其德維時高朋滿座先生獨與余細譚命其子傳熊酬答諸客卒賴其力募東水災會得以成立至今民戴其德嗚呼可謂仁心仁聞遐邇咸孚者矣唐李遐叔云大兵之後必有凶年正今日之謂安得如先生者出默祭善因廣積善果俾善氣彌綸於寰宇吾民皆喁喁得所豈不懿歟先生提倡道德教育不遺餘力自大學以至小學有請指示方針者罔不爲之悉心規畫平生兼擅繪事喜繪忠孝圖聖蹟圖流民

闕俱於世道人心深有裨益丁丑事變奉蔣主席電召紆道赴港不幸遘病奉勅夙疾折回至滬甫半日遽歸道山無論識與不識咸流涕曰痛哉當世失一善人矣是年七十有二明年某月爲先生十週年紀念爰歷敘其生平用備政府採錄史傳並以質諸知言之君子

美國李克樂先生紀念碑序

維中華民國三十七年歲次戊子二月吉日當公曆一八八二年三月十六日爲美國醫學博士李克樂先生創建錫邑普仁醫院四十週紀念良辰邦人君子僉以博士仁德熱心積善長久請余撰文勒石以垂不朽按博士生於公曆一八八二年六月十七日爲佛及尼亞省人自幼聰穎異常太翁李亨利教士神學博士太夫人馬氏蘿岫昆季八人博士行三畢業佛及尼亞大學得醫學博士學位旋入支加哥海軍醫院供職一九〇六年二月二十日借美聖公會航海來華三月至無錫嗣建門診部旋奉派入上海同仁及廣仁醫院佐理半載一九〇八年三月十六日普仁醫院建築竣工行開幕禮錫金兩縣長及諸邑紳先生並上海聖公會等均來襄典禮回溯普仁醫院創辦以前十餘年間錫邑精於西醫者僅慈谿楊君維翰一人楊君稔知博士脾誠懇摯精參九藏之動過從葦密博士得與邑紳薛南溟華海初裘可桴棹岐臣諸先生相聯絡而獲其協助者胥由楊氏之介卽其左右贊襄之者若施亦臨醫師曾志珊先生亦臨醫師楊氏之同學也志珊先生楊氏之及門也當醫院成立各部築室先其要者至手術室及愛克司光室暨病房擴充並內外科診察病理檢驗配藥等經營機構凡歷若干年始蒞事蓋其難其慎如此世變滄桑日寇內戩三十年十二月八日博士爲敵拘禁於其宅內歷四月餘始由敵與其他無錫江陰蘇州諸美僑同時押離錫邑顛沛流離不堪言狀洎翌年六月二十九日始遣送返美與日倖交換博士返美後仍查意行道百折不撓幸而天心斡轉寰宇重光勝利以後博士遽返錫山重掌普仁醫院一九四七年十月十九日闔縣人士僉

曰博士有造於我已爰公推博士爲無錫縣榮譽縣民徐邑長淵若授子榮譽縣民證書初博士在醫院時曾挈眷來錫嗣因其夫人搆疾醫家斷爲中國水生與夫人病體不宜爰即偕返美邦其篤於伉儷又如此博士離華後錫邑人思之不置余維古人有言不爲良相卽爲良醫此就個人而言若夫異邦之士來中國擬醫院德澤普及四方者則惟李博士爲最凡西士之講求道德者專以博愛爲宗旨而唐韓退之先生原道篇曰博愛之謂仁仁者人也人道之根原也推其分量極於博施濟衆其所沾溉豈不大且遠哉倘吾國人皆能充大公無我之心欲立立人欲達達人社會國家均無人已之隔閡則百姓之憔悴困苦或可稍紓矣乎博士又嘗任中華醫學會美國醫學會美國外科學會美國佛及尼亞醫學會學術會員並上海約翰大學校董兼校董會副主席惟其醫學精純故聞望交孚若是雖然博士有其德而無其位其闡澤孔長流行無間倘當道者能提倡於上則聲聞洋溢羣黎百姓徧受其德達於八埏九域中國其從此太平矣世界其從此輯睦矣吾敘博士之善行不禁爲之凜然高望也

吳興楊旬侯先生墓誌銘丁亥

乾坤消息之理鬱而必光故有積善數十年扶輿旁薄之氣屯艱而未發而其後乃騰躍而熾昌者非天道報施之滯滯盜義理氣數之轉移固當如是也若吳興楊旬侯先生積善終身福及子孫而其德其行乃丕顯於世豈非明效大驗哉先生諱文藩字旬侯浙江吳興縣藉幼聰穎踴躍風發矢志勤學年十八遊於庠文名藉藉次年德配陸夫人來歸侍奉庭闈先意承志榮區滃澗甘必具先生以中饋賢孝無內顧憂查致力舉子業願數奇不偶甲午丁酉兩科鄉試均荐而不售先生喟然嘆曰天可限我功名詎能限我事業耶第環顧商場惟絲業乃祖考貽謀未可失墜爰棄儒就商乃仍遭數奇折閱大耗不得已與族人公議分任債務絲毫靡所欺爾時椿萱均經凋謝回憶白華潔養不覺悲從中來旣又喟然嘆曰家業隆替委諸命

惟是同氣連枝之人成才與否皆我之責爰撫兩辰佩瑜兩弟曲盡唐棣之愛鄉里父老輩咸曰幸哉有子如此也且夫人之行莫大於孝積善之家必有所慶和氣所萃蘊爲麻徵於是德門寢熾而獲昌矣令子毅余及門弟子也方余署商部總長時稔知鐵路爲全國樞紐譬諸人身血脈不容稍有停滯洎出掌南洋大學首設鐵路科培植路務人才而毅深知余用意於大學畢業後適奉派赴美國專攻鐵路機械工程學成回國肆展經猷歷任交通鐵道兩部及平綏膠濟北甯津浦各鐵路要職丁丑事變毅更爲國宣勞佐理路政沐雨櫛風幾於不遑暇日比年奉派任平漢區鐵路管理局副局長兼北段管理處處長每當躬膺要職時先生必諄諄訓告勗以盡忠盡職之道蓋福國利民本毅之素志由其熟聞庭訓者然也近今風尚澆薄忠厚二字或目爲迂闊矣然積厚者流光觀於旬侯先生之平生忠厚何嘗不食美報世有明達者何憚而不爲善哉先生以清同治丙寅十一月初七日生民國三十六年丁亥二月二十一日卒於北京府第享壽八十有二陸夫人先十三年卒生子三女一惟毅與女靜嫻存孫男女三將於某年某月某日歸葬於某原之阡銘曰

積善成名義經言造物報施絕無偏先生潛德鬱未宜輟光匿采數十年有子名聞朝野間精研路政宏且專陟彼崔嵬山穴穿海底置綫驚蛟躡鼉馳電掣達塞邊興國民夙所嫻凡茲鉅業方將鮮罔非本諸庭訓嚴鄉里邦人爭相羨僉曰美哉口碑傳他時蘭玉滿階前門閭光大後昆賢勿替引之習詩篇穆穆棣棣拜茲阡

海門薛雨霖先生墓誌銘丙戌

昔年余嘗作海門薛母施太夫人墓碣銘其嗣雨霖先生見之曰是真能闡潛德幽光者因諭其子一塵曰我死之後亦必請唐先生撰銘以冀不朽洎丁亥春距先生之歿將更易寒暑矣一塵余及門弟子也慙慙

然奉遺命郵行狀來乞銘嗚呼易傳有言聲相應氣相求矧先生制行堅苦卓絕有足傳者奚可以無銘先生諱民忠字雨霖江蘇海門人考諱某字尙志先生三歲而孤同族覬其遺產謀并吞之母施太夫人伶仃寡弱勢不能敵乃依先人國爲護符綬葬二十一年人咸服其膽識云先生幼聰慧七歲入塾業師趙先生教以方字過目不忘歲杪假期督課之無一字訛十二歲入本邑天主堂公學成績優美十六歲選送上海徐家匯天主堂公學法文班窺天文地理數學儀器圖書之富沈浸醞郁學識日進又以時局多故亟宜知新爰瀏覽報章益聞錄蓋欲體用本末一以貫之足徵抱負之闕遠矣母太夫人家境屢空先生乏資歸省依戀不自已輒仰天作白雲之思方是時堂中擬派先生赴蘇皖兩省傳教先生以抱德未足自信仍以儒衣冠歸鄉里且夫人生斯世以救人爲當務之急古人云不爲良相卽爲良醫以良醫之救人與良相之救國同也先生於中年結褵後設帳於如皋城乃以先人舊藏醫籍悉數攜行篋篋夜研討間有疑問質諸名醫施青選先生於是醫學殫精洞見九藏適返故鄉聲譽大著願推其活人之志更有不可及者邇者閩閩元氣凋耗貧病交困者實繁有徒先生凡遇赤貧無力購藥者輒於方牋代爲計值年終代償之施診病者櫛風沐雨罔辭勞瘁卽雨夜叩門無不振衣立起迨病劇時猶爲人切脈不稍懈家人勸其稍休則曰他人遠道來求我診詎可使之失望況我神識猶清多救一命吾心卽一刻稍安嗚呼先生之心可謂至仁推是心以救國則太平可坐而致矣居恆訓子女曰敬曰儉曰勤作爲家訓布衣脫粟安之若素邑之大橋鎮周四十里中長幼貴賤靡不知先生爲忠厚長者丙戌春萼荷倣擾風鶴頻傳驚悸之餘引動夙疾遽歸道山嗚呼鄉里失一善人矣先生以清同治某年某月某日生民三十五年丙戌三月二十六日卒春秋七十有五配沈夫人有賢德子二長一應樸屬能文克世其家現任通如海啓靖五縣善後救濟協會秘書次一鳴習醫學女六已先後遺嫁孫男二孫女七銘曰

內經金匱傳真傳邇維天士與東垣寥寥天瓊斯道晦庸醫恟怒爭比肩先生崛起淮海間探厥奧窵訪名賢活人活國理同原一息尙存無間然爲善有後熾而昌崢嶸蘭玉列華堂巍巍豐碑植道左永言孝思慎毋忘

秦縣陸答山先生墓誌銘乙酉

先生諱春元答山其字江蘇秦縣人先世居東台縣虬湖考諱某字錦蘭妣某太夫人世業農好善行先生幼聰慧懷大志母夫人鍾愛倍至六歲入學就傳讀書穎悟一目數行下九歲能屬文下筆清潤熟師楊簡青先生企賞之曰此大器也已亥秋某太夫人棄養時先生年十七悲哀盡禮初先生以家貧輟學就農非所志也簡青先生憫之召入塾讀免修脯踰年從楊若玉先生函授時與盧君梓森縱風昆季相切劘參與飲薤淘水各書院文會勸學不懈乃叔少伯先生介農家館以濟其貧嗣若玉先生召入塾課小學生分贈束修二十圓先生喜文思益進小試輒前列惜科舉旋廢止未獲入泮甲辰冬南遷本邑萬家莊賃章氏小書室以居家無長物四壁蕭然乙己秋措薄資東渡求學先入經緯學堂速成師範及東京高等警務學堂繼肄法政大學法政科資行將告竭矣幸賴內助盧夫人籌畫接濟始克學成歸國丁未九月遭厥考喪時先生任浙江三台中學教職聞噩耗痛不欲生徒跣而歸附身附棺概從豐厚仔肩獨鉅可謂孝弟兼至矣己酉任拊茶啓秀高小教職又改賃乃伯洲伯先生廂屋以居庚戌秋赴北京應民政部警政試列優等部咨江蘇撫院錄用辛亥春奉巡警道汪觀察委任道署衛生科員旋由吳觀察調任文牘主稿是年八月政體改變江蘇應省長稔知先生賢能委任內務司科員癸丑甯變遽起先生內主鎮靜外奠民生盡力幹旋閩閩安堵會省長韓公紫石長蘇嘉鮮先生才委充省署第二科科員甲寅張南通長農商部調先生之北京秋應知事試取列乙等籤分山東乙卯赴魯省蔡巡按使迭委先生查要案旋應課吏館試獲首選是

年秋委署蒲台縣知事由是得稍展經猷而先生向以清慎動自矢察吏愛民轄境大治丙辰冬調省蒲邑紳士數千人製贈旗匾香花扶老攜幼相率恭送有感激流涕者僉謂政績之優良前此所未有也厥後樂陵商河陽穀黃等縣咸慕先生精嫻法律爭聘爲推官先生守聖門使無訟之訓民情悅服所至有聲各縣長稱道不置然而先生胞與之仁慈施濟之宏博又皆寓於參與道院之時先是濱縣署設卮壇傳道教先生迺就劉公濟垣邸第請求開沙於是益勵修爲作善罔懈庚申冬侍壇授太乙北極真經三十六分先生躬與其盛辛酉春創濟南道院並成立祀會又創天津及北京院會壬戌夏返里又創泰縣道院於曲塘又創東台道院於虬湖癸亥春赴安慶道院布道後又創鎮江道院並參與南院第三母壇授午集正經旋赴淮陰又創淮陰道院是年秋遷秦院於小香岳曲院同時成立又遷東台道院於楊家花園虬湖院亦成立綜此數十年中先生經營道院不遺餘力而其卓卓可傳者尤在濬河堵口及放賑剿匪三大端辛酉夏利津黃河決口人民蕩析離居濟已會施賑先生不避炎天酷暑奔走數十里拯救生命於洪濤駭浪中全活者數千人乙丑春張魯督委先生署壽張知事下車伊始立赴北河膠工搶險又赴南河揚工搶險甫告訖工河北省李升屯儻報決口波及壽邑黃花寺先生與河工林局長調集鄰縣七千餘壯夫搶護七晝夜迺氣數慘斃卒無效先生痛哭將投河以殉林局長泣止之而張督亦知劫運難挽寬其處分當是時先生籌救濟善後汲汲皇皇突有土匪數千人窺擾聊南八縣鄰邑避難之民僑集壽張先生遴選兵團壯丁分守要隘防匪竄入一面馳電省垣請彈三十萬發親赴裴城寺進剿分頭夾擊匪不支敗退河南先生曰不可留餘孽以害民也復渡河追剿盡根株痛斷之躬冒矢石苦戰十九晝夜擊斃渠魁明振海斬獲無數救出架票六百餘人歡聲雷動凱旋之日各邑村民設香案奉酒卮以勞軍士先生仁德可謂至矣丙寅春有創李黃堵口之議者先生以爲治水之法疏濬與隄防當因地制宜未可拘執赴省謁張督面陳利害張督嘉

納之委先生爲堵口工程處坐辦旋升東昌道尹兼攝聊城縣篆縣民謳歌載道鐫碑紀功比時東省大軍雲集苛政間出先生悉白大吏汰除之未幾奉派兼東昌道清鄉專局長暨高等軍學執法官軍營內外肅然丁卯歲又奉派督備司令惟時稅餉短絀有議種罌粟以裕餉源者先生曰是飲鴆止渴也卽赴省痛陳六弊得罷止陽穀方令以芻捐激民變聚衆數十萬人持械圍城三日城岌岌垂破方令電省請兵張督派第八師往剿先生力持不可親往剴切曉諭億兆投誠棄械伏地呼青天迨入城邑民焚香跪迎呼救星七邑不驚上峯嘉之是年秋先生以廉俸所入積羨七千金歸而謀諸婦媠做宋朱子常平社倉法倡建積穀倉厥後東昌道屬一體做行闔澤尤溥旋因其哲嗣龍甲大病向愈感激天恩採米百餘石於隆冬祁寒時散給貧民夫隱貧最慘酷者莫如無食當朔風栗烈之交飢寒顛踣以死者殆不可數故施米施粥人皆視爲尋常事而不知其維護地方元氣功德實無津涯初陽穀坡李莊天主堂被匪竄據教士被虜者八人邑令王某驚悸成疾先生奉委往剿以教士在彼按鼠忌器爰出奇計做戰國時齊章子變微章雜秦軍中爲內應一面設糧衷匪襲戰七晝夜匪大潰教士悉數生還捷書報到時威聲震中外嗚呼盛矣哉其用兵亦神矣哉戊辰春北伐軍抵魯省先生先遣眷屬赴津踰月地方負責有人卽懷印綬從容北上越日魯省大吏亦至先生卽交篆報銷潔身高尚進退裕如也四月乘輪返珂里就野王莊關地相宅已春鳩工庀材督工營造七閱月而落成乃攸芋馮庚午春匪擾河北勢猖獗不得已徙曲塘以避之適請兵彈壓始獲稍安辛未夏蘇北大水洪波浸及下河五縣先生與曲院陳君望邱等商救濟皆願毀家抒難亦難得事也時江北已會辦事處設曲卽商派船船營救災民並設收容所以安集之先生與黃君南潤乘輪勘災猝遇颶風舟幾覆卒無恙識者謂天佑善人也當是時熊秉三先生主持賑務先生呼籲乞賑並親走牛津蘇滬商籌關濟法得救護被災同胞數十萬人厥功尤鉅壬申春泰縣南鄉被水災先生擬浚田家港通江以工代賑

被推爲東南五區浚河委員會副委員長數月厥工蒞事是年冬請設江北母壇於其家甲戌春行安位禮冬奉壇派爲綱紀監宗副宗主丙子夏江南各地相繼淪陷難民逃江北者甚夥曲會設所收容之一面勸募鉅款購備恤至戊寅春江北各地兵氛逼近先生避地白塘其秋蘇北設立國際委員會推派先生調查東台災况先生惻然動懷詳晰列表備陳慘狀於是委員會感其誠意撥款賑救旋以河南花園口趙口同決恐黃水將奪淮而下迺條陳委員會請設法堵塞雖得會長成翊青省長韓紫石協同贊助迄未就緒時人咸惜之庚辰春大軍壓境兵匪雜沓紛擾閭閻先生家亦被洗劫其夫人幾罹於厄先生慨嘆時艱於是

有龍蛇蒙難記之作惟其憂民憂國之心結轉不去於懷祇以手無寸柄壯志未伸於是又有馬上呻吟記之作厥後鬱伊無聊遁於詩酒而軌道之心始終不怠靜坐修養功益精進去歲創立四支母壇亭於曲埠院壇判錫名燁光亭先生作記以留紀念世衰道微論者輒詆修道爲空虛不知古世相傳與神人本相告語旦夕相詔至寔黎絕地天通而神人始隔虬壇亦古來與神人交接之關鈕神道設教者亦所以勉人爲善之方也而恂恂者迺素諸冥昏默之域蓋不免誤會宗旨矣道並行而不相悖豈不信哉昔子張問善人之道孔子曰不踐迹亦不入於室若先生慈祥果敢以行善可謂踐迹矣惜未奉教於洙泗之門也孔子又曰善人吾不得而見今先生往矣緬懷遺蹟感慨抑復何如先生生於某年某月某日以民國某年十月十日卒春秋幾十有幾德配盧夫人有賢德子一龍甲畢業於中央軍官學校因長於礮科兵法留校充教官有聲克世其家娶丁氏女七長英適徐次棣適范三荃適楊早寡四芸適孫五苓適張六芳適王七芝孫一騰蛟將於某年某月某日營葬於某原之阡其孤龍甲介舅氏盧君煌同邑梅生竹髮郵乞銘梅生余門下士也爰爲銘曰

修道立教萌抵中庸儒家道家哲理大通先生先覺啓明昭蒙本身作則幸樹玄風黃流東趨汎濫洪濼先

生貧之砥柱，遇匪人，森動蚩霧，橫空先生平之，荏苒匿蹤，綜厥平生，兼德事功，經文緯武，廓然至公，拯民行善，貨大聲，闔焚香，羅拜者，艾兒童，萬夫與，誦口碑，大同子孫，昌熾洽頌，闕宮石碣，崔崑豐碑，穹隆銘，茲懋績，昭示靡窮。

歷城曹幼珊先生墓誌銘乙兩

先生姓曹氏，諱某，幼珊，其字山東歷城縣人。曾祖諱某，祖諱某，考諱某，其先代爲平陽世家，久宦淮海，世有積德。先生天資聰穎，自幼嶄然，露頭角，山左風俗，故尚武，而先生尤以俠義自豪，讀書不屑屑於章句之末，好挽強弓，習武事，築石擊刺，兼擅其能，豈以安國安民爲職志，鄉父老咸目爲大器。清同治光緒之間，四方多難，蚩霧橫飛，先生隨左文襄彭剛直兩公，輾轉戎行，益精韜略，雲龍風虎之從，足跡遂徧南北。二公倚畀之如左右手，先生以爲知己，難得，愈自奮勵，勤於所事，以軍功保知縣分省。吉林先生故洞悉邊情，於輿地之學，山阻水險，均能挖厥要隘，而下車伊始，壹以體恤民艱爲主旨，輿情愛戴，頗有漢代龔萬召杜之目。昔陸賈有言：天下安注意，相天下危注意，將相並重，卽文武兼資。故清初有文武互改之制，互改者，以文人任武職，以武人任文官也。是以用人不囿於一隅，而任職者皆得各盡其長，動而不括，先生以武略而膺文職，非所謂允文允武者耶？慨自有清末葉內政寢廢，外交日艱，吏治動多棘手，天災人禍相迫而來，知幾之士，避地之儔，咸以奉吉爲樂，土襁負而至，瑣尾流離，情狀極可憫惻。先生怒焉，神傷加意，拊循勞來，匡直因其瞻烏無岸也，爰設棲流，所以庇之，因其噉鴻中澤也，爰設施粥，所以調之，蓋爲善之舉，擴充彌安，用是口碑載道，頌爲萬家生佛。而先生自視，欲然絕無德色，此非至聖所稱善人者耶？吾嘗謂居今之世，惟以爲善爲當務之急，而善因善果，稍縱卽逝，必宜汲汲遑遑，以赴之，故曰見善如不及，此言深可味也。先生積善若斯，一時名重公卿，聞朝野，膏肓咸折節樂與之交，如李氏景林、張氏宗昌、吳氏佩孚，輩皆詢以軍樞要務，暨

民生疾苦一切緩靖事宜先生皆開誠告之齋審諤諤無私無隱蓋將擴善與人同之素願也晚年蒼晦精性皈依佛教徧謁名山開社會慈善福利之源此實有見於明心悟性之功非有託而逃禪也不幸遘疾以卒享壽七十有五邦人君子咸惜之先生生於清同治六年丁卯七月十八日以民國二十九年庚辰二月九日卒德配某夫人子二福海福坤孫三寶元寶豐寶成將於某年某月某日卜葬於上海漕河涇之萬年公墓銘曰

昔聖哲之明訓兮作善者降百祥維天道無私阿兮炳日星之昭彰緊先生之明達兮羣欽以爲智囊羌多才而多藝兮綜文武而兼擅其長嘗出宰於東方兮孳孳勤政而不遑矧愛民如子兮洵有守而有爲胡靈光之儼墮兮迓雲旗之逶迤頌千秋之令望兮浩氣旁薄乎蒼穹爰勒石以永貞兮隔後來者以無窮

江陰沙君循矩墓誌銘丁亥

清光緒癸未甲申之交瑞安黃宗師體芳奉命督學江蘇學署在江陰縣城中公抵任後卽於署之東南隅建設書院顏曰南菁大江南北人才鱗萃建築之初天有雨粟之瑞見南匯張山長文虎紀載碑天人感應亦云奇矣院中設訓誥詞章四齋舍余於乙酉歲住院時江陰沙君從心字循矩爲訓字齋齋長余初之院見君如舊相識君方致力於小學經學余與講貫均無間然君具剛練才凡諸同學寄卷寄題悉一身任之初君任禮延書院經董繼又兼南菁董事職整理沙田事此坵彼漲造圩築堤事尤繁曠君擘畫縝密院產於以鞏固識者咸服君精力過人詎知其皆由茹苦而來蓋君幼時遭洪楊亂曾充衣肆學徒供灑掃職已而棄商就儒弱冠後卽遊於庠食廩餼乙酉歲君膺拔貢選戊子登賢書文名藉甚顧數奇三上春闈不第乃援例晉內閣中書以堂上太夫人年高時常歸省僕僕風塵弗恤也當是時朝廷方銳意變法君默察帖括業將廢亟宜改絃易轍不久果奉詔改書院爲學堂嗣以地方公益事權極紛紜頗有視爲利藪者君埒

除故習將本邑公款公產併爲教養兩局屬於教者如書院賓興試館義塾等咸隸焉屬於養者如積穀育嬰保嬰恤養等咸隸焉綱舉目張動中肯綮雖未見諸實行而已開款產經理處之先聲矣已而遇庚子拳匪之亂君長歎曰時事不可爲矣遂卽挂冠歸易傳有言貞者事之幹君秉貞固幹事之才儻使其發展經綸必可大有爲於世乃僅小試其端養晦林泉整理梓鄉事務未竟其用惜哉惜哉君生於清道光三十年三月二日卒於光緒二十九年九月二十三日享年五十有四曾祖諱某字約齋官湖北石首縣有政聲入祀名宦祠妣某太夫人祖諱某字慎之妣某太夫人考諱某字長卿博覽羣書不求仕進精通醫理樂善施濟光緒辛巳歲某月某日卒君哀痛甚閉門讀禮撰製藥未嘗見齒妣章太夫人有賢德爲鄉黨所稱壬寅歲十一月三日卒君痛切蓼我銜恤靡已痰喘劇發遂於翌年癸卯九月卒蓋距母喪未踰年也嗚呼可謂孝也已德配章夫人同里太學生奉政大夫諱鳳銜字麗生女翰林院編修諱際治字琴若胞姊孝慈儉勤先意承志得堂上歡相夫以禮治家有則清咸豐二年十月二日生民國八年己未四月十日卒享壽六十有八與君舍葬邑之東鄉顧三六保陶灣祖塋之阡子四長亮功壬寅科舉人官法部尋卒次慕怡傷次誌銜留學東瀛習師範在里創辦延學校勞動倍著次順延攷入雷電學校派海軍艦練習未幾卒女三長適章次不字三適王孫六變動同壽武驥炯劬劬鄧凡孫女二紹勳傷戊吉適繆曾孫男三曾孫女二君所著遺稿零落僅散見於南菁札記及文集中餘則無存矣自君卒後世變迭承滄桑屢易追憶昔時同學如江陰馮君篋若丹徒陳君善餘尹君墨卿泰州盧君義侶常熟孫君師鄭輩十餘人已先後歸道山其幸如余亦幡然衰老矣追維身世感嘆奚如今復銘君墓曷禁悄然以悲也其辭曰

君山巖巖江水湯湯聿生名彥君發其祥南菁樸學內閣闕才榮登仕版側席三台泊乎歸隱潔養蘭陔五十而暮僉曰孝哉綜君平生不愧賢能因應曲當肫肫其誠多才與藝大樂同和春秋佳日樽酒婆娑正宮

散羽擊節高歌長笛一聲抗懷千古我銘怡怡知已有數

廣西北流陳君柱尊墓誌銘甲申

君諱柱字柱尊晚年別號守玄考諱某妣某氏柱尊性至孝侍奉庭闈恪體親意初師事本省蘇寓庸先生繼遊學江蘇從福建陳石遺先生及余受學得聞道要柱尊大喜舉凡羣經諸子靡不心維口誦淹貫無遺發憤纂述著有中庸通義墨子閒詁補正等書不下十餘種願落拓不收拾旋作旋棄用是草藁散佚鮮有傳本晚歲延名師者爭聘之余於國學專修學校設特別講座月必講演二次間出新義聽者多傾倒悅服好飲酒能引數巨觥與余同席輒歌詩誦文余戲以陳鶯啞呼之丁丑以後蒿目時艱鬱伊痛哭人咸訝以爲狂然卒傷於酒甲申歲四月得中風證醫家戒其勿飲酒勿用心柱尊頗聽其言然病根既深是歲九月再中風則不可救矣遂以十月一日卒長吉嘔心山木自伐嗚呼可哀也已柱尊體貌魁梧志氣闊遠余以爲必能大展其用乃卒至於此豈造物之忌才耶抑中有不自得者耶配某氏子一百二百三百四百女松英梧英孫幾人孫女幾人銘曰

緊勾漏之浩氣特鍾毓於文賢嗟我守玄神思周億萬里著述都千百篇筆如椽木灑風雨飲若鯨魚吸百川主盟文牘孰與爭後先百家騰躍吾無間然紆鬱時局痛哭流涕而莫能宣既拔劍而斫地常把酒而問天嗟我守玄胡天斬其中壽之年幸桂枝之苗秀玉昆金友克紹薪傳嗟我守玄我今爲銘淚欲漣聊傳文字留人間

太倉黃君伯樵墓碑銘戊子

先民有言人生當世宜全性分之所固有職分之所當爲性分定於內斯職分擴於外二者既交盡矣猶復孳孳屹屹至於以身殉職豈不可悲矣哉若吾鄉黃君伯樵是已君姓黃氏原名國祥改名翼字伯樵後以

字爲名江蘇太倉縣籍考諱某官水師管帶妣某氏兄諱某官陸軍軍官君世習武備幼時曾入江蘇陸軍小學旋肄業上海同濟醫學校習軍醫武漢事起君翊贊戎機泊南北統一君自省所學未足應世重研舊業再入同濟易醫爲工民國五年卒業九年赴柏林工科大學習工業管理回國後任中華鐵工廠總工程師兼經理綜君平生初精研實學繼從事實業而始終鏗而不舍者則在路政君於十三年應交通總長黃膺白先生之招任路政司總務科科长是爲君發軔任路政之始十四年任隴海路汴洛工程總務處處長至二十一年十二月鐵道部調君爲京滬滬杭甬鐵路管理局局長君籌畫提存度支以備儲還本息兩路債券價格因以增貴又籌款建築縮短京杭間相距之蘇嘉鐵路完成銜接甯波與杭州之甬甯鐵路並興造錢塘江大橋復計畫興築京滬間雙軌先成上海南翔間一段整理吳淞機廠加增機車能力提高速率開駛京滬間飛行車精心省密要以省工節時爲主行旅稱頌不置僉曰此黃先生之宏猷懋績也且夫鐵路猶人身之血脈也愈周密則民益利便消息益靈通往者余遊歷歐美各國羨其造路支幹分明大抵幹路則國家任之支路則民間任之然其宗旨重在通商惠工非以行軍耀武此爲精意所在君可謂先知先覺者矣吁當世誰復能默喻斯意哉二十三年君又赴歐美諸邦及東瀛攷察路務踰年返國亟思恢擴路政迺越載日寇內讐各路淪陷君心血付諸東流外痛時艱內感身世體微亦不能支矣自二十六年至三十年君避地九龍養痾當事者需才孔急極思起用君一任資源委員會國外貿易事務所所長又任交通郵駐港航空貨運稽核處總主任君以中央倚畀之隆力疾從公罔敢懈太平洋戰事作港九陷君病不能西遷累欵欵歎迺於三十一年十月航海之滬杜門卻掃潛研釋典殫心著述用資繕性抗戰勝利憂國之念頓舒病良已於是先後出任軍事委員會委員長駐滬代表公署祕書長臨時駐滬辦事處主任一切善後事宜悉心贊畫士民賴之回憶十六年七月上海特別市政府成立君任公用局長五載有奇籌路

藍縷百廢俱廢有如管理商辦水電事業收回外商越界經營水電電話電車法權與辦輪渡碼頭與倉庫
統一等爲他市作之模範使無人不得其所無物不得其用迄今稱道弗衰無非爲路政之先導也三十五
年二月先生出任中國紡織機器製造公司總經理兩載中卽擬設三廠已有大率伸與網絲布出品諄諄
語同人以公司廠方與從業人員及社會大眾同沾利益爲旨歸嗚呼吾鄉自陸陳諸先生講學以來士夫
束身修行人第知君綱維路政高掌遠躡而不知其內心之誠篤植品之清廉有以造斯詣也三十七年二
月君因公赴宛平路時值農歷歲杪甫得捐款君喜搆以往將分贈同人正握手告慰遽仆地氣絕醫家斷
爲突發冠狀動脈狹心證精氣神三寶告竭無法挽救嗚呼可哀也已君生於清光緒十六年某月某日以
民國三十七年二月六日辛春秋五十有八德配某夫人子幾係幾於某年某月某日葬於某原之阡其執
友方君子衡余及門弟子也綜理路政悽惋爲君請銘可見君取友之必端矣爰爲銘曰
往昔鄉諺曾有言英哲維慮二豎纏我與君同里閉閤際隔竟慳一面緣維君不愧我鄉賢明體達用能兼
全人已一貫無間然爲人忠謀心益專胡天不弔斬其年一仆不起莫扶頤我今銘君涕淚漣乾屹豐碑樹
墓前百世典型拜茲阡

太倉陸君彤士墓誌銘甲中

君諱增煒字彤士江蘇太倉人五世祖諱毅以名進士簡授陝西道監祭御史兼巡視中東兩城譽謬不阿
著有巡城瑣記行世曾祖諱錫眉拔貢生祖諱某考諱某字望之邑庠生妣黃太夫人撫孤守節茹蘖飲冰
以養以教俾至成人從兄諱增祥字星農道光某科殿試一甲一名官翰林院修撰精金石學世胄之貴爲
吾妻所僅有君事母太夫人盡孝具夙慧從同里明經金棧花孔鐵仙先生游擅詞章時孝廉姚君柳屏亦
髫齡秀發與君頡頏鄉人有東姚西陸之目弱冠補博士弟子清光緒丁酉鄉舉第六名戊戌以第一名舉

進士殿試二甲僉分刑部主事庚子拳匪之亂避難寶坻此離艱苦亂平回京晉級安徽司員外郎海升民政部衛生司郎中京蔡記名以道府用旋簡放陝西西安府遺缺知府補興安府缺時值辛亥政變途次荆棘難行未之任折回蕩望數載徐東海任總統知君賢能徵任祕書要職給一等大授寶光嘉禾章君抗懷風雅以名士自詡或議畀以關監督優缺者堅辭之自改革後高目時艱兼遭家不造感槩不能自己日與舊都二三知己嘯詠排遣以文字自娛余與君同遊於鎮洋王文貞公紫翔先生之門回憶三十餘年前君將赴興安府任道經上海余適監督南洋大學班荆道故權洽逾恆詎料時局元黃滄桑遽易同抱身世之感願瞻周道中心怛兮誦黍離麥秀之詞不覺落襟之浪浪也君以清同治十二年七月十九日生民國三十四年乙酉三月十一日卒於北京太倉會館春秋七十有三元配王夫人繼配董夫人俱有賢德子二長繼融先卒次繼舒出嗣從兄諱壽昌後三繼憲女二長適楊次適楊係五長普長晉長暄長旭長旬將於某年某月某日卜葬於某原之阡銘曰

妻江浩翰竺生名流白眉皓皓緩帶輕裘一蹶滄桑華屋山邱太乙光晦倉庚聲幽宿草淒其知己離憂翺翔李杜遺集存不壯志未竟詒厥孫謀彝訓猶在永茲千秋

太倉胡君粹士墓誌銘丙戌

沙溪胡君粹士既歿其族人偉栢賢同鄉顧若夢兩君以書來請銘嗚呼余尙忍銘粹士耶每擬屬稿心痛不能下筆踰月其猶子敬修復來敦求於是以淚和墨而爲之銘君姓胡氏諱端行字粹士太倉沙溪鎮人祖諱某考諱某字伯衡君幼失怙由祖母某太孺人撫養秉性至孝常念無父之苦侍祖母彌謹溫清定省罔或有缺方是時海禁宏開君念時艱日亟非精研科學無以應世年二十一赴上海健行公學肄業發憤攻讀旋考入南洋公學時余方掌校務見君器宇不凡德性純篤特嘉獎拔擢之請部派留學美國入滬海

斯大學精研電學越三年得碩士學位回國後學益臻完善應海門中學之聘越一載舍去任上海寶成紗廠電機工程師民國七年任國立交通大學教授多士翁服越七載君年三十有八任青島膠濟鐵路機務處廠務科科長稍得展其所學民國十七年復任交通大學教授兼機械院院長時局變遷日寇內熨君登意輟晦不與外界相通迺天不佑善噩耗遽傳令子敬侃考察路政自緬甸回國中途飢渴顛踣卒於距新背洋南約五十里某山之巔君聞耗後肝腸如裂尤以老母在堂祕不敢聞日夜舉酒遺愁竟成肺疾入上海南陽醫院療治本年二月間余遣伴人高大勛前往探問君泫然流涕曰師恩未報復來問疾何以堪當大勛見其形容消瘦頓失常態驚愾之返告余憂思益菀結越數日聞君回沙溪又越十餘日而凶問至矣嗚呼同鄉中幼學如君立品如君盡力行善如君者不克數觀迺造物遂奪其算豈忌才而不使有爲耶殆氣數之慘酷有不可知者耶吾鄉地瘠民貧方冀有善人君子經理而振興之余方屬望於君而竟至於斯是豈特鄉里之不幸抑亦國家之不幸歟余與君師弟之情歷三十餘年而君復感念余恩至死不渝余將何以報之耶區區文字其能永君於不朽耶敍君生平不覺沾襟之浪浪也君以光緒某年某月某日生以民國三十五年四月某日卒春秋五十有九配陶氏名蕙英勤儉持家簞室某氏亦能佐家政君未病數月前得癩疾證既沒後其家人遣去星散蓬飄至足痛也子敬侃先卒孫天畏方肄業上海某中學深望繼志述事克振家聲云爰爲之銘曰

三春沈寂怪騷鳴寒風苦雨助淒其天門廣開三台齊胡君歸去耀雙旂新背洋山高崔巍令子擊涕來相隨嗚呼天道如何吞恨多婁江洗恨空揚波我詔胡君幸毋哀穆將愉兮安泉臺死生禍福何祥災登任大造調胚胎願後嗣有長才繼志述事佇將來

長沙黃母楊太夫人墓志銘丙戌

嗚呼君子所以化民成俗者其必以孝爲根原乎昔宋朱子作同安主簿嘗以孝經庶人章旆示民間可謂切摯矣慈與孝義相因皆至性之固結而不可解者也大雅既醉之詩曰釐爾女士從以孫子鄭箋謂女而有士行者當生賢習子孫以隨之豈非然哉及門長沙黃生光燾篤實士也丙戌冬仲郵其母楊太夫人事略來請爲志余讀之以爲此足以當女士之德與稱竊爲之悚然起敬且忤然有動於中也按狀太夫人姓楊氏諱榮字蕙卿自幼純孝聰慧母氏梁太夫人授之讀一目數行下日盡千百言俱能背誦長從者備劉鼎臣先生受經傳通大旨梁太夫人寢疾嘗割臂和藥以療晚年撫其創輒泣然其孝思如此年十九歸敏齋黃先生上侍舅姑下相夫子靡不中禮乃天道莫測敏齋先生遽歸道山太夫人椎心欲絕願念上有翁琴材公姑龍太夫人皆癯老下有遺孤光崇光權光燾孤女靜娟老無以養幼無以長筑筑累罹逢殺然自矢以承祧鞠育爲己責一門三世老弱靡依而太夫人飲冰茹蘗勉有無歲時伏臘鄰里聚懼而太夫人門內惟聞飲泣之聲嗚呼慘矣初太夫人未嫁時性喜吟詠嘗有詩他生願化媧皇石補盡人間離恨天爲長老所傳誦至是歎曰我身匪石離恨天詎可補耶嗚呼啼矣時局元黃盈天蜚霧長沙驛驛一夕羣盜斧門入太夫人亟率舅姑登危樓復下負光壽兄弟上斷其梯幸得免論者謂太夫人急智固莫能述然亦見千鈞一髮之時天心佑善爲不虛也繼而患鄉僻不可居爰避地入城會湘中耆老結社社徵詩太夫人歎曰歲寒松柏之外惟寒梅吾可自況耳爰賦梅花詩四律哀婉變徵之音讀者爲墮淚厥後姑龍太夫人病瘋痿證太夫人奉盤沃盥料敷湯藥視無形聽無聲越三載如一日會霍符乘機四出侵暴乃囑光燾兄弟走避常德獨挈靜娟居巖城曰道塗危險吾守於茲惟城亡與亡耳無何龍太夫人棄養洎秋亂定始回省治喪太夫人痛哭爲文以祭且詔光燾等曰十年之間吾爲文祭汝父祭汝王父今又祭汝王母冰蘗餘生血淚枯矣吾之所以不死者爲撫汝兄弟故也小宛之詩曰夙興夜寐無忝爾所生汝輩其念之哉其勉之

哉回視壁間府君遺像母子相向而泣而風樹淒其寒螿冷咽若與飲泣聲相應和也嗚呼痛矣庚午靜娟子歸王姓讎年以療卒太夫人惋惜甚自是潛研內典不問世俗事考室東郭題曰向榮草堂躬藝梅花滋蘭與蕙背曰屈子難歸經云余既滋蘭之九畹兮又樹蕙之百畹余雖不能況茲高潔然浮游塵埃之外固吾志也方是時余適隱居講學於滙濱太夫人遣光燾數千里來從學資斧不繼盡蠶衣服釵珥以佐之洎光燾學成赴銓部應選任大庸縣令太夫人喜曰清明之官最可以造福地方際茲民困日甚視民如傷愛民如子救民於水火之中宜夙夜警惕以勉爲之徒善不足爲政徒法不能自行有仁心斯有仁政汝其懷之光燾受命之任後勤政恤民罔敢或懈胥乘慈母之教也復閱光燾述略曰吾母歸吾宗哭夫子哭舅姑哭兒哭女伶仃孤苦可謂極人世之至艱况獨奮羸億之身肩內外之任操危慮深駭於盜厄於兵忱於狂寇以憂以憫以困以死三十年間瘦無日不以淚痕洗面雖大節嶮然以詩見志更不幸重罹喪亂孝尊章撫孤露而簾居何其痛耶余誦讀之不禁悚然起敬忤然有動於中也詩藁表篇第四章父兮生我母兮鞠我以下凡九我字不啻勾魂攝魄然則何以報罔極之恩愛民卽所以盡孝也光燾勉乎哉太夫人以清光緒甲申二月二十九日生民國夏正丙戌四月十八日以徵疾卒於大庸官舍享壽六十有三邇來風俗日就澆漓如太夫人者洵足爲閩中之矜式矣爰述其事復繫以銘曰

吾讀周易家人卦彖辭繫曰利女貞論者謂與詩意貫思齊太姒之徽晉厥後閩閩可稱者丸熊養荻傳粉輪見今畫史稍多莫黃母卓然播芳型有子出宰大庸令諄諄明訓愛斯民願速憔悴於此甚弱時仔肩詎敢輕我今載筆述懿行千秋無愧垂令名豐碑穹窿樹道左子孫弗替此貞珉

· 泰縣盧母崔太夫人墓誌銘乙酉

古人有言不爲良相卽爲良醫此指儒醫而言也若閩閩中精於醫理者古今蓋不數觀且不第精醫學而

已其他淑德懿行俱可爲世稱道則尤憂憂乎其難之吾銘盧母崔太夫人墓不禁巽然致敬也按狀太夫人姓崔氏諱業慶其先世隸江北秦縣籍爲東亭處士朗亭先生幼女性聰慧莊謹穎悟過人朗亭先生鍾愛之先生故精岐黃業喜曰此女可紹我丹訣矣爰於禮經文藝外特授以靈樞金匱諸書太夫人研討精勤舉能見諸實用年二十歸同里盧先生質卿維時姑郭太孺人已棄養椿庭玉峯先生在堂喜賓客有孟奔風座客常滿樽酒不空太夫人黽勉有無中饋豈腆先意承志恪恭罔懈鄰里戚鄰僉曰幸哉有婦如此而太夫人不伐不矜深自歎抑居恆溫習經史又工書法雅好十七帖嘗爲質卿先生代繕文章又爲病者開方劑見者噴噴贊嘆不置質卿先生數奇闕試不獲售太夫人慰之曰讀書所以學爲聖賢非欲弋取功名也其識見高尚超出庸流如此厥後諸季成婚悉由質卿先生擔荷用是負債頗鉅而太夫人從容理置絕無芥蒂有不足則撤環珎質典以佐之而不使人知然總以連負糾紛清償不易於是躡耕已畝田從事隴畝間話雨課晴躬親耒耜蓋心力自此交瘁而立志清償舊逋天懷澹定其廉潔可風又如此迨光緒中葉玉峯先生逝世太夫人隨質卿先生舉哀盡禮未服闋而質卿先生病痢誤投補劑陷而卒太夫人急自田間歸索方閱之頓足曰是鴆毒也豈可入口吾在家何至於此天乎痛乎撫膺長號終身引爲大恨論語有言君子居無求安又曰士而懷居不足以爲士矧盧氏遺家不造不三載重罹門庭之喪逋負叢積太夫人慨然曰生存華屋死則山邱人貴遠觀奚庸戀戀吾甯棄屋斥資財無負於人也時羣季有勸止之者而太夫人毅然行之迺挈子女儻北河之浜茆屋數椽以居丙夜黑風獵獵自林中出四壁震撼太夫人籥鐙課誦聲達戶外絕不懼懼如是者歷有年泊諸子寢長甫遷居其五叔氏宅了向平之願其堅苦卓絕能人之所不能抑又如此有清末葉新學淳興出國者項背相望太夫人環顧諸子又慨然曰識時務者爲俊傑人生宇宙間當以救人救國爲己任安用墨守爲適命次君煌興從塔陸春元籌商遊學東瀛鄉人或尼之

則曰此國家事非汝輩所知卒棄產充資斧敦促治裝俾聯袂東渡學成回國灌輸文明地方風氣爲之不
變煌卓然成教育家而春元任道尹成政治家飲水思源咸歸功於太夫人片言明決民國肇造其五叔氏
創設毓賢女校延太夫人爲主教未幾同邑章氏錢氏與學相繼爭聘之南金竹箭胥出其中識者方諸晉
宣文君無多讓也其洞明時勢不爲恂愁守舊之行又復如此而余更有進焉者夫醫小道也而人之生死
係焉則藝也而進於道矣人第知太夫人多才多藝聞於一鄉不知其活人濟世之方悉本慈祥愷惻之良
知味爽每焚香籲天冀欲普渡慈航誕登彼岸遇有急難來告者必扶服拯之門有乞丐必分簞食豆羹親
與之擴其施濟之懷必躋斯民於熙熙春臺而後已壽人壽世邊有窮期平日施診施藥特其緒餘焉爾文
子文孫仰體慈意亦都以醫術鳴吾又爲進一解醫身疾如是醫國疾亦當如是勉哉行善庶愜太夫人救
世之仁懷矣太夫人生於清咸豐乙卯三月二十五日以民國庚午八月七日卒享年七十有六子三長龍
任本邑區視學次煌畢業於日本東京經緯學校師範科歷任本邑崇實尙義等小學教職三鹿天津軍醫
學校畢業江西沙溪軍醫院少校院長均有聲於時女一適仇振榮已寡孫十一長懋東台母里師範畢業
先卒次堇江蘇醫學畢業河南省政府診療所中校科長三芳江蘇醫學畢業陸軍第二兵站醫院上校院
長五翔兵站醫院中尉副官三子同在駐徐州時殉難忠蓋取義可謂壯烈四寅江西慈谿縣衛生院院長
七颺江西鉛山縣衛生院院長六煥八旭均小學教員九時省一臨中畢業十紀十一鑫均幼讀孫女三佩
瑋浙江產科畢業適黃存元次佩珊亦浙江產科畢業適陸承采三佩琿省一臨師畢業適王元孚曾孫七
曾孫女四於某年某月某日合葬於泰縣萬家村北黑魚網之阡時閱十五載矣其子煌介予及門梅生竹
髣懇誠具狀郵乞銘爰爲銘曰

易占損疾使道有喜九歲之動執嗷厥理夫人賢明精研奧旨上溯倉公下師天士胡期不淑竟喪所天堪

心痛憤泣血漣漣飲冰茹蘗三十六年耕稼而食風雨一塵剝極而復安節之亨舍館繞膝子孫振振圭璋特達令望令聞齊家之式教育之型我欽懿範紀德紀文爰戒不律用銘永貞萬村勒石於千百齡

閩省鄭母陳太夫人墓表戊午

婦人女子之德在庸言之信庸行之謹願其言行有境彌淡而節彌甘者允足傳也歲次丁亥春仲閩省鄭君玉書將其伯母行狀懇懇請表墓文余按狀其庸言庸行有足爲闔閭中模範者太夫人爲福建陳先生壽年婦壽年行至孝其卒也義甯陳三立表其墓三立文學名家其世系已具詳太夫人諱英爲陳某某先生長女姑陳太安人亟賞其明敏有才聘爲婦年未及笄來歸壽年先生結構之初親屬交賀謂鄭氏得嘉婦陳太安人律已儉勤亦以此繩子婦太夫人于歸後鳴鷄戒旦夜分始息無須臾或怠蓋以此終其身焉而余深有感動於心者玉書之來請表墓也肅然而言曰玉書曾王考諱永茂公年踰七旬初視弱後病皆動作需人伯母恪循內則之訓味爽俟寢門王考興王母整衣伯母納屣道盥洗王母奉以水伯母奉漿食上必視寒暖之節食下祭所繕審所嗜溫清定省致謹於無聲無形之際窮窮焉俱未有拂意也曾王考愛之若孫娣姁之間訴合無間肅肅然雖離然而伯母輒躬任其難而讓先妣以易者又憶清光緒辛丑夏疾疫大作吾家病滯下者十七八先妣最劇宛轉牀第德甚伯母欲爲洗足先妣曰昔人有言長嫂如母今反事我雷將下擊矣伯母曰病也何妨卒爲洗濯訖嗚呼此非世俗所難能耶繼玉書又凄然而言曰太上貴德其次務施報夫家庭之際本不必以報施言然即以報施言之玉書更有內疚神明而不能已已者伯母之撫玉書昆弟也寒則衣之飢則食餉之垢則濯之疾則煦覆之或至他所則願我復我出入腹我無異於所生而玉書兄弟未冠即宦遊遠地泊伯母之病之喪妻孥亦無一人焉侍疾臨哀哭不憑棺祭不親奠葬不負土絕無纖毫之報痛何極矣悔何追矣綜伯母歸吾家四十三年伯父棄養時伯母蹙踊欲絕願以子

女繞膝羅蕭蕭勉抑哀思此情此景實非人境所堪抑何悲也迨閱二十年後孫男女二十有二曾孫男女十有一合子婦孫婦外孫都六十餘人子姓繁衍若此又何其盛也嚮使彼蒼錫以遐齡如我王母九十三而終亦豈異數適僅止於此豈天欲豐其後故裔於前歟余聆其言爲之慨然有間也太夫人以民國戊午年九月十日卒享年五十有五葬庵寨后坤首良趾申寅子若孫懋遷海內外任公司經理者五女二俱適洪季子卒業東瀛大學嘗攝本縣邑篆有政聲詩曰蓋爾女士從以孫子又曰俾昌而熾其門祚之鼎盛蓋方興未艾云

無錫劉母顧夫人墓誌銘丁亥

夫人姓顧氏諱毓宜字墨仙無錫縣人余友康伯先生之次女也幼婉婉嫻內則事母高太夫人馮翼孝德讀書明大義畢業競志女中學秉舊道德成新學問成績斐然及笄適隴西劉君思照爲婦劉君畢業聖約翰大學初入海軍部旋改財政部供職關務署有聲於時姑陳太夫人蚤逝翁書園公以丙戌進士出宰丹陽勤政愛民壬寅晉秩道員辛亥政變解組歸爲海上寓公翼書助賑公臨池夫人必安排几硯滌筆伸紙左右之事堂上視膳問安勤恪弗懈值姑氏忌日恆淒其惆悵以不及事爲終身大憾祭祀賓客暨任恤族鄰均料量周至書園公棄養後偕思照君卜居於金閶以翁窻窻於蘇便祭掃也夫人生丈夫子三貽彤貽管貽芬丁丑之秋東寇猾夏思照君隨中央政府西遷夫人支撐家政辛苦備嘗而緣督子女讀書寒暑無間踰年戊寅九月母病亟夫人馳歸剖臂和藥以進母疾果瘳孝行通神明有如斯者越二載辛巳春三子貽慰天殤夫人哭之慟而是年七月母高太夫人於七秩稱觴後遽爾殂謝一歲中哭子哭母積悲成疾已病入膏肓矣又越二載甲申冬長女貽彤在滬教育界服務猝患肺疾卒夫人悲傷彌甚疾不可爲矣夫人生於清光緒二十四年九月二十日以民國三十四年乙酉五月十八日卒春秋四十有八思照君以國難

時期郵筒梗塞未之知也俟勝利後十二月東歸甫知噩耗撫膺寤寐莫可言宣嗚呼天道坎坷吞恨者多生離死別傷如之何幸而蘭玉森森差可自慰於地下長子貽芳畢業上海同德醫學院在中國紅十字會醫院實習次女貽管服務上海同德醫院次子貽毅三女貽芬均肄業中學校劉君琴絃之痛可稍熨矣茲定於民國三十六年二月八日附葬於蘇州橫塘嚴家灣祖塋之阡厥弟毓曾持狀來請爲墓銘余旣志其事實爰爲銘曰

藐姑山有仙子靈之來兮佩祁祁八年黑奴愁辛螯巫峽猿哀蜀客嗜萬羣絺綌播芳徽宰上松楸魂魄羈虎邱月落子規啼佳城鬱鬱盤蚪螭銘幽聊塞安仁悲

嘉興王生季閔哀辭丙寅

秀州王氏代有聞人生名蘊常字季閔部訇先生之少子少穎悟冠常兒畢業於嘉興第一高等小學校至上海入民立中學以英語國文爲師契賞客歲夏五海上慘案起泯芽胥漸生犇走號呼櫛風沐雨不稍顧藉竟遘疾以歿年屢一十有九疾革時猶依依以國爲念也嗚呼哀哉禮記檀弓篇孔子曰欲勿殤童汪躄其可得乎生年且冠非汪童比於義可爲國殤矣抑余更有進焉生幼承父兄教敏於學而茂於才其平昔獨居深念必有在於喟古傷今耳目尋常之外者非屢因慘案而始也余未識生識生之兄蘊常蘊常從余學多年天才超越爲錫山諸門人冠兄如此弟可知也去冬蘊常流涕來請文余迺授脩短隨化之義以塞部訇先生之悲其辭曰

韓子有言凡人之生如夢一覺其間利害竟亦何較嗟夫王生夢兮何凶顏齡非膏彭年非豐骨肉歸土天命之常季子知禮維不永傷

江陰章君子衡哀辭乙酉

君姓章氏諱以榮字子術江蘇江陰人幼而秀慧享享玉立邑中長老咸目爲非常材初入小學已喜誦國文稍長入南菁中學研讀詩古文辭於四部書靡所不好尤喜讀史記漢書曰此文章淵藪也丙子歲入中央大學始攻歷史地理既而憬然悟曰此雖儒林之支與流裔然國學根本當別有在於是致力於讀經始研說詩書於毛傳鄭箋能剖析異同次春秋左氏傳次資治通鑑次周易禮記而於小學尤注意初中時即讀說文解字雖常干戈擾攘之時未嘗或廢平生嗜書盡擅音律得乃考佑曾先生之傳而於碑帖印章篆籀石鼓文之屬兼攻而並蓄焉嘗授課於江陰華墅龍砂中學諸生咸翕服乃弟以烜天資聰穎至背課循循善誘娶婦祝氏名安壽結婚後君爲講解經史弦誦之音達戶外一門好學鄉人欣羨之乃不幸於甲申春乃弟以烜患肺疾踰年九月卒君先時避厲疾入醫院至是悲痛過度竟於乙酉十月十六日卒得年僅二十有八傷哉遺著有晴翠草堂詩集悽惋冲淡追蹤古人其戚友祝君宗壽偕同志等將醴資付剞劂特來請余撰辭以哀之曰

氣數不可測兮天道之常俾復聖與跖躡兮竟一壽而一殤君山靈氣兮鬱乎蒼蒼胡一夕之罡風兮摧折乎雁行路人擊涕兮鄰春不相賴親戚之尙義兮保片羽而珍吉光輯遺編之寥落兮將什襲乎縹緗吾撰辭以哀之兮永二難之令望

茹經堂文集六編目錄

卷七 碑記類

重修無錫東林書院碑記丁亥

重修太倉隆福寺碑記丁亥

重修太倉周烈女風姑碑記丁亥

浙江熊劍東先生殉國碑記丁亥

南匯張效良先生哲嗣捐田助學紀念碑記丁亥

南翔懷少教育院落成碑記丁亥

茹經堂文集六編

卷七 碑記序

二 茹經堂叢書

茹經堂文集六編卷七

太倉唐文治蔚芝著

碑記類

重修無錫東林書院碑記丁亥

嗚呼人生當世氣節而已矣有氣節而後可以擎天柱地維人心世道於不敝乾坤正氣彌綸宇宙間無形之中爲萬事萬物之楨幹豈不至重且大哉自宣聖崇直道孟子養浩氣洎乎東漢崇尚氣節唐張睢陽宋文信國綿綿延延以迄於明之無錫東林書院實爲一脈之傳書院舊址爲高忠憲顧端文兩公講學之地方是時名儒碩彥風起雲從研求正學四方響應而有明一代之氣節遂彪炳於寰區厥後太倉之復社復東林也松江之幾社幾東林也然則東林之氣節豈非千古不朽者哉而吾謂氣節之萌祇實本於理學易傳言窮理盡性又言順性命之理是爲性理學之權輿余嘗講理學與則國家興理學廢則國家廢非虛語也近代以來藝林之士鄙理學爲陳腐不講久矣士人氣骨茶然脆弱入社會之中無待洪爐早已銷化欲求其特立獨行正一心以正一身正一身以正萬事豈不難哉故吾謂欲維今日之人心世道惟在講明氣節而激勵氣節必師法東林諸賢開嘗過錫山訪水居徘徊昔賢講學之地景仰流連不能自已奮乎百世之上百世之下莫不興起而況近居其地者乎東林講舍自前清順治至乾隆年間先後凡四修自乾隆年迄今先後修葺又若干次茲者同鄉諸君子慨念先賢祠宇歲久失修集議恢復舊觀於是發起重修者有吳敬恆錢基博錢基厚顧寶琛等三十人督修者陶達三辛幹願希炯楊郁初等捐資者榮鴻元等維月某日工告訖功同人等屬文治作記爰發明性理之根源並略述書院建置始末惟願我鄉邦人士景仰前徽

保氣節於將墜庶幾乾坤正氣磅礴扶輿有以永久於无疆矣夫

重修太倉隆福寺碑記丁亥

吾邑隆福寺故老相傳建造在蕭梁以前厥後相沿稱爲敕建大抵自梁時歷隋唐宋元明清諸代迄今蓋二千年矣其地當城之西南隅門外池約三畝許植蓮花數十本余於庚寅辛卯兩年設帳小西門內顧氏每日必經其地攜暮雲影池光荷香芬馥回溯前明陸尊道桴亭先生講學於淮雲寺陳安道確庵先生講學於蔚村七十二潭蓮花若隱若見於心目中人間勝境皆心理所造成得此亦已足矣用是咨與徘徊不能舍去薄暎始返時余賃居城中南牌坊趙家廳內也人事無常滄桑屢易日寇內熨寺剝遂成荒落旁風上雨幾無蓋障宵人因之盜竊佛像僅有存者藝林志士經涉其地輒憑弔歎歎不能已已歲臘丁亥莫春主持僧慧通慎修大發宏願備詣城鄉鳴魚托鉢告虔勸募邑人感其誠踴躍惠貲得款壹仟萬金爰請邑紳陸勤之許平凡諸先生暨余弟璞丞設經濟保管會補助督導衆工齊舉歷二月工告訖功於是廟貌煥然重新佛像亦將次第恢復慧通慎修之功洵足嘉哉嗟夫古跡之顯晦人文隆替之繇也竊意尊道書院及明王烟客太常之南園皆富次第規復萃優秀青年誦讀其中沐浴詩書之澤闡揚陸陳江盛四先生之正學遺型天下培善因者必結善果此則邦人君子之責而余亦願追隨其後者也爰勒諸石用誌來者

重建太倉周烈女風姑碑亭記丁亥

歲次丁亥仲春及門陸君恩溥戴君國嘜有重建周烈女風姑碑亭之義舉邑人唐文治聞之曰盛矣哉此表章節烈之事洵足以激勵末俗哉吾邑小西門外有香象庵烈女少祝髮其中庵尼與無賴願恩有染適爲烈女所見尼慚嗾願恩並強汚烈女脅以刃烈女大怒目眦欲裂以石硯投恩不中惡尼與願恩知決不可犯刀棍交下遂被害慘矣哉鬼神爲之飲泣矣此清初康熙六十年五月事也邑人鳴之官州守李珏窮

治之顧思及惡尼均庾死獄中邑人毀庵瘞烈女於其地乾隆八年州守王延熙請於撫軍陳大綬題其墓曰血凝白璧卽其地建碑亭用彰其烈同治九年夏州守蒯德模因碑亭傾地修築之系以銘詞距今已七十八年矣亭頽碑轟然尚存今茲陸戴二君暨鄉人君子踴躍捐貲重建之樸而不華堅而可久嗚呼方今士大夫倪佻佻逐利罔厭氣節幾乎掃地矣烈女一弱息而深明大義若此古人有言死有重於泰山烈女之節可與日月爭光豈非吾鄉諸先正之遺教有以深入於人心哉而今茲諸君子之表章節烈禮義廉恥之大坊鍊磨不沫洵足以激勵末俗哉

浙江熊劍東先生殉國碑記丁亥

先生姓熊氏諱劍東浙江新昌人少磊落有大志短少精悍氣雄萬夫喜讀乙部書評論古來盛衰興廢善惡是非得失之迹洞若觀火長老鄉黨已知其爲非常人而先生慨然曰居今之世踴躍鄉里豈足辦國家大事遂遊歷歐美英蘇德日諸國熟習西語兼通東文民國初元時局蠲蟻革命家紛然起先生以爲奠定邦基不在空言當務實際會江浙交關後係傳芳督軍金陵先生與浙省警察廳長夏超謀刺之事泄夏超被捕就戮先生走日本違時義晦入軍校肄業三載始返適柏文蔚將軍聞其名以禮聘之與語大悅盡用其言丁丑歲抗戰軍起政府知先生有傑才派爲軍委會別動總隊淞滬特遣支隊長備著勞動勳年又奉令兼任琴嘉太崑青松六縣游擊司令設司令部於常熟東鄉殺敵致果威震遐邇己卯春先生自虞赴滬向某西人密購軍械詎某西人與日潛通先生途中狡計被逮與邏者抗拒格鬪頭部受重傷彙絕及醒則身已入虹口爲日寇幽囚矣先生憤甚罵不屈寇壯其行亦不敢加害越歲餘始脫險藏故將軍兩處亦義俠人也將於敵僞淪陷區隱施地下工作得先生大喜於是徵集情報營救同志懲治奸宄各端悉心委曲以赴之人或尼之且有誹謗之者先生介然曰忠誠謀國者祇知國家利害不計生死國難至此當世是非

段譽遠暇慮及耶大義慷慨衆爲動容時巨奸李士羣勢熾薰天炙手可畏而先生承戴故將軍之命置諸法乙酉春先生奉中央密令策反工作未幾日寇投降或有惜未建大功爲言者先生驟然笑曰國土重光撥雲霧而見青天幸免地方糜爛百姓得解倒懸此最愉快之事可復自炫其功以盜名耶嗚呼先生愛民可謂至矣維時日寇雖受降而國軍尙未進駐蘇省絕續之交荏苒蠢動淞滬岌岌先生乃率部分駐要隘盡二十餘晝夜之力廢食忘寢用戒不虞閭閻賴以安堵中央嘉其勞苦功高特傳令褒獎是歲十月先生奉令所部改編爲別動軍第十三總隊任少將指揮駐防廩山後又移駐京滬綏任護路任務又改所部爲交通警察第七總隊任總隊長當局倚畀益隆歲丙戌蘇北亂象環生先生奉令率部渡江鏖戰無前途佔丁堰進駐如皋會進軍過銳後路不免單薄八月二十一日又奉命扼守丁堰先生卽日率所部邁返敵謂知之是晚遂以十倍衆環圍丁鎮自丙夜至翌晨九時許我軍與苦戰敵不得逞復頑強濟師蜂屯蟻聚礮石雷吼壤我防禦工程先生乃振臂大呼率部突圍殊死戰無不一以當百士卒負傷者前仆後繼不稍却時飛彈中先生腹流血朱股猶裹創臥地發彈殺敵而環顧隨從數人皆陣亡自知不免嘆曰古來義士臨難不辱遂以手槍自殺嗚呼壯烈矣哉蓋天地怵悲鬼神飲泣矣中樞聞耗震悼逾恆加撫卹明令將生平事蹟宣付國史館立傳並派員治喪飾終典禮極哀榮令望千秋從茲不朽已先生春秋四十有六太夫人某氏頤養居鄉夫人唐氏子一公雅女二翔羣均寓居滬濱附誌之用彰忠蓋之後必有達者銘曰乾坤浩氣摩太空山河壯彩生英雄桓桓武怒勇如熊三軍齋肅拜熊公平生自矢殉俠血三仆三蘇猶殺敵耿耿忠誠衛邦國馬革裹尸靡所惜嗚呼人生最重惟大節倚天撐地惟氣骨鄙夫貪黷擁鉅貨臨難詎能不畏死壯哉男兒轟烈烈先生可爲當代式鏤茲豐碑石巖巖千古英名永不滅

南匯張效良先生哲嗣捐田助學紀念碑記丁亥

通惠小學在上海馬當路過其地者誦讀之聲琅琅達戶外詢之則曰此水木業顧君蘭洲江君裕生等所合力勸建而張校董效良先生曾經贊助者也按是校勸立於前清光緒戊申年至今同業子弟皆得免費入學蓋不忘本也張先生諱毅南匯籍平居輕財崇信行善不倦尤注重教育事業先生自通匯小學外如甲子江浙戰事辛未長江水災壬申中日之役先後設難民收容所加意調恤民懷其德滬市新陸師範西成尙文等校靡不慷慨捐貲譽髦斯士今逝世已十稔矣其哲嗣壽庚字起鵬壽松字起宇追念先德特捐青浦縣田壹百零捌畝有奇作爲先生十週紀念嗚呼先生之博施造士可謂仁矣兩君之繼志述事可謂孝矣通惠學生俱蒙其澤聞其化焉有不嚮風興起敦品勤學者乎至掌斯校者爲余及門湯君國勳自交通部上海工業專門學校畢業後任職已三十餘年始終不渝造就多士在社會服務成績卓著者遠千餘人教育部特頒獎狀褒獎市教育局亦予褒狀以彰榮譽洵難能而可貴者已爰紀其始末作興學者之矜式焉

南翔懷少教育院落成碑記丁亥

嘉定同鄉朱蘇吾先生今世善人也往者余爲先生作樹萱堂記謂吾輩生今之世正爲善大好時機當隨時守聖人之訓曰見善如不及蓋善幾善因稍縱卽逝萬不可交臂失之先生深有契於予言孜孜爲善罔有倦怠丁亥春先生創建南翔懷少教育院落成來屬余撰碑記余按其章程其編制部份凡三曰幼稚組以撫養四五齡兒童也曰小學組以六歲以上兒童傳就學也曰習藝組以小學高級生升入採半工半讀制俾學藝守職業也余不禁肅然謹佩曰盛矣夫天地之間善氣而已矣宋張橫渠先生有言爲天地立心爲生民立命先生之意殆探本於是乎爲善之道小以成小大以成大不拘一途亦無止境而吾心折於先生者尤在以宋朱文公爲法院之第二幢繚以迴廊可十二丈廊壁拓刊公遺墨忠孝廉節四大字每字大

可一丈先生加以註釋俾學童銘諸心版永守弗諼盛矣夫昔孟子提倡仁義學說曰未有仁而遺其親孝也未有義而後其君忠也況今日欲救心救身救家救國尤以廉節爲先務之急自古迄今未有不廉無節貪墨卑鄙而可以發明正學辦理大事者先生紫陽後裔遠宗家法盛矣夫吾鄉有人吾國有光矣至於助先生之成者有唐叔明田夏霖徐子星施成孫蔣大豐胡銘山毛鑑清嚴成德童驊鄉諸先生方事之始先生已培養兒童分別選送太倉中學真茹中學黃渡鄉師暨工商界著名各廠丙戌之春先生哲嗣樹蓀與唐叔明先生令媛之筠女士行合登禮兩親家協議專以儉約爲主將所收賀儀及席費六百二十三萬元有奇悉數移充懷少院建築基金先購買印度棉花以權子母迨印棉購到後適值市價高翔利以倍蓰先生欣然色喜曰懷少院得有基本矣於是購地於南翔鎮芥字廿九圖基地五畝一分零計舊屋宇三十餘間不敷用再由諸院董捐募共集得建築費六千五百廿二萬元揀度削屢大啓爾宇自三十五年九月至三十六年三月工告訖成屋凡五進輪焉奐焉其中曰敬業樓曰明禮廳曰鹿萃堂曰炳之堂此外若操場等一是一具備以上廳樓堂額均以誌諸院董協助創立之功又於北廊築一亭顏曰思鑑亭置大著衣鏡俾諸生敬吾身敬吾心時時反省去其舊染之污也先生之心可謂仁且慈矣先生之智可謂周且至矣盛矣夫吾鄉之榮吾國之光夫余故特記其始末以表先生與諸院董毅力熱心並以勉諸生敦品勤學云

跋

戊子孟冬及門武進女弟子陸汝挺編次余六集告成辛勤倍著惟時適值米荒大疫爰慨然跋其後曰嗚呼際茲時局而是集適成豈非風雨如晦雞鳴不已者乎雖然吾嘗探周易消息泰否二卦之後卽繼之以剝復蓋泰而必否者人事爲之也故曰無平不陂堅貞无咎剝而必復者人心爲之也故曰不遠復无祇悔元吉邇來貪黷成風如江河之日下而無所底止上下不交而天下无邦觀儉德辟難之象君子爲之深惕

焉然天地之心終必扶陽而抑陰斥邪而崇正也夫天心如此人居天地之中而體造化之心獨不思有以砥柱之乎故曰復其見天地之心乎余雖懷救民之誠奈無斧柯之假日聞吾民之呼號於吾前而無挽救之術爰以正人心救民命之說喚醒世人之良知予手拮据予口卒瘡矣然聞吾說者未嘗無感動於中也斯集之印行豈非一陽之碩果乎孟子有言樂以天下憂以天下宋范文正又進一解曰先天下之憂而憂後天下之樂而樂吾今日之憂安知非後日之樂乎縱橫億萬里豪傑之士必有仔肩道統聞吾說而奮興者必將以斯集爲嚆矢也讀經始能救國致良知始能救心謹爲後起者勗蔚芝唐文治跋

是編印成在戊子歲杪維時洛陽紙貴覓購萬艱幸得及門裘君次豐多方設法始能購得校讎者爲太倉陸君景周武進女弟子陸汝挺君而奔走襄事者太倉高大勛君承印者南匯汪竹生君暨乃姪魯伯君際茲生活高翔兩君給償工價損失極鉅其克已助成良可感也蔚芝記